

। नमो नमः श्री गुरुप्रेमसूरये ।

श्री अनुयोगद्वारसूत्रम् ।

-: प्रकाशक :-

श्री जिनशासन आराधना ट्रस्ट
दुकान नं. ५, बदरिकेश्वर सोसायटी,
८२, नेताजीसुभाष रोड, मरीन ड्राइव 'इ' रोड,
मुंबई - ४०० ००२.

ગંગાણ વાલુઅં જો, મિણિજ્જ ડલ્લિંચિડણ ય સમત્થો ।
હત્થડડેહિં સમુંદ સો નાણગુણે ભણિજ્જાહિ ॥

ગંગાનદીના તટ પરની રેતીના કણેકણને માપવા (ગણવા) જે સમર્થ છે, ને જે અગાધ સમુદ્રના
પાણીને બે હાથ વડે ઉલેચી નાખવા સમર્થ છે, તે જ જ્ઞાનના ગુણો (મહત્તા) કહેવા સમર્થ છે.
(અર્થાત્ શ્રુતજ્ઞાનની મહત્તાનું માપ કાઢવું અશક્યપ્રાય: છે)

। नमो नमः श्री गुरुप्रेमसूरये ।

श्री अनुयोगद्वारसूत्रम् ।

-: प्रकाशक :-

श्री जिनशासन आराधना ट्रस्ट

दुकान नं. ५, बद्रिकेश्वर सोसायटी,
८२, नेताजीसुभाष रोड, मरीन ड्राइव 'इ' रोड, मुंबई - ४०० ००२.

वीर संवत् २५२२

मूल्य :- ४०/-

ભાવભરી અનુમોદના

અનુયોગદ્વાર મૂળ આગમના પ્રકાશનનો સંપૂર્ણ લાભ
પૂજ્યપાદ આચાર્યદેવ શ્રીમદ્ વિજય હેમચન્દ્રસૂરિ મ. સા. ની પ્રેરણાથી

શ્રાદ્ધવર્ય ઉત્તમભાઈ ચેલજીભાઈના ધર્મપત્ની મફતબેન તથા તેમના સુપુત્ર
ગિરીશભાઈ, તેમના ધર્મપત્ની કિશોરીબેન સુપુત્ર અનીષ-પુત્રી સ્વાતિ જમાઈ
કેતનભાઈ કીરીટભાઈ શાહ વગેરે તરફથી લેવામાં આવેલ છે..

સ્વદ્રવ્યથી શ્રુતભક્તિના તેમના આ ઉત્તમ કાર્યની ભાવભરી અનુમોદના કરીએ છીએ.

લી.

શ્રી જિનશાસન આરાધના ટ્રસ્ટ..

પ્રકાશકીય

જિનાગમોની વ્યાખ્યામાં પ્રવેશ કરવા માટે દ્વાર સમાન “અનુયોગ દ્વાર” મૂળ ગ્રંથને અમે સહર્ષ પ્રકાશિત કરીએ છીએ. પૂર્વ ઋષિઓએ રચેલ આ ગ્રંથ ઉપર મલ્લધારીય શ્રી હેમચન્દ્રસૂરી મ. સા. એ વિસ્તૃત વૃત્તિની રચના કરી છે વૃત્તિ સહીત આ ગ્રંથને પણ અમે પૂર્વ પ્રકાશિત કરેલ છે.

પ્રસ્તૂત ગ્રંથમાં અનુયોગના (અનુયોગ એટલે સૂત્રની વ્યાખ્યા) મુખ્ય ચાર દ્વારો (૧) ઉપક્રમ (૨) નિષ્કેપ (૩) અનુગમ (૪) નય નું ... તેના પેટા દ્વારો વગેરે સાથે સુંદર વર્ણન કર્યું છે.

આ ગ્રંથના અધ્યયન પછી અન્ય આગમોનું અધ્યયન સરળ પડે છે.

પ્રસ્તૂત ગ્રંથના અધિકારી યોગોદ્વહન કરેલા ગુરુ આજ્ઞા પાત્ર મુનિભગવંતો આનું સુંદર અધ્યયન અધ્યાપન કરી શ્રુતની આરાધના કરવા દ્વારા કર્મનિર્જરા કરે તથા અમને પણ આવા અનેક ગ્રંથોના પ્રકાશન દ્વારા શ્રુતભક્તિનો લાભ મલે.

એજ એક માત્ર અભ્યર્થના

લી. શ્રી જિનશાસન આરાધના ટ્રસ્ટ વતી

ટ્રસ્ટીઓ

બાબુભાઈ સી. જરીવાળા

નવિનચંદ્ર ભગવાનદાસ શાહ

લલિતકુમાર રતનચંદ કોઠારી

પુંડરીકભાઈ અંબાલાલ શાહ

પ્રાપ્તિસ્થાન

(૧) પ્રકાશક - મુંબઈ

(૨) શ્રી જિનશાસન આરાધના ટ્રસ્ટ
C/o. ચંદ્રકાંત એસ. સંઘવી
કનાસાનો પાડો, પાટણ.
(ઉત્તર ગુજરાત)

(૩) મૂળીબેન અંબાલાલ.

રતનચંદ જેન ધર્મશાળા,
સ્ટેશન રોડ, વીરમગામ.

(૪) બંસીલાલ અંબાલાલ શાહ

જૈન યાત્રિક ભુવન,
માણેક ચોક, ખંભાત.

ગુરુ આજ્ઞા પ્રાપ્ત યોગોદ્ધવહન કરેલ મુનિભગવંતો જ માત્ર
આ સૂત્રના પઠન-પાઠનના અધિકારી છે.

શ્રુતભક્તિમાં હંમેશના સહયોગી
શ્રુતસમુદ્ધારક

- (૧) શ્રાદ્ધવર્યા ભાણબાઈ નાનજી ગડા, મુંબઈ (પૂજ્યપાદ ગચ્છાધિપતિ સ્વ. આચાર્યદેવ શ્રીમદ્ વિજય ભુવનભાનુસૂરીશ્વરજી મ.સા.ના ઉપદેશથી)
- (૨) શેઠ આણંદજી કલ્યાણજીની પેઢી, અમદાવાદ.
- (૩) શાંતિનગર શ્રે. મૂર્તિ જૈન સંઘ, અમદાવાદ (પૂજ્યપાદ તપસ્વીરત્ન આચાર્યદેવ શ્રીમદ્ વિજય હિમાંશુસૂરીશ્વરજી મ.સા. તથા સરલ સ્વભાવી પૂજ્યપાદ આચાર્યદેવ શ્રીમદ્ વિજયનરરત્નસૂરિ. મ.સા.ની પ્રેરણાથી)
- (૪) શ્રી લાવણ્ય સોસાયટી શ્રે. મૂર્તિ જૈન સંઘ અમદાવાદ (પૂજ્યપાદ પંન્યાસજીશ્રી કુલચંદ્ર વિ.મ.ના ઉપદેશથી)
- (૫) શ્રી શ્વેતામ્બર મૂર્તિ તપગચ્છીય જૈન પૌષઘ શાળા ટ્રસ્ટ, દાદર, મુંબઈ.
- (૬) શ્રાદ્ધવર્યા નયનબાળા બાબુભાઈ સી. જરીવાળા પરિવાર હા. ચંદ્રકુમાર - મનીષ - કલ્પેશ વગેરે પરિવાર. (પૂજ્ય કલ્યાણબોધિ વિજય મ. ના ઉપદેશથી)
- (૭) શ્રાદ્ધવર્યા કેસરબેન રતનચંદ કોઠારી હા. લલિતભાઈ (પૂજ્યપાદ ગચ્છાધિપતિ આચાર્યદેવ શ્રીમદ્વિજય જયઘોષ સૂરીશ્વરજી મ.સા. ના ઉપદેશથી.)

- (૮) શ્રી દેવકરણ મૂળજીભાઈ જૈન દેરાસર પેઢી (મલાડ - વેસ્ટ)
- (૯) શ્રી મુલુંડ શ્રે. મૂર્તિ. જૈન સંઘ મુલુંડ. (પૂ. આચાર્યદેવ શ્રીમદ્ વિજય હેમચંદ્ર સૂરિ મ. ની પ્રેરણાથી)
- (૧૦) શ્રીપાળનગર જૈન શ્રે. મૂર્તિ. દેરાસર ટ્રસ્ટ વાલકેશ્વર, મુંબઈ.
(પ.પૂ. ગચ્છાધિપતિ આચાર્યદેવ શ્રીમદ્વિજયરામચંદ્રસૂરીશ્વરજી મ.સ.ના ઉપકારની સ્મૃતિ નિમિત્તે પ.પૂ. આચાર્યદેવ શ્રીમદ્વિજય મિત્રાનંદસૂરીશ્વરજી મ.સા. ની પ્રેરણાથી)
- (૧૧) શ્રી શાંતાકુઝ શ્રે. મૂર્તિપૂજક તપગચ્છ સંઘ (મુંબઈ)
- (૧૨) સંઘવી અંબાલાલ રતનચંદ જૈન ધાર્મિક ટ્રસ્ટ (ખંભાત) પૂજ્ય સાધ્વીજીશ્રી વસંતપ્રભાશ્રીજી મ. સ્વયંપ્રભાશ્રીજી મ. તથા દિવ્યચશાશ્રીજી મ.ની પ્રેરણાથી)
- (૧૩) બાબુ અમીચંદ પનાલાલ આદીશ્વર જૈન ટેમ્પલ ચેરીટેબલ ટ્રસ્ટ (પૂ. અક્ષયબોધિ વિ મ. તથા મહાબોધિ વિ.મ. તથા હિરણ્યબોધિ વિ.મ. ની પ્રેરણાથી)
- (૧૪) શ્રી શ્રેયસ્કર અંધેરી ગુજરાતી જૈન સંઘ (પૂ. હેમદર્શન વિ.મ. તથા પૂ. રમ્યધોષ વિ. મ. ની પ્રેરણાથી)
- (૧૫) શ્રી પાર્શ્વનાથ શ્રે. મૂર્તિ. જૈન સંઘ, સંઘાણી એસ્ટેટ, ઘાટકોપર, મુંબઈ પ. પૂ. આ. શ્રીહેમચંદ્રસૂરિ મ. સા.ની પ્રેરણાથી

શ્રુતોદ્ધારક

- (૧) શ્રી લક્ષ્મીવર્ધક જૈન સંઘ, પાલડી, અમદાવાદ (મુનિશ્રી નિપુણચંદ્ર વિજયજી મ. ની પ્રેરણાથી)
- (૨) શ્રી જૈન શ્વે. મૂર્તિ સંઘ, સાયન, મુંબઈ.
- (૩) શ્રી પાર્શ્વનાથ શ્વે. મૂર્તિ. જૈન સંઘ, સંઘાણી એસ્ટેટ ઘાટકોપર, મુંબઈ.
- (૪) શ્રી નડિયાદ શ્વે. મૂર્તિ. જૈન સંઘ તપસ્વીરત્ન મુનિશ્રીવરબોધિ વિજયજી મ. ની પ્રેરણાથી)

શ્રુતભક્ત

- (૧) બી.સી. જરીવાળા ચેરીટેબલ ટ્રસ્ટ - વડોદરા (પૂ. સંયમબોધિ વિજય મ. ની પ્રેરણાથી)
- (૨) શ્રી સુમતિનાથ શ્વે. મૂ. જૈન સંઘ મેમનગર અમદાવાદ...(પૂ. ધર્મરક્ષિતવિ. મ. તથા પૂ. હેમદર્શન વિ. મ. ની પ્રેરણાથી)

- (૩) શ્રી બાપુનગર શ્રે. મૂર્તિ. જૈન સંઘ (પૂ. અક્ષયબોધિ વિ. મ. તથા મહાબોધિ. વિ. મ. ની પ્રેરણાથી)
- (૪) શ્રી મુનિસુવ્રત સ્વામી જૈન શ્રે. મંદિર ટ્રસ્ટ, કોલહાપુર.
- (૫) સ્વ. શ્રાદ્ધવર્ય સુંદરલાલ દલપતભાઈ ઝવેરીના સ્મરણાર્થે હા. જસુદ્ધબેન, પુનમચંદ, જસવંત વગેરે)
- (૬) માતૃશ્રી રતનબેન વેલજી ગાલા ચેરીટીબલ ટ્રસ્ટ, મુલુંડ (પૂ. રત્નબોધિ વિ.મ.ની દીક્ષાની અનુમોદનાર્થે)
- (૭) શ્રી બોરિવલી જૈન શ્રે. મૂર્તિ તપગચ્છ સંઘ (પૂ. મુનિરાજશ્રી અપરાજિત વિ. મ. ની પ્રેરણાથી)
- (૮) શ્રી મુલુંડ તપગચ્છના આરાધક ભાઈઓ તથા ધોધારિવીસા શ્રીમાળી આરાધકભાઈઓ.

श्रीमद् विजयकमलसूरीश्वरेभ्यो नमः ॥

श्रीमत्स्थविरविरचितम् ।

अनुयोगद्वारसूत्रम् ।

नाणं पंचविहं यण्णत्तं तंजहा-आभिणिबोहियनाणं सुयनाणं ओहिनाणं मणपज्जवनाणं केवलनाणं (सू० १) तत्थ चत्तारि नाणाइं ठप्पाइं ठवणिजाइं णो उद्दिसंति णो समुद्दिसंति णो अण्णुणविज्जंति, सुयनाणस्य उद्देसो समुद्देसो अण्णुणा अणुओगो य पवत्तइ (सू० २) जइ सुयनाणस्स उद्देसो समुद्देसो अण्णुणा अणुओगो य पवत्तइ, किं अंगपविट्ठस्स उद्देसो समुद्देसो अण्णुणा अणुओगो य पवत्तइ?, किं अंगवाहिरस्स उद्देसो समुद्देसो अण्णुणा अणुओगो य पवत्तइ?, अंगपविट्ठस्स वि उद्देसो जाव पवत्तइ, अंगपविट्ठस्स वि उद्देसो जाव पवत्तइ?, इमं पुण पट्ठवणं पडुच्च अंगपविट्ठस्स अणुओगो (सू० ३) जइ अंगपविट्ठस्स अणुओगो किं कालिअस्स अणुओगो? उक्कालिअस्स अणुओगो?, कालिअस्सवि अणुओगो उक्कालिअस्सवि अणुओगो, इमं पुण पट्ठवणं पडुच्च उक्कालिअस्स अणुओगो (सू० ४) जइ उक्कालिअस्स अणुओगो किं

अनुयोग

हार-

॥ १ ॥

आवस्सगस्स अणुओगो ? आवस्सगवतिरित्तस्स अणुओगो ? आवस्सगस्सवि अणुओगो आवस्सगवतिरित्तस्स वि अणुओगो, इमं पुण पट्टणं पटुच्च आवस्सगस्स अणुओगो (सू० ५) जइ आवस्सगस्स अणुओगो किं अंगं अंगाइं सुअखंधो सुअखंधा अज्झयणं अज्झयणाइं उद्देसो उद्देसा ? आवस्सयस्स णं नो अंगं नो अंगाइं सुअखंधा नो सुअखंधो नो अज्झयणं अज्झयणाइं नो उद्देसो नो उद्देसा (सू० ६) तम्हा आवस्सयं निक्खिविस्सामि सुअं निक्खिविस्सामि खंधं निक्खिविस्सामि अज्झयणं निक्खिविस्सामि (सू० ७) जत्थ य जं जाणेज्जा निक्खेवं निक्खिवे निक्खसेसं । जत्थ वि अ न जाणेज्जा चउक्कगं निक्खिवे तत्थ ॥ १ ॥ (१) से किं तं आवस्सयं ? आवस्सयं चउव्विहं पण्णत्तं तंजहा-नामावस्सयं ठवणावस्सयं द्वावस्सयं भावावस्सयं (सू० ८) से किं तं नामवस्सयं ? २ जस्स णं जीवस्स वा अजीवस्स वा जीवाण वा अजीवाण वा तदुभयस्स वा तदुभयाण वा आवस्सएत्ति नामं कज्जइ से तं नामावस्सयं (सू० ९) से किं तं ठवणावस्सयं ? २ जण्णं कट्ठकम्मे वा पोत्थकम्मे वा चित्तकम्मे वा लेप्पकम्मे वा गंधिमे वा वेदिमे वा पूरिमे वा संघाइमे वा अक्खे वा वराडए वा एगो वा अणेगो वा सव्भावठवणा वा असव्भावठवणा वा आवस्सएत्ति ठवणा ठविज्जइ सेतं ठवणावस्सयं (सू० १०) णामद्ववणाणं को पइविसेसो ? णामं आवकहिअं ठवणा इत्तरिआ वा होज्जा आवकहिआ वा (सू० ११) से किं तं द्वावस्सयं ? २ दुविहं पण्णत्तं तंजहा आगमओ अ नोआगमओ अ (सू० १२) से किं तं आगमओ द्वावस्सयं ? २ जस्स णं आवस्सएत्ति पदं सिक्खितं ठितं जितं मितं परिजितं नामसमं घोससमं अहीणक्खरं अणच्चक्खरं अवाइद्वक्खरं अक्खलिअं अमिलिअं अवचामेलियं पडिपुण्णं पडिपुण्णघोसं कंठोद्विप्पमुक्कं गुरुवायणोवगमं, से णं तत्थ वायणाए पुच्छणाए परिअद्वणाए धम्मकहाए नो अणुपेहाए,

सप्तम्.

॥ १ ॥

कम्हा ? 'अणुवओगो दव' मिति कट्ठु (सू० १३) नेगमस्स णं एगो अणुवउत्तो आगमओ एगं दवावस्सयं दोण्णि
 अणुवउत्ता आगमओ दोण्णि दवावस्सयाइं तिण्णि अणुवउत्ता आगमओ तिण्णि दवावस्सयाइं एवं जावइया अणुवउत्ता आग-
 मओ तावइआइं दवावस्सयाइं, एवमेव ववहारस्सवि, संगहस्स णं एगो वा अणेगो वा अणुवउत्तो वा अणुवउत्ता वा आगमओ
 दवावस्सयं दवावस्सयाणि वा, से एगे दवावस्सए, उज्जुसुअस्स एगो अणुवउत्तो आगमतो एगं दवावस्सयं पुहुत्तं नेच्छइ,
 तिण्हं सइनयाणं जाणए अणुवउत्ते अवत्थु, कम्हा ? जइ जाणए अणुवउत्ते न भवति जइ अणुवउत्ते जाणए ण भवति, तम्हा
 णत्थि आगमओ दवावस्सयं । से तं आगमओ दवावस्सयं (सू० १४) से किं तं नोआगमओ दवस्सयं ? २ तिविहं पण्णत्तं,
 तंजहा-जाणयसरीरदवावस्सयं भविअसरीरदवावस्सयं जाणयसरीरभविअसरीरवतिरित्तं दवावस्सयं (सू० १५) से किं तं जाण-
 यसरीरदवावस्सयं ? २ आवस्सएत्ति पयत्थाहिगारजाणयस्स जं सरीरयं ववगयच्चुतचावितचत्तदेहं जीवविप्पजढं सिज्जागयं
 वा संथारगयं वा निसीहिआगयं वा सिद्धसिलातलगयं वा पासित्ता णं कोई भणेज्जा-अहो ! णं इमेणं सरीरसमुस्सएणं जिण-
 दिट्ठेणं भावेणं आवस्सएत्तिपयं आघवियं पण्णवियं परूविअं दंसिअं निदंसिअं, जहा को दिट्ठंतो ? अयं महुकुंमे आसी, अयं
 घयकुंमे आसी, सेतं जाणयसरीरदवावस्सयं (सू० १६) से किं तं भविअसरीरदवावस्सयं ? २ जे जीवे जोणिजम्मणनिक्खंतं
 इमेणं चेव आत्तएणं सरीरसमुस्सएणं जिणोवदिट्ठेणं भावेणं आवस्सएत्तिपयं सेयकाले सिक्खिस्सइ, न ताव सिक्खइ, जहा को
 दिट्ठंतो ? अयं महुकुंमे भविस्सइ अयं घयकुंमे भविस्सइ, सेत्तं भविअसरीरदवावस्सयं (सू० १७) से किं तं जाणयसरीरभवि-
 असरीरवतिरित्तं दवावस्सयं ? २ तिविहं पण्णत्तं तंजहा-लोइअं कुप्पावयणियं लोउत्तरिअं (सू० १८) से किं तं लोइयं दवा-

वस्सयं ? २ जे इमे सईसरतलवरमाडंविअकोडुंविअइभसेट्टिसेणावइसत्थवाहप्पभित्तिओ कल्लं पाउप्पभायाए रयणीए सुविम-
 लाए फुल्लुप्पलकमलकोमलुम्मिलिअंमि अहापंडुरे पभाए रत्तासोगपगासकिंसुअसुअमुहगुंजद्वरागसरिसे कमलागरनलिणिसंडबो-
 हए उट्ठिअंमि सूरु सहेस्सरस्सिमि दिणयरे तेयसा जलंते मुहधोअणदंतपक्खालणतेल्लफणिहसिद्धत्थयहरिआलिअअद्दागधूवपुप्फ-
 मल्लगंधतंबोलवत्थाइआइं दद्दावस्सयाइं करेति, ततो पच्छा रायकुलं वा देवकुलं वा आरामं वा उज्जाणं वा सभं वा पवं वा गच्छंति,
 सेतं लोइअं दद्दावस्सयं (सू० १९) से किं तं कुप्पावयणिअं दद्दावस्सयं ? २ जे इमे चरगचीरिगचम्मखंडिअभिक्खोंडपंडुरंगगो-
 अमगोवतिअगिहिधम्मधम्मचित्तगअविरुद्धविरुद्धबुद्धसावगप्पभित्तओ पासंडत्था कल्लं पाउप्पभाए रयणीए जाव तेअसा जलंते
 इंदस्स वा खंदस्स वा रुहस्स वा सिवस्स वा वेसमणस्स वा देवस्स वा नागस्स जक्खस्स वा भूअस्स वा मुगुंदस्स वा अज्जाए
 वा दुग्गाए वा कोट्टकिरियाए वा उवलेवणसंमज्जणआवरिसणधूवपुप्फगंधमल्लाइआइं दद्दावस्सयाइं करेति, से तं कुप्पावयणियं
 दद्दावस्सयं (सू० २०) से किं तं लोगुत्तरिअं दद्दावस्सयं ? २ जे इमे समणगुणमुक्कजोगी छक्कायनिरणुकंपा हया इव उद्दामा गया
 इव निरंकुसा घट्ठा मट्ठा तुप्पोट्ठा पंडुरपडपाउरणा जिणाणमणाणाए सच्छंदं विहरिऊणं उभओ कालं आवस्सयस्स उवट्ठंति, से तं
 लोगुत्तरिअं दद्दावस्सयं, से तं जाणयसरीरभविअसरीरवहरित्तं दद्दावस्सयं, से तं नो आगमतो दद्दावस्सयं, से तं दद्दावस्सयं
 (सू० २१) से किं तं भावावस्सयं ? २ दुविहं पण्णत्तं, तंजहा-आगमतो अ नोआगमतो अ (सू० २२) से किं तं आगमतो
 भावावस्सयं ? २ जाणए उवउत्ते, से तं आगमतो भावावस्सयं (सू० २३) से किं तं नो आगमतो भावावस्सयं ? २ तिविहं
 पण्णत्तं, तंजहा-लोइयं कुप्पावयणियं लोगुत्तरिअं (सू० २४) से किं तं लोइयं भावावस्सयं ? २ पुब्वण्हे भारहं अवरण्हे

रामायणं से तं लोहयं भावावस्सयं (सू० २५) से किं तं कुप्पावयणियं भावावस्सयं ? २ जे इमे चरगचीरिग जाव पासं-
 डत्था इज्जंजलिहोमजपोन्दुरुकनमोकारमाइआइं भावावस्सयाइं करेंति से तं कुप्पावयणिअं भावावस्सयं (सू० २६) से किं तं
 लोगुत्तरियं भावावस्सयं ? २ जणं इमे समणे वा समणी वा सावओ वा साविआ वा तच्चित्ते तम्मणे तल्लेसे तदंज्झवमिए
 तत्तिवज्झवसाणे तदट्ठोवउत्ते तदप्पिअकरणे तब्भावणाभाविए अण्णत्थ कत्थइ मणं अकरेमाणे उभओ कालं आवस्सयं करेंति
 से तं लोगुत्तरियं भावावस्सयं, से तं नोआगमतो भावावस्सयं, से तं भावावस्सयं (सू० २७) तस्स णं इमे एगट्ठिआ णाणा-
 घोसा णाणावंजणा णामधेज्जा भवंति, तंजहा-आवस्सयं अवस्संकरणिज्जं धुवनिग्गहो विसोही अ । अज्झयणल्लक्कवग्गो नाओ
 आराहणामग्गो ॥१॥ (२) समणेणं सावएण य अवस्सकायव्वयं हवइ जम्हा । अंतो अहोनिस्सस्स य तम्हा आवस्सयं नाम
 ॥२॥ (३) सेतं आवस्सयं (सू० २८) से किं तं सुतं ? २ चउव्विहं पण्णत्तं तंजहा-नामसुअं ठवणासुअं दव्वसुअं भावसुअं (सू०
 २९) से किं तं नामसुअं ? २ जस्स णं जीवस्स वा जाव सुएत्ति नामं कज्जइ से तं नामसुअं (सू० ३०) से किं तं ठवणा
 सुअं ? जं णं कट्ठकम्मे वा जाव ठवणा ठविज्जइ से तं ठवणा सुअं । नाम ठवणाणं को पइविसेसो ? नाम आवकहिअं ठवणा
 इत्तरिआ वा होज्जा आवकहिआ वा (सू० ३१) से किं तं दव्वसुअं ? २ दुविहं पण्णत्तं, तंजहा-आगमतो अ नोआगमतो अ
 (सू० ३२) से किं तं आगमतो दव्वसुअं ? २ जस्स णं सुएत्ति पयं सिक्खियं ठियं जियं जाव णो अणुप्पेहाए, कम्हा ? अणु-
 वओगो दव्वमिति कट्ठु, नेगमस्स णं एगो अणुवउत्तो आगमतो एगं दव्वसुअं जाव कम्हा ? जइ जाणए अणुवउत्ते न भवइ ।
 से तं आगमतो दव्वसुअं (सू० ३३) से किं तं नोआगमतो दव्वसुअं ? २ तिविहं पण्णत्तं, तंजहा-जाणयसरीरदव्वसुअं भविअ-

सरीरद्वसुअं जाणयसरीरभविअसरीरवइरित्तं द्वसुअं (सू० ३४) से किं तं जाणयसरीरद्वसुअं ? २ सुअत्तिपयत्थाहिगार-
जाणयस्स जं सरीरयं ववगयचुअचाविअचत्तदेहं तं चेव पुव्वभणिअं भाणिअव्वं जाव से तं जाणयसरीरद्वसुअं (सू० ३५) से
किं तं भविअसरीरद्वसुअं ? २ जे जीवे जोणीजम्मणनिक्खंते जहा दवावस्सए तहा भाणियव्वं जाव से तं भविअसरीरद्व-
सुअं (सू० ३६) से किं तं जाणयसरीरभविअसरीरवइरित्तं द्वसुअं ? २ पत्तयपोत्थयलिहिअं, अहवा जाणयसरीरभविअसरी-
रवइरित्तं द्वसुअं पंचविहं पण्णत्तं, तंजहा-अंडयं बोंडयं कीडयं बालयं वागयं, अंडयं हंसगम्भादि, बोंडयं कप्पाममाइ,
कीडयं पंचविहं पण्णत्तं, तंजहा-पट्टे मलए अंसुए चीणंसुए किमिरागे, बालयं पंचविहं पण्णत्तं, तंजहा-उण्णिए उट्ठिए
मिअलोमिए कोतवे किट्ठिसे, वागयं सणमाइ से तं जाणयसरीरभविअसरीरवइरित्तं द्वसुअं, से तं नो आगमतो द्वसुअं, से
तं द्वसुअं (सू० ३७) से किं तं भावसुअं ? २ दुविहं पण्णत्तं, तंजहा-आगमतो अ नोआगमतो अ (सू० ३८) से किं
तं आगमतो भावसुअं ? २ जाणए उवउत्ते, से तं आगमतो भावसुअं (सू० ३९) से किं तं नोआगमतो भावसुअं ? २
दुविहं पण्णत्तं, तंजहा-लोइअं लोगुत्तरिअं च (सू० ४०) से किं तं लोइअं नोआगमतो भावसुअं ? २ जं इमं अण्णाणि-
एहिं मिच्छदिट्ठीहिं सच्छंदबुद्धिमइविगप्पियं, तंजहा-भारहं रामायणं भीमासुरुक्कं कोडिल्लयं घोडयमुहं सगडभदिआ उ
कप्पासिअं णागसुहुमं कणगसत्तरी वेसियं वइसेसियं बुद्धसामणं काविलं लोगायतं सट्ठियंतं माढरपुराणवागरणनाडगाइ,
अहवा बावत्तरिकलाओ चत्तारि वेआ संगोवंगा, से तं लोइयं नोआगमतो भावसुअं (सू० ४१) से किं तं लोउत्तरिअं नो
आगमतो भावसुअं ? २ जं इमं अरिहंतेहिं भगवंतेहिं उप्पण्णणाणदंसणधरेहिं तीयपच्चुप्पण्णमणागयजाणएहिं सवण्णूहिं सव-

दरिसीहिं तिलुकवहितमहितपूइएहिं अप्पडिहयवरणाणदंमणधरेहिं पणीयं दुवालसंगं गणिपिडगं, तंजहा-आयारो सूअगडो
 ठाणं समवाओ विवाहपण्णत्ती नायाधम्मकहाओ उवासगदसाओ अंतगडदसाओ अणुत्तरोववाइअदसाओ पण्हावागरणाइं
 विवागसुअं दिट्ठीवाओ य, से तं लोउत्तरियं नोआगमतो भावसुअं, से तं नोआगमतो भावसुअं, से तं भावसुअं (सू० ४२)
 तस्स णं इमे एगट्ठिआ णाणाघोसा णाणावंजणा नामधेज्जा भवन्ति, तंजहा-सुअसुत्तगंथसिद्धंतसासणे आणवयण उवएसे ।
 पञ्चवण आगमेऽवि अ एगट्ठा पञ्जवा सुत्ते ॥ १ ॥ (४) से तं सुअं (सू० ४३) से किं तं खंधे ? २ चउट्ठिहे पण्णत्ते तंजहा-
 नामखंधे ठवणाखंधे दवखंधे भावखंधे (सू० ४४) नामट्ठवणाओ पुव्वभणिआणुकमेण भाणिअवाओ (सू० ४५) से किं तं
 दवखंधे ? २ दुविहे पण्णत्ते, तंजहा-आगमतो अ नोआगमतो अ, से किं तं आगमओ दवखंधे ? २ जस्स णं खंधेत्ति पयं
 सिक्खियं सेसं जहा दवावस्सए तहा भाणिअवं, नवरं खंधाभिलावो जाव से किं तं जाणयसरीरभविअसरीरवइरित्ते दवखंधे ?,
 २ तिविहे पण्णत्ते तंजहा-सच्चित्ते अचित्ते मीसए (सू० ४६) से किं तं सच्चित्ते दवखंधे ? २ अणेगविहे पण्णत्ते तंजहा-
 हयखंधे गयखंधे किन्नरखंधे किंपुरिसखंधे महोरगखंधे गंधवखंधे उसभखंधे से तं सच्चित्ते दवखंधे (सू० ४७) से किं तं
 अचित्ते दवखंधे ? २ अणेगविहे पण्णत्ते तंजहा-दुपएसिए तिपएसिए जाव दसपएसिए संखिज्जपएसिए असंखिज्जपएसिए
 अणंतपएसिए से तं अचित्ते दवखंधे (सू० ४८) से किं तं मीसए दवखंधे ? २ अणेगविहे पण्णत्ते, तंजहा-सेणाए अग्गिमे
 खंधे सेणाए मज्झिमे खंधे सेणाए पच्छिमे खंधे से तं मीसए दवखंधे (सू० ४९) अहवा जाणयसरीरभविअसरीरवइरित्ते दव-
 खंधे तिविहे पण्णत्ते, तंजहा-कसिणखंधे अकसिणखंधे अणेगदवियखंधे (सू० ५०) से किं तं कसिणखंधे ? २ से चेव हय-

क्खंथे गयखंथे जाव उसभखंथे, से तं कसिणखंथे (सू० ५१) से किं तं अकसिणखंथे ? २ सो चेव दुपएसियाइखंथे जाव अणंतपएसिएखंथे से तं अकसिणखंथे (सू० ५२) से किं तं अणेगदवियखंथे ? तस्स चेव देसे अवचिए तस्स चेव देसे उवचिए, से तं अणेगदविअखंथे, से तं जाणयसरीरभवियसरीरवइरित्ते दव्वखंथे, से तं नोआगमओ दव्वखंथे, से तं दव्वखंथे (सू० ५३) से किं तं भावखंथे ? २ दुविहे पणत्ते तंजहा-आगमओ अ नोआगमओ अ (सू० ५४) से किं तं आगमओ भावखंथे ? २ जाणए उवउत्ते, से तं आगमओ भावखंथे (सू० ५५) से किं तं नोआगमओ भावखंथे ? एएसिं चेव सामाइअमाइयाणं छण्हं अज्झयणाणं समुदयसमिइसमागमेणं आवस्सयसुअखंथे भावखंथेत्ति लब्भइ, से तं नोआगमओ भावखंथे, से तं भावखंथे (सू० ५६) तस्स णं इमे एगट्ठिया णाणाघोसा णाणावंजणा नामधेज्जा भवंति, तंजहा-गण काए अ निकाए खंथे वग्गे तहेव रासी अ । पुंजे पिंडे निगरे संघाए आउल समूहे ॥ १ ॥ (५) से तं खंथे (सू० ५७) आवस्सगस्स णं इमे अत्थाहिगारा भवंति तंजहा-सावज्जजोगविरई उक्कित्तण गुणवओ अ पडिचत्ती । खलिअस्स निंदणा वणतिगिच्छ गुणधारणा चेव ॥ १ ॥ (सू० ५८) आवस्सयस्स एसो पिंडत्थो वणिओ समासेणं । एत्तो एकेकं पुण अज्झयणं कित्तइस्सामि ॥ १ ॥ (७) तंजहा-सामाइअं चउवीसत्थोओ वंदणयं पडिकमणं काउस्सग्गो पच्चक्खाणं । तत्थ पढमं अज्झयणं सामाइयं, तस्स णं इमे चत्तारि अणुओगदारा भवंति तंजहा-उवक्कमे १ निक्खेवे २ अणुगमे ३ नए ४ (सू० ५९) से किं तं उवक्कमे ? २ छविहे पणत्ते, तंजहा णामोवक्कमे ठवणोवक्कमे दव्वोवक्कमे खेत्तोवक्कमे कालोवक्कमे भावोवक्कमे, नामठवणाओ गयाओ, से किं तं दव्वोवक्कमे ? २ दुविहे पणत्ते, तंजहा-आगमओ अ नोआगमओ अ जाव जाणगसरीरभवियसरीरवइरित्ते दव्वो-

वकमे तिविहे पण्णत्ते तंजहा-सचित्ते अचित्ते मीसए (सू० ६०) से किं तं सचित्ते दवोवकमे ? २ तिविहे पण्णत्ते तंजहा-
 दुपए चउप्पए अपए एकिके पुण दुविहे पण्णत्ते, तंजहा-परिकमे अ वत्थुविणासे अ (स० ६१) से किं तं दुपए उवकमे ? २
 नडाणं नट्टाणं जल्लाणं मल्लाणं मुट्ठियाणं वेलंबगाणं कहगाणं पवगाणं लासगाणं आइक्खगाणं लंखाणं मंखाणं तूणइल्लाणं तुंब-
 वीणियाणं कावोयाणं मागहाणं, से तं दुपए उवकमे (सू० ६२) से किं तं चउप्पए उवकमे ? २ चउप्पयाणं आसाणं हत्थीणं
 इच्चाइ, से तं चउप्पए उवकमे (सू० ६३) से किं तं अपए उवकमे ? २ अपयाणं अंबाणं अंबाडगाणं इच्चाइ, से तं अपओ-
 वकमे, से तं सचित्तदवोवकमे (सू० ६४) से किं तं अचित्तदवोवकमे ? २ खंडाईणं गुडाईणं मच्छंडीणं, से तं अचित्त-
 दवोवकमे (सू० ६५) से किं तं मीसए दवोवकमे ? २ से चेव थासगआयंसगाइमंडिए आसाइ, से तं मीसए दवोवकमे, से तं
 जाणयसरोरभविअसरीरवइरित्ते दवोवकमे, से तं नोआगमओ दवोवकमे, से तं दवोवकमे (सू० ६६) से किं तं खेत्तोवकमे ?
 २ जणं हलकुलिआईहिं खेत्ताइं उवकमिजंति, से तं खेत्तोवकमे (सू० ६७) से किं तं कालोवकमे ? २ जं णं नालिआईहिं
 कालस्सोवकमणं कीरइ, से तं कालोवकमे (सू० ६८) से किं तं भावोवकमे ? २ दुविहे पण्णत्ते तंजहा-आगमओ अ
 नोआगमओ अ, आगमओ जाणए उवउत्ते, नोआगमओ दुविहे पण्णत्ते, तंजहा-पसत्थे अ अपसत्थे अ तत्थ अपसत्ते
 डोडिणिगणिआअमच्चाईणं पसत्थे गुरुमाईणं, से तं नोआगमओ भावोवकमे, से तं उवकमे (सू० ६९) अहवा उवकमे छविहे
 पण्णत्ते, तंजहा-आणुपुवी १ नामं २ पमाणं ३ वत्तवया ४ अत्थाहिगारे ५ समोआरे ६ (सू० ७०) से किं तं आणुपुवी ?
 २ दसविहा पण्णत्ता तंजहा-नामाणुपुवी १ ठवणाणुपुवी २ दवाणुपुवी ३ खेत्ताणुपुवी ४ कालाणुपुवी ५ उक्किताणुपुवी ६

अनुयोग

द्वार-

॥ ५ ॥

गणणाणुपुवी ७ संठाणाणुपुवी ८ सामाआरीआणुपुवी ९ भावाणुपुवी १० (सू० ७१) नामठवणाओ गयाओ, से किं तं द्वाणुपुवी ? २ दुविहा पणत्ता, तंजहा-आगमओ अ नोआगमओ अ । से किं तं आगमओ द्वाणुपुवी ? २ जस्स णं आणुपुवीत्ति पयं सिक्खिअं ठियं जियं मियं परिजियं जाव नो अणुप्पेहाए, कम्हा ? अणुवओगो द्वामिति कट्ठु, णेगमस्स णं एगो अणुवउत्तो आगमओ एगा द्वाणुपुवी जाव कम्हा ? जइ जाणए अणुवउत्ते न भवइ, से तं आगमओ द्वाणुपुवी । से किं तं नोआगमओ द्वाणुपुवी ? २ तिविहा पणत्ता तंजहा-जाणयसरीरद्वाणुपुवी भविअसरीरद्वाणुपुवी जाणयसरीरभविअसरीरवइरित्ता द्वाणुपुवी । से किं तं जाणयसरीरद्वाणुपुवी ? २ पयत्थाहिगारजाणयस्स जं सरीरयं ववगयच्चुयचावियचत्तदेहं सेसं जहा द्वावस्सए तहा भाणिअवं जाव से तं जाणयसरीरद्वाणुपुवी । से किं तं भविअसरीरद्वाणुपुवी ? २ जे जीवे जोणीजम्मण-निक्खंते सेसं जहा द्वावस्सए जाव से तं भविअसरीरद्वाणुपुवी । से किं तं जाणयसरीरभविअसरीरवइरित्ता द्वाणुपुवी ? २ दुविहा पणत्ता, तंजहा-उवणिहिआ य अणोवणिहिआ य, तत्थ णं जा सा उवणिहिया सा ठप्पा, तत्थ णं जा सा अणोवणिहिआ सा दुविहा पणत्ता, तंजहा-नेगमववहाराणं संगहस्स य (सू० ७२) से किं तं नेगमववहाराणं अणोवणिहिआ द्वाणुपुवी ? २ पंचविहा पणत्ता, तंजहा-अट्ठपयरूवणया १ भंगसमुक्कित्तणया २ भंगोवदंसणया ३ समोआरे ४ अणुगमे ५ (सू० ७३) से किं तं नेगमववहाराणं अट्ठपयरूवणया ? २ तिपएसिए आणुपुवी चउप्पएसिए आणुपुवी जाव दसपएसिए आणुपुवी संखेज्जपएसिए आणुपुवी असंखिज्जपएसिए आणुपुवी अणंतपएसिए आणुपुवी, परमाणुपोग्गले अणाणुपुवी, दुपएसिए अवत्तवए, तिपएसिआ आणुपुवीओ जाव अणंतपएसिआओ आणुपुवीओ, परमाणुपोग्गला अणाणुपुवीओ दुपएसिआइं

सूत्रम्.

॥ ५ ॥

अवत्तवयाइं, से तं नेगमववहाराणं अट्टपयपरूवणया (सू० ७४) एआए णं नेगमववहाराणं अट्टपयपरूवणयाए किं पओअणं ? एआए णं नेगमववहाराणं अट्टपयपरूवणयाए भंगसमुक्कित्तणया कज्जइ (सू० ७५) से किं तं नेगमववहाराणं भंगसमुक्कित्तणया ? २ अत्थि आणुपुद्दी १ अत्थि अणाणुपुद्दी २ अत्थि अवत्तवए ३ अत्थि आणुपुद्दीओ ४ अत्थि अणाणुपुद्दीओ ५ अत्थि अवत्तवयाइं ६ । अहवा अत्थि आणुपुद्दी अ अणाणुपुद्दी अ १, अहवा अत्थि आणुपुद्दी अ अणाणुपुद्दीओ अ २, अहवा अत्थि आणुपुद्दीओ अ अणाणुपुद्दी अ ३, अहवा अत्थि आणुपुद्दीओ अ आणाणुपुद्दीओ अ ४, अहवा अत्थि आणुपुद्दी अ अवत्तवए अ ५, अहवा अत्थि आणुपुद्दी अ अवत्तवयाइं च ६, अहवा अत्थि आणुपुद्दीओ अ अवत्तवए अ ७, अहवा अत्थि आणुपुद्दीओ अ अवत्तवयाइं च ८, अहवा अत्थि अणाणुपुद्दी अ अवत्तवए अ ९, अहवा अत्थि अणाणुपुद्दी अ अवत्तवयाइं च १०, अहवा अत्थि अणाणुपुद्दीओ अ अवत्तवए अ ११, अहवा अत्थि अणाणुपुद्दीओ अ अवत्तवयाइं च १२ । अहवा अत्थि आणुपुद्दी अ अणाणुपुद्दी अ अवत्तवए अ १, अहवा अत्थि आणुपुद्दी अ अणाणुपुद्दी अ अवत्तवयाइं च २, अहवा अत्थि आणुपुद्दी अ अणाणुपुद्दीओ अ अवत्तवए अ ३, अहवा अत्थि आणुपुद्दी अ अणाणुपुद्दीओ अ अवत्तवयाइं च ४, अहवा अत्थि आणुपुद्दीओ अ अणाणुपुद्दी अ अवत्तवए अ ५, अहवा अत्थि आणुपुद्दीओ अ अणाणुपुद्दी अ अवत्तवयाइं च ६, अहवा अत्थि आणुपुद्दीओ अ अणाणुपुद्दीओ अवत्तवए अ ७, अहवा अत्थि आणुपुद्दीओ अ अणाणुपुद्दीओ अ अवत्तवयाइं च ८, एए अड भंगा । एवं सब्बेऽपि छद्दीसं भंगा । से तं नेगमववहाराणं भंगसमुक्कित्तणया (सू० ७६) एआए णं नेगमववहाराणं भंगसमुक्कित्तणयाए किं पओअणं ? एआए णं नेगमववहाराणं भंगसमुक्कित्तणयाए भंगोवदंसणया कीरइ (सू० ७७) से किं तं नेगमववहाराणं

भंगोवदंसणया ? २ तिपएसिए आणुपुवी १, परमाणुपोग्गले अणाणुपुवी १ दुपएसिए अवत्तवए २, अहवा तिपएसिया आणु-
पुवीओ परमाणुपोग्गला अणाणुपुवीओ दुपएसिया अवत्तवयाइं ३, अहवा तिपएसिए अ परमाणुपुग्गले अ आणुपुवी अ अणा-
णुपुवी अ ४ चउभंगो, अहवा तिपएसिए य दुपएसिए अ आणुपुवी अ अवत्तवए य चउभंगो, अहवा परमाणुपोग्गले य दुप-
एसिए य अणाणुपुवी य अवत्तवए य चउभंगो १२, अहवा तिपएसिए अ परमाणुपोग्गले अ दुपएसिए अ आणुपुवी अ अणा-
णुपुवी अ अवत्तवए अ १, अहवा तिपएसिए अ परमाणुपोग्गले अ दुपएसिआ य आणुपुवी अ अणाणुपुवी अ अवत्तवयाइं च २
अहवा तिपएसिए अ परमाणुपुग्गला अ दुपएसिए य आणुपुवी अ अणाणुपुवीओ अ अवत्तवए अ ३, अहवा तिपएसिए अ परमा-
णुपोग्गला य दुपएसिया अ आणुपुवी अ अणाणुपुवीओ अ अवत्तवयाइं च ४, अहवा तिपएसिएआ य परमाणुपोग्गले अ दुपएसिए
य आणुपुवीओ अ अणाणुपुवीओ अ अवत्तवए अ ५, अहवा तिपएसिआ य परमाणुपोग्गले अ दुपएसिए य अणाणुपुवीओ अ अणा-
णुपुवी अ अवत्तवयाइं च ६, अहवा तिपएसिआ य परमाणुपोग्गला य दुपएसिए य आणुपुवीओ अ अणाणुपुवीओ य अवत्तवए य
७, अहवा तिपएसिआ य परमाणुपोग्गला अ दुपएसिआ अ आणुपुवीओ अ अणाणुपुवीओ अ अवत्तवयाइं च ८। से तं नेगमववहा-
राणं भंगोवदंसणया (सू० ७८) से किं तं समोअरे ? २ नेगमववहाराणं आणुपुवीदवाइं कहिं समोअरंति ? किं आणुपुवीदवेहिं समो-
अरंति ? अणाणुपुवीदवेहिं समोअरंति ? अवत्तवयदवेहिं समोअरंति ? नेगमववहाराणं आणुपुवीदवाइं आणुपुनीदवेहिं समोअरंति नो
अणाणुपुवीदवेहिं समोअरंति नो अवत्तवयदवेहिं समोअरंति, नेगमववहाराणं अणाणुपुवीदवाइं कहिं समोअरंति किं आणुपुवी-
दवेहिं समोअरंति ? अणाणुपुवीदवेहिं समोअरंति ? अवत्तवयदवेहिं समोअरंति ? नो आणुपुवीदवेहिं समोअरंति अणाणुपु-

वीदवेहिं समोअरंति नो अवत्तवयदवेहिं समोअरंति, नेगमववहाराणं अवत्तवयदवाइं कंहिं समोअरंति, ? किं आणुपुवीदवेहिं
 समोअरंति ? अणाणुपुवीदवेहिं समोअरंति ? अवत्तवयदवेहिं समोअरंति ? नो आणुपुवीदवेहिं समोअरंति नो अणाणुपुवीदवेहिं
 समोअरंति अवत्तवयदवेहिं समोअरंति । से तं समोआरे (सू० ७९) से किं तं अणुगमे ? २ नवविहे पणत्ते, तंजहा-संतप-
 यपरूवणया ? दवपमाणं च २ खित्त ३ फुसणा य ४ । कालो य ५ अंतरं ६ भाग ७ भाव ८ अप्पावहुं चेव ॥ १ ॥
 (सू० ८०) नेगमववहाराणं आणुपुवीदवाइं किं अत्थि णत्थि ? णियमा अत्थि, नेगमववहाराणं अणाणुपुवीदवाइं किं अत्थि
 णत्थि ? णियमा अत्थि, नेगमववहाराणं अवत्तवगदवाइं किं अत्थि णत्थि ? नियमा अत्थि (सू० ८१) नेगमववहाराणं आणु-
 पुवीदवाइं किं संखिज्जाइं असंखिज्जाइं अणंताइं ?, नो संखिज्जाइं नो असंखिज्जाइं अणंताइं, एवं अणाणुपुवीदवाइं अवत्तवगद-
 वाइं च अणंताइं भाणिअवाइं (सू० ८२) नेगमववहाराणं आणुपुवीदवाइं लोगस्स किं संखिज्जइभागे होज्जा असंखिज्जइभागे
 होज्जा संखेज्जेसु भागेषु होज्जा असंखेज्जेसु भागेषु होज्जा सवल्लोए होज्जा ?, एवं दवं पडुच्च संखेज्जइभागे वा होज्जा असंखेज्जइ-
 भागे वा होज्जा संखेज्जेसु भागेषु वा होज्जा असंखिज्जेसु भागेषु वा होज्जा सवल्लोए वा होज्जा, णाणादवाइं पडुच्च नियमा
 सवल्लोए होज्जा । नेगमववहाराणं अणाणुपुवीदवाइं किं लोअस्स संखिज्जइभागे होज्जा जाव सवल्लोए वा होज्जा ?, एगं दवं
 पडुच्च नो संखेज्जइभागे होज्जा असंखिज्जइभागे होज्जा नो संखेज्जेसु भागेषु होज्जा नो असंखेज्जेसु भागेषु होज्जा नो सवल्लोए
 होज्जा, णाणादवाइं पडुच्च नियमा सवल्लोए होज्जा, एवं अवत्तवगदवाइं भाणिअवाइं (सू० ८३) नेगमववहाराणं आणुपुवीदवाइं
 लोगस्स किं संखेज्जइभागं फुसंति असंखेज्जइभागं फुसंति संखेज्जे भागे फुसंति असंखेज्जे भागे फुसंति सवल्लोणं फुसंति ?

एगं दवं पडुच्च लोगस्स संखेज्जइभागं वा फुसंति जाव सवलोगं वा फुसंति ?, णाणादद्वाइं पडुच्च नियमा सवलोगं फुसंति । णेगमववहाराणं अणाणुपुवीदद्वाइं लोअस्स किं संखेज्जइभागं फुसंति जाव सवलोगं फुसंति ?, एगं दवं पडुच्च नो संखिज्जइभागं फुसंति असंखिज्जइभागं फुसंति नो संखिजे भागे फुसंति नो असंखिजे भागे फुसंति नो सवलोअं फुसंति, नाणादद्वाइं पडुच्च नियमा सवलोअं फुसंति, एवं अवत्तवगदद्वाइं भाणिअद्वाइं (सू० ८४) णेगमववहाराणं आणुपुवीदद्वाइं कालओ केवच्चिरं होइ ? एगं दवं पडुच्च जहण्णेणं एगं समयं उक्कोसेणं असंखेज्जं कालं, णाणादद्वाइं पडुच्च णियमा सवद्वा अणाणुपुवीदद्वाइं अवत्तवगदद्वाइं च एवं चेव भाणिअद्वाइं (सू० ८५) णेगमववहाराणं आणुपुवीदद्वाणं अंतरं कालओ केवच्चिरं होइ ? एगं दवं पडुच्च जहण्णेणं एगं समयं उक्कोसेणं अणंतं कालं, नाणादद्वाइं पडुच्च णत्थि अंतरं । णेगमववहाराणं अणाणुपुवीदद्वाणं अंतरं कालओ केवच्चिरं होइ ? एगं दवं पडुच्च जहण्णेणं एगं समयं उक्कोसेणं असंखेज्जं कालं, नाणादद्वाइं पडुच्च णत्थि अंतरं । णेगमववहाराणं अवत्तवगदद्वाणं अंतरं कालओ केवच्चिरं होइ ? एगं दवं पडुच्च जहण्णेणं एगं समयं उक्कोसेणं अणंतं कालं, नाणादद्वाइं पडुच्च णत्थि अंतरं (सू० ८६) णेगमववहाराणं आणुपुवीदद्वाइं सेसदद्वाणं कइभागे होज्जा किं संखिज्जइभागे होज्जा असंखिज्जइभागे होज्जा संखेजेसु भागेषु होज्जा असंखेजेसु भागेषु होज्जा ? नो संखिज्जइभागे होज्जा नो असंखिज्जइभागे होज्जा नो संखेजेसु भागेषु होज्जा नियमा असंखेजेसु भागेषु होज्जा । णेगमववहाराणं अणाणुपुवीदद्वाइं सेसदद्वाणं कइभागे होज्जा ? किं संखिज्जइभागे होज्जा असंखिज्जइभागे होज्जा संखेजेसु भागेषु होज्जा असंखेजेसु भागेषु होज्जा ? नो संखेज्जइभागे होज्जा नो असंखेज्जइभागे होज्जा नो संखेजेसु भागेषु होज्जा नो असंखेजेसु भागेषु होज्जा । एवं अवत्तवगदद्वाणि भाणिअद्वाणि (सू० ८७)

णेगमववहाराणं आणुपुव्वीदवाइं कतरंमि भावे होजा ? किं उदइए भावे होजा उवसमिए भावे होजा खइए भावे होजा खओ-
 वसमिए भावे होजा पारिणामिए भावे होजा संनिवाइए भावे होजा ? णियमा साइपारिणामिए भावे होजा, अणाणुपुव्वीद-
 व्वाणि अवत्तवगदव्वाणि अ एवं चेव भाणिअव्वाणि (सू० ८८) एएसि णं भंते ? णेगमववहाराणं आणुपुव्वीदवाणं अणाणुपुव्वीद-
 व्वाणं अवत्तवगदव्वाण य दव्वट्ठयाए पएसट्ठयाए दव्वट्ठपएसट्ठयाए कयरे कयरेहिंतो अप्पा वा बहुया वा तुल्ला वा विसेसहिआ
 वा ? गोयमा ! सव्वत्थोवाइं णेगमववहाराणं अवत्तवगदवाइं दव्वट्ठयाए अणाणुपुव्वीदवाइं दव्वट्ठयाए विसेसाहिआइं आणुपुव्वी-
 दवाइं दव्वट्ठयाए असंखेज्जगुणाइं, पएसट्ठयाए णेगमववहाराणं सव्वत्थोवाइं अणाणुपुव्वीदवाइं अपएसट्ठयाए अवत्तवगदवाइं पएस-
 ट्ठयाए विसेसाहिआइं आणुपुव्वीदवाइं पएसट्ठयाए अणंतगुणाइं, दव्वट्ठपएसट्ठयाए सव्वत्थोवाइं णेगमववहाराणं अवत्तवगदवाइं
 दव्वट्ठययाए अणाणुपुव्वीदवाइं दव्वट्ठयाए अपएसट्ठयाए विसेसाहिआइं अवत्तवगदवाइं पएसट्ठयाए विसेसाहिआइं आणुपुव्वीदवाइं
 दव्वट्ठयाए असंखेज्जगुणाइं ताइं चेव पएसट्ठयाए अणंतगुणाइं, से तं अणुगमे, से तं नेगमववहाराणं अणोवणिहिआ दवाणुपुव्वी
 (सू० ८९) से किं तं संगहस्स अणोवणिहिआ दवाणुपुव्वी ? २ पंचविहा पणत्ता, तंजहा-अट्ठपयपरूवणया ? भंगसमुक्कि-
 त्तणया ? भंगोवदंसणया ३ समोआरे ४ अणुगमे ५ (सू० ९०) से किं तं संगहस्स अट्ठपयपरूवणया ? २ तिपएसिए आणु-
 पुव्वी चउप्पएसिए आणुपुव्वी जाव दसपएसिए आणुपुव्वी संखिज्जपएसिए आणुपुव्वी असंखिज्जपएसिए आणुपुव्वी अणंतपएस-
 सिए आणुपुव्वी परमाणुपोग्गले अणाणुपुव्वी दुपएसिए अवत्तवए, से तं संगहस्स अट्ठपयपरूवणया (सू० ९१) एआए णं
 संगहस्स अट्ठपयपरूवणयाए किं पओअणं ? एआए णं संगहस्स अट्ठपयपरूवणयाए संगहस्स भंगसमुक्कित्तणया कज्जइ । से

किं तं संगहस्स भंगसमुक्कित्तणया ? २ अत्थि आणुपुव्वी १ अत्थि अणाणुपुव्वी २ अत्थि अवत्तव्वए ३, अहवा अत्थि आणुपुव्वी अ अणाणुपुव्वी अ ४, अहवा अत्थि आणुपुव्वी अ अवत्तव्वए अ ५, अहवा अत्थि अणाणुपुव्वी अ अवत्तव्वए अ ६, अहवा अत्थि आणुपुव्वी अ अणाणुपुव्वी अ अवत्तव्वए अ ७, एवं सत्त भंगा, से तं संगहस्स भंगसमुक्कित्तणया ॥ एआए णं संगहस्स भंगसमुक्कित्तणयाए किं पओयणं ? एयाए णं संगहस्स भंगसमुक्कित्तणयाए संगहस्स भंगोवदंसणया कीरइ (सू० ९२) से किं तं संगहस्स भंगोवदंसणया ? २ तिपएसिया आणुपुव्वी परमाणुपोग्गला अणाणुपुव्वी दुपएसिया अवत्तव्वए, अहवा तिपएसिया य परमाणुपोग्गला य आणुपुव्वी य अणाणुपुव्वी य अहवा तिपएसिया य दुपएसिया य आणुपुव्वी य अवत्तव्वए य अहवा परमाणुपोग्गला य दुपएसिया य अणाणुपुव्वी य अवत्तव्वए य अहवा तिपएसिया य परमाणुपोग्गला य दुपएसिया य आणुपुव्वी य अणाणुपुव्वी य अवत्तव्वए य, से तं संगहस्स भंगोवदंसणया (सू० ९३) से किं तं संगहस्स समोयारे ? २ संगहस्स आणुपुव्वीदवाइं कहिं समोयरंति ? किं आणुपुव्वीदवेहिं समोयरंति ? अणाणुपुव्वीदवेहिं समोयरंति ? अवत्तव्वगदवेहिं समोयरंति ? संगहस्स आणुपुव्वीदवाइं आणुपुव्वीदवेहिं समोयरंति नो अणाणुपुव्वीदवेहिं समोयरंति नो अवत्तव्वगदवेहिं समोयरंति, एवं दोन्निवि सट्ठाणे सट्ठाणे समोयरंति, से तं समोयारे (सू० ९४) से किं तं अणुगमे ? २ अट्ठविहे पन्नत्ते तंजहा-संतपय-परूवणया दव्वपमाणं च खित्तफुसणा य । कालौ य अंतरं भाग भावे अप्पाबहुं नत्थि ॥ १ ॥ संगहस्स आणुपुव्वीदवाइं किं अत्थि णत्थि ? नियमा अत्थि, एवं दोन्निवि । संगहस्स आणुपुव्वीदवाइं किं संखिज्जाइं असंखेज्जाइं अणंताइं ?, नो संखेज्जाइं नो असंखेज्जाइं नो अणंताइं नियमा एगो रासी, एवं दोन्निवि । संगहस्स आणुपुव्वीदवाइं लोगस्स कइभागे होज्जा ? किं

संखेजइभागे होजा असंखेजइभागे होजा संखेजेसु भागेसु होजा असंखेजेसु भागेसु होजा सबलोए होजा ? नो संखेजइ-
 भागे होजा नो असंखेजइभागे होजा नो संखेजेसु भागेसु होजा नो असंखेजेसु भागेसु होजा नियमा सबलोए होजा, एवं
 दोन्निवि । संगहस्स आणुपुवीदवाइं लोगस्स किं संखेजइभागं फुसंति असंखेजइ भागं फुसंति संखिजे भागे फुसंति असंखिजे
 भागे फुसंति सबलोगं फुसंति ? नो संखेजइभागं फुसंति जाव नियमा सबलोगं फुसंति, एवं दोन्निवि । संगहस्स आणुपुवी-
 दवाइं कालओ केवच्चिरं होंति ? सबद्धा, एवं दोण्णिवि । संगहस्स आणुपुवीदवाणं कालतो केवच्चिरं अंतरं होंति ? नत्थि
 अंतरं, एवं दोण्णि वि । संगहस्स आणुपुवीदवाइं सेसदवाणं कइभागे होजा ? किं संखेजइभागे होजा असंखेजइभागे
 होजा संखेजेसु भागेसु होजा असंखेजेसु भागेसु होजा ? नो संखेजइभागे होजा नो असंखेजइभागे होजा नो संखेजेसु
 भागेसु होजा नो असंखेजेसु भागेसु होजा नियमा तिभागे होजा, एवं दोन्निवि । संगहस्स आणुपुवीदवाइं कयरंमि भावे
 होजा ? नियमा साइपारिणामिए भावे होजा, एवं दोन्निवि । अप्पाबहुं नत्थि । से तं अणुगमे, से तं संगहस्स अणोवणि-
 हिया दवाणुपुवी, से तं अणोवणिहिया दवाणुपुवी (सू० ९५) से किं तं उवणिहिया दवाणुपुवी ? २ तिविहा पन्नत्ता,
 तंजहा-पुवाणुपुवी पच्छाणुपुवी अणाणुपुवी य (सू० ९६) से किं तं पुवाणुपुवी ? २ धम्मत्थिकाए अधम्मत्थिकाए आगास-
 त्थिकाए जीवत्थिकाए पोग्गलत्थिकाए अद्वासमए, से तं पुवाणुपुवी । से किं तं पच्छाणुपुवी ? २ अद्वासमए पोग्गलत्थिकाए
 जीवत्थिकाए आगासत्थिकाए अहम्मत्थिकाए धम्मत्थिकाए, से तं पच्छाणुपुवी । से किं तं अणाणुपुवी ? २ एयाए चेव
 षमाइआए एगुत्तरिआए छगच्छगयाए सेदीए अण्णमण्णम्भासो दूरूवूणो से तं अणाणुपुवी (सू० ९७) अहवा उवणिहिआ

दद्याणुपुत्री ति विहा ५० तं०-पुत्राणुपुत्री पच्छाणुपुत्री अणाणुपुत्री, से किं तं पुत्राणुपुत्री ? २ परमाणुपोग्गले दुपएसिए तिपएसिए जाव दसपएसिए संखिजपएसिए असंखिजपएसिए अणंतपएसिए से तं पुत्राणुपुत्री । से किं तं पच्छाणुपुत्री ? २ अणंतपएसिए असंखिजपएसिए संखिजपएसिए जाव दसपएसिए जाव तिपएसिए दुपएसिए परमाणुपोग्गले से तं पच्छाणुपुत्री, से किं तं अणाणुपुत्री ? २ एआए चेव एगाइआए एगुत्तरिआए अणंतगच्छगयाए सेठीए अन्नमण्णभासो दुरूवणो से तं अणाणुपुत्री से तं उवणिहिआ दद्याणुपुत्री, से तं जाणगवइरित्ता दद्याणुपुत्री, से तं नोआगमओ दद्याणुपुत्री, से तं दद्याणुपुत्री (सू० ९८) से किं तं खेत्ताणुपुत्री ? २ दुविहा पणत्ता तंजहा-उवणिहिआ य अणोवणिहिया य (सू० ९९) तत्थ णं जा सा उवणिहिआ सा ठप्पा, तत्थ णं जा सा अणोवणिहिआ सा दुविहा पणत्ता तंजहा णेगमववहारणं संगहस्स य (सू० १००) से किं तं णेगमववहारणं अणोवणिहिआ खेत्ताणुपुत्री ? २ पंचविहा पणत्ता तंजहा-अट्ठपयपरूवणया भंगसमुक्कित्तणया भंगोवदंसणया समोआरे अणुगमे, से किं तं णेगमववहारणं अट्ठपयपरूवणया ? २ तिपएसोगाढे आणुपुत्री जाव दसपएसोगाढे आणुपुत्री जाव संखिजपएसोगाढे आणुपुत्री, असंखिजपएसोगाढे आणुपुत्री, एगपएसोगाढे अणाणुपुत्री, दुपएसोगाढे अवतव्वए, तिपएसोगाढा आणुपुत्रीओ जाव दसपएसोगाढा आणुपुत्रीओ जाव असंखिजपएसोगाढा आणुपुत्रीओ एगपएसोगाढा अणाणुपुत्रीओ दुपएसोगाढा अवत्तव्वगाइं, से तं णेगमववहारणं अट्ठपयपरूवणया । एआए णं णेगमववहारणं अट्ठपयपरूवणयाए किं पओअणं ? एयाए णेगमववहारणं अट्ठपयपरूवणयाए णेगमववहारणं, भंगसमुक्कित्तणया कज्जइ । से किं तं णेगमववहारणं भंगसमुक्कित्तणया ? २ अत्थि आणुपुत्री अत्थि अणाणुपुत्री अत्थि अवत्तव्वए एवं दद्याणुपुत्रिगमेणं खेत्ताणुपुत्रीएऽवि ते चेव छवीसं भंगा भाणिअव्वा

जाव से तं णेगमववहाराणं भंगसमुक्कित्तणया । एआए णं णेगमववहाराणं भंगसमुक्कित्तणयाए किं पओअणं ? एआए णं णेग-
मववहाराणं भंगसमुक्कित्तणयाए णेगमववहाराणं भंगोवदंसणया कज्झ । से किं तं णेगमववहाराणं भंगोवदंसणया ? २ तिपए-
सोगाढे आणुपुवी एगपएसोगाढे अणाणुपुवी दुपएसोगाढे अवत्तवए तिपएसोगाढे आणुपुवीओ एगपएसोगाढा अणाणुपुवीओ
दुपएसोगाढा अवत्तवगाइं, अहवा तिपएसोगाढे अ एगपएसोगाढे अ आणुपुवी अ अणाणुपुवी अ एवं तहा चेव द्वाणुपुविग-
मेणं छवीसं भंगा भाणिअवा जाव से तं णेगमववहाराणं भंगोवदंसणया । से किं तं समोआरे ? २ णेगमववहाराणं आणुपुवी-
दवाइं कहिं समोअरंति ? किं आणुपुवीदवेहिं समोअरंति अणाणुपुवीदवेहिं समोअरंति ? अवत्तवगदवेहिं समोअरंति आणुपुवीदवाइं
आणुपुवीदवेहिं समोअरंति नो अणाणुपुवीदवेहिं नो अवत्तवगदवेहिं समोअरंति एवं तिण्णिवि सट्ठाणे समोअरंतित्ति भाणिअवं,
से तं समोआरे । से किं तं अणुगमे ? २ नवविहे पणत्ते, तंजहा-संतपयपरूवणया जप्प अप्पाबहुं चेव ॥१॥ णेगमववहाराणं
आणुपुवीदवाइं किं अत्थि णत्थि ? णियमा अत्थि एवं दुण्णिवि । णेगमववहाराणं आणुपुवीदवाइं किं संखिज्जाइं असंखिज्जाइं
अणंताइं ? नो संखिज्जाइं असंखिज्जाइं नो अणंताइं, एवं दुण्णिवि ॥ णेगमववहाराणं आणुपुवीदवाइं लोगस्स किं संखिज्जइभागे
होज्जा असंखिज्जइभागे होज्जा जाव सबलोए होज्जा ?, एगं दवं पडुच्च लोगस्स संखिज्जइभागे वा होज्जा असंखिज्जइभागे वा होज्जा
संखेज्जेसु असंखेज्जेसु भागेसु वा होज्जा देसुणे वा लोए होज्जा, नाणादवाइं पडुच्च नियमा सबलोए होज्जा, णेगमववहाराणं
अणाणुपुवीदवाणं पुच्छाए एगदवं पडुच्च नो संखिज्जइभागे होज्जा असंखिज्जइभागे होज्जा नो संखेज्जेसु नो असंखेज्जेसु नो सब-
लोए होज्जा, नाणादवाइं पडुच्च नियमा सबलोए होज्जा, एवं अवत्तवगदवाणि भाणिअवाणि ॥ णेगमववहाराणं आणुपुवीदवाइं

लोगस्स किं संखेज्जइभागं फुसंति असंखिज्जइभागं फुसंति संखेजे भागे फुसंति जाव सबलोअंफुसंति? एगं दवं पडुच्च संखिज्जइ-
भागं वा फुसइ संखिज्जइभागे असंखिज्जइभागे संखेजे भागे वा असंखेजे भागे वा देसूणं वा लोगं फुसइ, णाणादवाइं पडुच्च
णियमा सबलोअं फुसंति, अणाणुपुवीदवाइं अवत्तव्वगदवाइं च जहा खेत्तं नवरं फुसणा भाणियवा ॥ णेगमववहारणं आणुपुवी-
दवाइं कालओ केवच्चिरं होइ? एवं तिण्णिवि, एगं दवं पडुच्च जहन्नेणं एगं समयं उक्कोसेणं असंखिज्जं कालं, नाणादवाइं पडुच्च
णियमा सबद्धा ॥ णेगमववहारणं आणुपुवीदवाणमंतरं कालओ केवच्चिरं होइ? तिण्हंपि एगं दवं पडुच्च जहण्णेणं एकं समयं
उक्कोसेणं असंखेज्जं कालं, नाणादवाइं पडुच्च णत्थि अंतरं ॥ णेगमववहारणं आणुपुवीदवाइं सेसदवाणं कइभागे होज्जा?,
तिण्णिवि जहा दवाणुपुवीए ॥ णेगमववहारणं आणुपुवीदवाइं कयरंमि भावे होज्जा? णियमा साइपारिणामिए भावे होज्जा, एवं
दोण्णिवि । एएसि णं भंते? णेगमववहारणं आणुपुवीदवाणं अणाणुपुवीदवाणं अवत्तव्वगदवाणं य दव्वट्ठयाए पएसट्ठयाए दव-
ट्ठपएसट्ठयाए कयरे कयरेहिंतो अप्पा वा बहुआ वा तुल्ला वा विसेसाहिआ वा? गोयमा? सबत्थोवाइं णेगमववहारणं अवत्त-
व्वगदवाइं दव्वट्ठयाए अणाणुपुवीदवाइं दव्वट्ठयाए विसेसाहियाइं आणुपुवीदवाइं दव्वट्ठयाए असंखेज्जगुणाइं, पएसट्ठयाए सबत्थो-
वाइं णेगमववहारणं अणाणुपुवीदवाइं अपएसट्ठयाए अवत्तव्वगदवाइं पएसट्ठयाए विसेसाहियाइं आणुपुवीदवाइं पएसट्ठयाए
असंखेज्जगुणाइं, दव्वट्ठपएसट्ठयाए सबत्थोवाइं णेगमववहारणं अवत्तव्वगदवाइं दव्वट्ठयाए अणाणुपुवीदवाइं दव्वट्ठयाए अपएसट्ठयाए
विसेसाहिआइं अवत्तव्वगदवाइं पएसट्ठयाए विसेसाहियाइं आणुपुवीदवाइं दव्वट्ठयाए असंखेज्जगुणाइं ताइं चेव पएसट्ठयाए असं-
खेज्जगुणाइं, से तं अणुगमे । से तं णेगमववहारणं अणोवणिहिआ खेत्ताणुपुवी (सू० १०१) से किं तं संगहस्स अणोवणिहिया

खेत्ताणुपुवी ? २ पंचविहा पण्णत्ता, संजहा-अट्ठपयपरूवणया मंगसमुक्कित्तणया मंगोवदंसणया समोआरे अणुगमे, से किं तं संगहस्स अट्ठपयपरूवणया ? २ तिपएसोगाढे आणुपुवी चउप्पएसोगाढे आणुपुवी जाव दसपएसोगाढे आणुपुवी संखिअपएसोगाढे आणुपुवी असंखिअपएसोगाढे आणुपुवी एगपएसोगाढे अणाणुपुवी दुपएसोगाढे अवत्तवए, से तं संगहस्स अट्ठपयपरूवणया । एआए णं संगहस्स अट्ठपयपरूवणयाए किं पओअणं ? संगहस्स अट्ठपयपरूवणयाए संगहस्स मंगसमुक्कित्तणया कज्जइ, से किं तं संगहस्स मंगसमुक्कित्तणया ? २ अत्थि आणुपुवी अत्थि अणाणुपुवी अत्थि अवत्तवए, अहवा अत्थि आणुपुवी अ अणाणुपुवी अ, एवं जहा दवाणुपुवीए संगहस्स तहा भाणिअव्वं जाव से तं संगहस्स मंगसमुक्कित्तणया । एआए णं संगहस्स मंगसमुक्कित्तणयाए किं पओअणं ? एआए णं संगहस्स मंगसमुक्कित्तणयाए संगहस्स मंगोवदंसणया कज्जइ, से किं तं संगहस्स मंगोवदंसणया ? २ तिपएसोगाढे आणुपुवी एगपएसोगाढे अणाणुपुवी दुपएसोगाढे अवत्तवए अहवा तिपएसोगाढे अ एगपएसोगाढे अ आणुपुवी अ अणाणुपुवी अ एवं जहा दवाणुपुवीए संगहस्स तहा खेत्ताणुपुवीए वि भाणिअव्वं जाव से तं संगहस्स मंगोवदंसणया । से किं तं समोआरे ? २ संगहस्स आणुपुवीदवाइं कहिं समोअरंति ? किं आणुपुवीदवेहिं समोअरंति अणाणुपुवीदवेहिं अवत्तवगदवेहिं ? तिण्णिवि सट्ठाणे समोअरंति, से तं समोआरे । से किं तं अणुगमे ? २ अट्ठविहे पण्णत्ते, तंजहा-संतपयपरूवणया जाव अप्पावहुं नत्थि ॥ २ ॥ संगहस्स आणुपुवीदवाइं किं अत्थि णत्थि ? नियमा ? अत्थि, एवं तिण्णिवि, सेसगदाराइं जहा दवाणुपुवीए संगहस्स तहा खेत्ताणुपुवीए वि भाणिअव्वं, जाव से तं अणुगमे । से तं संगहस्स अब्बोवणिहिआ खेत्ताणुपुवी । से तं अब्बोवणिहिआ खेत्ताणुपुवी । (ख० १०२) से किं तं उवणिहिआ खेत्ताणुपुवी ? २ तिविहा

पण्णत्ता, तंजहा-पुव्वाणुपुव्वी पच्छाणुपुव्वी अणाणुपुव्वी । से किं तं पुव्वाणुपुव्वी ? २ अहोलोए तिरिअलोए उड्डलोए, से तं पुव्वा-
 णुपुव्वी । से किं तं पच्छाणुपुव्वी ? २ उड्डलोए तिरिअलोए अहोलोए, से तं पच्छाणुपुव्वी । से किं तं अणाणुपुव्वी ? २ एआए
 चेव एगाइआए एगुत्तरिआए तिगच्छगयाए सेटीए अब्भमन्नम्भासो दुरूव्वणो, से तं अणाणुपुव्वी । अहोलोअस्वेत्ताणुपुव्वी तिविहा
 पण्णत्ता, तंजहा-पुव्वाणुपुव्वी पच्छाणुपुव्वी अणाणुपुव्वी । से किं तं पुव्वाणुपुव्वी ? २ रयणप्पभा सक्करप्पभा वालुअप्पभा पंकप्पभा
 धूमप्पभा तमप्पभा तमतमप्पभा, से तं पुव्वाणुपुव्वी । से किं तं पच्छाणुपुव्वी ? २ तमतमा जाव रयणप्पभा, से तं पच्छाणुपुव्वी ।
 से किं तं अणाणुपुव्वी ? २ एआए चेव एगाइआए एगुत्तरिआए सत्तगच्छगयाए सेटीए अब्भमन्नम्भासो दुरूव्वणो, से तं अणा-
 णुपुव्वी । तिरिअलोअस्वेत्ताणुपुव्वी तिविहा पण्णत्ता, तंजहा-पुव्वाणुपुव्वी पच्छाणुपुव्वी अणाणुपुव्वी । से किं तं पुव्वाणुपुव्वी ? २
 जंबूदीवे लवणे धायइकालोअ पुक्खरे वरुणे । खीरघय खोअनंदी अरुणवरे कुंडले रुअगे ॥१॥ आभरणवत्थगंधे उप्पलतिलए
 अ पुढविनिहिरयणे । वासहरदहनईओ विजया वक्खारकप्पिदा ॥२॥ कुरुमंदरआवासा, कूडा नक्खत्तचंदसूरा य । देवे नागे
 जक्खे भूए अ सयंभूरमणे अ ॥३॥ से तं पुव्वाणुपुव्वी । से किं तं पच्छाणुपुव्वी ? २ सयंभूरमणे अ जाव जंबूदीवे, से तं पच्छा-
 णुपुव्वी । से किं तं अणाणुपुव्वी ? २ एआए चेव एगाइआए एगुत्तरिआए असंखेज्जगच्छगयाए सेटीए अण्णमण्णम्भासो दुरू-
 व्वणो, से तं अणाणुपुव्वी ? उड्डलोअस्वेत्ताणुपुव्वी तिविहा पण्णत्ता, तंजहा-पुव्वाणुपुव्वी पच्छाणुपुव्वी अणाणुपुव्वी । से किं तं पुव्वा-
 णुपुव्वी ? २ सोहम्मे ईसाणे सणंकुमारे माहिंदे बंभलोए लंतए महासुक्के सहस्सारे आणए पाणए आरणे अच्चए गेवेज्जविमाणे
 अणुत्तरविमाणे ईसिपम्भारा, से तं पुव्वाणुपुव्वी । से किं तं पच्छाणुपुव्वी ? २ ईसिपम्भारा जाव सोहम्मे, से तं पच्छाणुपुव्वी ।

से किं तं अणाणुपुवी ? २ एआए चेव एगाइआए एगुत्तरिआए पन्नरसगच्छगयाए सेदीए अन्नमन्नभासे दुरूवूणो, से तं
 अणाणुपुवी । अहवा उवणिहिआ खेत्ताणुपुवी तिक्किहा पणत्ता, तंजहा-पुवाणुपुवी पच्छाणुपुवी अणाणुपुवी से किं तं पुवाणु-
 पुवी ?, २ एगपएसोगाढे दुपएसोगाढे दसपएसोगाढे संखिजपएसोगाढे जाव असंखिजपएसोगाढे से तं पुवाणुपुवी । से किं
 तं पच्छाणुपुवी ?, २ असंखिजपएसोगाढे संखिजपएसोगाढे जाव एगपएसोगाढे से तं पच्छाणुपुवी । से किं तं अणाणुपुवी, २
 एआए चेव एगाइआए एगुत्तरिआए असंखिजगच्छगयाए सेदीए अन्नमन्नभासो दुरूवूणो, से तं अणाणुपुवी । से तं उवणिहिआ
 खेत्ताणुपुवी । से तं खेत्ताणुपुवी (सू० १०४) से किं तं कालाणु० ? २ दुक्किहा पणत्ता, तंजहा-उवणिहिआ य अणोवणिहिआ
 य (सू० १०५) तत्थ णं जा सा उवणिहिआ सा ठप्पा, तत्थ णं जा सा अणोवणिहिआ सा दुक्किहा पणत्ता तंजहा-णेगमव-
 वहाराणं संगहस्स य (सू० १०६) से किं तं णेगमववहाराणं अणोवणिहिआ कालाणु० ? २ पंचविहा पणत्ता, तंजहा-अट्ठपय-
 परूवणया भंगसमुक्कित्तणया भंगोवदंसणया समोआरे अणुगमे (सू० १०७) से किं तं णेगमववहाराणं अट्ठपयपरूवणया ? २
 तिसमयट्ठिईए आणु० जाव दससमयट्ठिईए आणु० संखिजसमयट्ठिईए आणु० असंखिजसमयट्ठिईए आणु०, एगसमयट्ठिईए
 अणाणु० दुसमयट्ठिईए अवत्तवए, तिसमयट्ठिईआओ आणुपुवीओ एगसमयट्ठिईआओ अणाणु०ओ दुसमयट्ठिईआ अवत्तवगाइं,
 से तं णेगमववहाराणं अट्ठपयपरूवणया । एआए णं णेगमववहाराणं अट्ठपयपरूवणयाए किं पओअणं ?, एआए णं णेगमव-
 वहाराणं अट्ठपयपरूवणयाए णेगमववहाराणं भंगसमुक्कित्तणया कज्जइ (सू० १०८) से किं तं णेगमववहाराणं भंगसमुक्कित्तणया ?
 २ अत्थि आणु० अत्थि अणाणु० अत्थि अवत्तवए, एवं दवाणुपुवीगमेणं कालाणुपुवीएवि, ते चेव छवीसं भंगा भाणिअवा

अनुयोग

द्वार-

॥१२॥

जाव से तं णेगमववहाराणं भंगसमुक्कित्तणया । एआए णं णेगमववहाराणं भंगसमुक्कित्तणयाए किं पओअणं ?, एआए णं णेगमववहाराणं भंगसमुक्कित्तणयाए णेगमववहाराणं भंगोवदंसणया कज्जई (सू० १०९) । से किं तं णेगमववहाराणं भंगोवदंसणया ? २ तिसमयट्ठिईए आणु० एगसमयट्ठिईए अणाणु० दुसमयट्ठिईए अवत्तवए, तिसमयट्ठिईआ आणुपुवीओ एगसमयट्ठिईआ अणाणुपुवीओ दुसमयट्ठिईआ अवत्तवगाइं, अहवा तिसमयट्ठिईए अ एगसमयट्ठिईए अ आणु० अणाणु० अ, एवं तहा चेव दवाणु० गमेणं छवीसं भंगा भाणिअवा जाव से तं णेगमववहाराणां भंगोवदंसणया (सू० ११०) से किं तं समोआरे ? २ णेगमववहाराणं आणु० दवाइं कहिं समोअरंति ? किं आणु० दवेहिं समोअरंति ? अणाणु० दवेहिं ? एवं तिण्णिवि सट्ठाणे समोअरंति इति भाणिअवं । से तं समोआरे (सू० १११) से तं किं अणुगमे ? २ णवविहे पण्णत्ते, तंजहा—संतपयपरूवणया जाव अप्पावहुं चेव ॥१॥ णेगमववहाराणं आणुपुवीदवाइं किं अत्थि णत्थि ?, नियमा तिण्णिवि अत्थि । णेगमववहाराणं आणु० दवाइं किं संखेआइं असंखेआइं अणंताइं ? तिण्णिवि नो संखिआइं असंखेआइं नो अणंताइं । णेगमववहाराणं आणु० दवाइं लोगस्म किं संखिअइभागे होआ ? असंखिअइभागे होआ ? संखेजेसु भागेसु वा होआ ? असंखेजेसु भागेसु वा होआ ? सबलोए वा होआ ?, एगं दवं पडुच्च संखेअइभागे वा होआ असंखेअइभागे वा होआ संखेजेसु वा भागेसु होआ असंखेजेसु वा भागेसु होआ देखणे वा लोए होआ ? नाणादवाइं पडुच्च नियमा सबलोए होआ, एवं अणाणुपुवीदवं, आएसंतरेण वा सबपुच्छासु होआ, एवं अवत्तवगदवाणि वि जहा खेत्ताणुपुवीए । फुसणा कालाणुपुवीएवि तहा चेव भाणिअवा । णेगमववहाराणं आणुपुवीदवाइं कालओ केवच्चिरं होति ?, एगं दवं पडुच्च जहण्णेणं तिण्णि समया उक्कोसेणं असंखेअं कालं, नाणादवाइं पडुच्च सबद्धा, णेगमववहाराणं अणाणुपुवी-

सूत्रम् .

॥ १२ ॥

दवाइं कालओ केवच्चिरं होइ ? एगं दवं पडुच्च अजहन्नमणुकोसेणं एकं समयं नाणादवाइं पडुच्च सबद्धा णेगमववहाराणं आणुपुवी-
 दवाणमंतरं कालओ केवच्चिरं होइ ? एगं दवं पडुच्च जहण्णे णं एगं समयं उकोसे णं दो समया नाणादवाइं पडुच्च नत्थि अंतरं ।
 णेगमववहाराणं अणाणुपुवीदवाणमंतरं कालओ केवच्चिरं होइ ? एगं दवं पडुच्च जहण्णे णं दो समया उकोसे णं असंखेज्जं कालं
 नाणादवाइं पडुच्च नत्थि अंतरं । णेगमववहाराणं अवत्तवगदवाणं पुच्छा, एगं दवं पडुच्च जहण्णेणं एगं समयं उकोसे णं असंखेज्जं
 कालं, नाणादवाइं पडुच्च नत्थि अंतरं । भागभावअप्पाबहुं चेव जहा खेत्ताणुपुवीए तहा भाणिअवाइं, जाव से तं अणुगमे ।
 से तं णेगमववहाराणं अणोवणिहिआ कालाणुपुवी (सू० ११२) से किं तं संगहस्स अणोवणिहिआ कालाणुपुवी ? २ पंचविहा
 पण्णत्ता तंजहा-अट्ठपयपरूवणया भंगसमुत्तिगणया भंगोवदंसणया समोआरे अणुगमे (सू० ११३) से किं तं संगहस्स अट्ठ-
 पयपरूवणया ? २ एआइं पंचवि दाराइं जहा खेत्ताणुपुवीए संगहस्स तहा कालाणु० एवि भाणिअवाणि, णवरं ठिइअभिलावो,
 जाव से तं अणुगमे । से तं संगहस्स अणोवणिहिआ कालाणु० (सू० ११४) से किं तं उवणिहिआ कालाणुपुवी ? २ तिविहा
 पण्णत्ता, तंजहा-पुद्वाणु० पच्छाणु० अणाणु० । से किं तं पुद्वाणु० ? २ समए आवलिआ आणपाणू थोवे लवे मुहुत्ते अहोरत्ते
 पक्खे मासे उऊ अयणे संवच्छरे जुगे वाससए वाससहस्से वाससयसहस्से पुवंगे पुवे तुडिअंगे तुडिए अडडंगे अडडे अववंगे
 अववे दुहुअंगो हुहुए उप्पलंगे उप्पले पउमंगे पउमे णलिणंगे णलिणे अत्थिनिऊरंगे अत्थिनिऊरे अउअंगे अउए नउअंगे
 नउए पउअंगे पउए चूलिअंगे चूलिआ सीसपहेलिअंगे सीसपहेलिआ पलिओवमे सागरोवमे ओसप्पिणी उस्सप्पिणी पोग्गल-
 परिअट्ठे अतीतद्धा अणागतद्धा सबद्धा, से तं पुद्वाणु० । से किं तं पच्छाणु० ? २ सबद्धा अणागतद्धा जाव समए, से तं

पच्छाणु० । से किं तं अणाणु० ? २ एआए चेव एगाइआए एगुत्तरिआए अणंतगच्छगयाए सेढीए अण्णमण्णन्भासो दुरूवूणो, से तं अणाणुपुवी । अहवा उवणिहिआ कालाणुपुवी तिविहा पण्णत्ता, तंजहा-पुवाणुपुवी पच्छाणुपुवी अणाणुपुवी । से किं तं पुवाणुपुवी ? २ एगसमयठिइए दुसमयठिइए तिसमयठिइए जाव दससमयठिइए संखिजसमयठिइए असंखिजसमयठिइए, से तं पुवाणुपुवी । से किं तं पच्छाणुपुवी ? २ असंखिजसमयठिइए जाव एगसमयठिइए, से तं पच्छाणुपुवी । से किं तं अणाणुपुवी ? २ एआए चेव एगाइआए एगुत्तरिआए असंखिजगच्छगयाए सेढीए अन्नमन्नन्भासो दुरूवूणो, से तं अणाणुपुवी । से तं उवणिहिआ कालाणुपुवी से तं कालाणुपुवी (सू० ११५) से किं तं उक्कित्तणाणुपुवी ? २ तिविहा पण्णत्ता तंजहा-पुवाणुपुवी पच्छाणुपुवी अणाणुपुवी । से किं तं पुवाणुपुवी ? २ उसमे अजिए संभवे अभिणंदणे सुमती पउमप्पहे सुपासे चंदप्पहे सुविही सीतले सेजंसे वासुपुजे विमले अणंते धम्मे संती कुंथू अरे मल्ली मुणिसुव्वए णमी अरिद्वणेमी पासे वद्धमाणे, से तं पुवाणुपुवी । से किं तं पच्छाणुपुवी ? २ वद्धमाणे जाव उसमे, से तं पच्छाणुपुवी । से किं तं अणाणुपुवी ? २ एआए चेव एगाइआए एगुत्तरिआए चउवीसगच्छगयाए सेढीए अण्णमण्णन्भासो दुरूवूणो, से तं अणाणुपुवी । से तं उक्कित्तणाणुपुवी (सू० ११६) से किं तं गणणाणुपुवी ? २ तिविहा पण्णत्ता, तंजहा-पुवाणुपुवी पच्छाणुपुवी अणाणुपुवी । से किं तं पुवाणुपुवी ? २ एगो दस सयं सहस्सं दससहस्साइं सयसहस्सं दससयसहस्साइं कोडी. दसकोडीओ कोडीसयं दसकोडिसयाइं, से तं पुवाणुपुवी । से किं तं पच्छाणुपुवी ? २ दसकोडिसयाइं जाव एको, से तं पच्छाणुपुवी । से किं तं अणाणुपुवी ? २ एआए चेव एगाइआए एगुत्तरिआए दसकोडिसयगच्छगयाए सेढीए अन्नमन्नन्भासो दुरूवूणो, से तं अणाणुपुवी

से तं गणणपुवी (सू० ११७) से किं तं संठाणपुवी ? २ तिविहा पणत्ता तंजहा-पुवाणपुवी पच्छाणपुवी अणपुवी ।
 से किं तं पुवाणपुवी ? २ समचउरंसे निग्गोहमंडले सादी खुजे वामणे हुंडे, से तं पुवाणपुवी । से किं तं पच्छाणपुवी ? २
 हुंडे जाव समचउरंसे से तं पच्छाणपुवी । से किं तं अणपुवी ? २ एआए चेव एगाइआए एगुत्तरिआए छगच्छगयाए सेढीए
 अन्नमन्नभासो दुरूवणो, से तं अणपुवी । से तं संठाणपुवी (सू० ११८) से किं तं सामायारी आणपुवी ? २ तिविहा
 पणत्ता, तंजहा-पुवाणपुवी पच्छाणपुवी अणपुवी । से किं तं पुवाणपुवी ? २ इच्छामिच्छातहकारो, आवस्सिआ य निसी-
 हिआ । आपुच्छणा य पडिपुच्छा, छंदणा य निमंतणा ॥१॥ उवसंपया य काले सामायारी भवे दसविहा उ ॥ से तं पुवा-
 णपुवी ? से किं तं पच्छाणपुवी २ उवसंवया जाव इच्छागारो, से तं पच्छाणपुवी । से किं तं अणपुवी ? २ एआए चेव
 एगाइआए एगुत्तरिआए दसगच्छगयाए सेढीए अन्नमन्नभासो दुरूवणो, से तं अणपुवी, से तं सामायारी आणपुवी (सू०
 ११९) से किं तं भावाणपुवी ? २ तिविहा पणत्ता, तंजहा-पुवाणपुवी पच्छाणपुवी अणपुवी । से किं तं पुवाणपुवी ? २
 उदइए उवसमि ए स्वाइए खओवसमि ए पारिणामि ए संनिवाइए, से तं पुवाणपुवी । से किं तं पच्छाणपुवी ? २ सन्निवाइए जाव
 उदइए, से तं पच्छाणपुवी । से किं तं अणपुवी ? २ एआए चेव एगाइआए एगुत्तरिआए छगच्छगयाए सेढीए अन्नमन्न-
 भासो दुरूवणो, से तं अणपुवी । से तं भावाणपुवी, से तं आणपुवी, आणपुवीत्ति पदं सम्मत्तं (सू० १२०) से किं तं
 णामे ? णामे दसविहे पणत्ते, तंजहा-एगणामे दुणामे तिणामे चउणामे पंचणामे छणामे सत्तणामे अट्ठणामे णवणामे दस-
 णामे (सू०-१२१) से किं तं एगणामे ? २ णामाणि जाणि काणिवि दवाण गुणण पज्जवाणं च । तेसिं आणमनिहसे नामंति

परुविआ सण्णा ॥१॥ से तं एगणामे (सू० १२२) से किं तं दुनामे ? २ दुविहे पण्णत्ते, तंजहा-एगक्खरिए अ अणेगक्खरिए अ, से किं तं एगक्खरिए २ अणेगविहे पण्णत्ते तंजहा-द्वीः श्रीः धीः स्त्री, से तं एगक्खरिए । से किं तं अणेगक्खरिए ? २ कन्ना वीणा लता माला, से तं अणेगक्खरिए । अहवा दुनामे दुविहे पण्णत्ते तंजहा-जीवनामे अ अजीवनामे अ । से किं तं जीवनामे ? २ अणेगविहे पण्णत्ते तंजहा-देवदत्तो जण्णदत्तो विण्हुदत्तो सोमदत्तो, से तं जीवनामे । से किं तं अजीवनामे ? २ अणेगविहे पण्णत्ते, तंजहा-घडो पडो कडो रहो, से तं अजीवनामे । अहवा दुनामे दुविहे पण्णत्ते, तंजहा-विसेसिए अ अविसेसिए अ । अविसेसिए दवे विसेसिए जीवदवे अजीवदवे अ, अविसेसिए जीवदवे विसेसिए णेरइए तिरिक्खजोणीए मणुस्से देवे, अविसेसिए णेरइए विसेसिए रयणप्पहाए सक्करप्पहाए वालुअप्पहाए पंक्कप्पहाए धूमप्पहाए तमाए तमतमाए, अविसेसिए रयणप्पहापुढविणेइए विसेसिए पज्जत्तए अ अपज्जत्तए अ, एवं जाव अविसेसिए तमतमापुढवीणेइए विसेसिए पज्जत्तए अ अपज्जत्तए अ । अविसेसिए तिरिक्खजोणीए विसेसिए एगिंदिए बेइंदिए तेइंदिए चउरिंदिए पंचिंदिए, अविसेसिए एगिंदिए विसेसिए पुढविकाइए आउकाइए तेउकाइए वाउकाइए वणस्सइकाइए, अविसेसिए पुढविकाइए विसेसिए सुहुमपुढविकाइए अ बादरपुढविकाइए अ, अविसेसिए सुहुमपुढविकाइए विसेसिए पज्जत्तयसुहुमपुढविकाइए अ अपज्जत्तयसुहुमपुढविकाइए अ, अविसेसिए अ बादरपुढविकाइए विसेसिए पज्जत्तयबादरपुढविकाइए अ अपज्जत्तयबादरपुढविकाइए अ, एवं आउकाइए तेउकाइए वाउकाइए वणस्सइकाइए अविसेसिअविसेसिअपज्जत्तयअपज्जत्तयभेदेहिं भाणिअवा । अविसेसिए बेइंदिए विसेसिए पज्जत्तयबेइंदिए अ अपज्जत्तयबेइंदिए अ, एवं तेइंदिअचउरिंदिआवि भाणिअवा । अविसेसिए पंचिंदिअतिरिक्खजोणीए

विसेसिए जलयरपंचिदियतिरिक्खजोणिए थलयरपंचिदिअतिरिक्खजोणिए खयरपंचिदिअतिरिक्खजोणिए अ, अविसेसिए जलयरपंचिदिअतिरिक्खजोणिए विसेसिए संमुच्छिमजलयरपंचिदिअतिरिक्खजोणिए अ गब्भवकंतिअजलयरपंचिदिअतिरिक्ख-
जोणिए अ, अविसेसिए संमुच्छिमजलयरपंचेदियतिरिक्खजोणिए विसेसिए अ पञ्चत्तयसंमुच्छिमजलयरपंचिदिअतिरिक्खजो-
णिए अ अपञ्चत्तयसंमुच्छिमजलयरपंचिदिअतिरिक्खजोणिए, अविसेसिए गब्भवकंतियजलयरपंचिदिअतिरिक्खजोणिए विसे-
सिए पञ्चत्तयगब्भवकंतिअजलयरपंचिदिअतिरिक्खजोणिए अ अपञ्चत्तयगब्भवकंतियजलयरपंचिदिअतिरिक्खजोणिए अ, अवि-
सेसिए थलयरपंचिदिअतिरिक्खजोणिए विसेसिए चउप्पयथलयरपंचिदिअतिरिक्खजोणिए अ परिसप्पथलयरपंचिदिअतिरिक्ख-
जोणिए अ, अविसेसिए चउप्पयथलयरपंच० विसेसिए संमुच्छिमचउप्पयथलयरपंचिदिअतिरिक्खजोणिए अ गब्भवकंतिअचउ-
प्पयथलयरपंचिदिअतिरिक्खजोणिए अ, अविसेसिए संमुच्छिमचउप्पयथलयर० विसेसिए पञ्चत्तयसंमुच्छिमचउप्पयथलयरपंचि-
दिअतिरिक्खजोणिए अ अपञ्चत्तयसंमुच्छिमचउप्पयथलयरपंचिदिअतिरिक्खजोणिए अ, अविसेसिए गब्भवकंतिअचउप्पयथल-
यरपंचिदिअ० विसेसिए पञ्चत्तयगब्भवकंतिअचउप्पयथलयरपंचिदिअतिरिक्खजोणिए अ अपञ्चत्तयगब्भवकंतिअचउप्पयथलउ
यरपंचिदिअतिरिक्खजोणिए अ, अविसेसिए परिसप्पथलयर० विसेसिए उरपरिसप्पथलयरपंचिदिअतिरिक्खजोणिए अ भुअप-
रिसप्पथलउयरपंचिदिअतिरिक्खजोणिए अ, एतेऽवि संमुच्छिमा पञ्चत्तगा अपञ्चत्तगा य गब्भवकंतिआवि पञ्चत्तगा अपञ्च-
त्तगा य भाणिअद्वा । अविसेसिए स्वहयरपंचिदिअ० विसेसिए संमुच्छिमस्वहयरपंचिदिअतिरिक्खजोणिए अ गब्भवकंतिअस्वह-
यरपंचिदिअतिरिक्खजोणिए अ, अविसेसिए संमुच्छिमस्वहयरपंचि० विसेसिए पञ्चत्तयसंमुच्छिमस्वहयरपंचिदिअतिरिक्खजोणिए

अ अपञ्जत्तयसंमुच्छिमस्वहयरपंचिदिअतिरिक्खजोणिए, अविसेसिए गढभवकंतिअस्वहयरपंचि० विसेसिए पञ्जत्तयगढभवकंतिअ-
 स्वहयरपंचिदियतिरिक्खजोणिए अ अपञ्जत्तयगढभवकंतिअस्वहयरपंचिदिअतिरिक्खजोणिए य । अविसेसिए मणुस्से विसेसिए
 संमुच्छिममणुस्से अ गढभवकंतिअमणुस्से अ, अविसेसिए संमुच्छिममणुस्से विसेसिए पञ्जत्तगसंमुच्छिममणुस्से अ अपञ्जत्तग-
 संमुच्छिममणुस्से अ, अविसेसिए गढभवकंतिअमणुस्से विसेसिए कम्मभूमिओ य अकम्मभूमिओ य अंतरदीवओ य संखिज्ज-
 वासाउय असंखिज्जवासाउय पञ्जत्तापञ्जत्तओ । अविसेसिए देवे विसेसिए भवणवासी वाणमंतरे जोइसिए वेमाणिए अ, अवि-
 सेसिए भवणवासी विसेसिए असुरकुमारे नागकु० सुवण्णकु० विज्जकु० अग्गिकु० दीवकु० उदधिकु० दिमाकु० वाउकु०
 थणिकुमारे, सबेसिंपि अविसेसिअविसेसिअपञ्जत्तगपञ्जत्तगभेदा भाणिएअवा । अविसेसिए वाणमंतरे विसेसिए पिसाए भूए
 जक्खे रक्खसे किण्णरे किंपुरिसे महोरगे गंधवे, एतेसिंपि अविसेसिअविसेसिअपञ्जत्तयअपञ्जत्तगभेदा भाणिएअवा । अविसेसिए
 जोइसिए विसेसिए चंदे सूरु गहगणे नक्खत्ते तारारूवे, एतेसिंपि अविसेसियविसेसियअपञ्जत्तयपत्तज्जयमेआ भाणिएअवा
 अविसेसिए वेमाणिए विसेसिए कप्पोवगे अ कप्पातीतगे अ, अविसेसिए कप्पोवगे विसेसिए सोहम्मए ईसाणए सणकुमारए
 माहिंदए बंमलोए लंतयए महासुकए सहस्सारए आणयए पाणयए आरणए अच्चुयए, एतेसिंपि अविसेसिअविसेसिअपञ्जत्तग-
 पञ्जत्तगभेदा भाणिएअवा । अविसेसिए कप्पातीतए विसेसिए गेवेज्जए अ अणुत्तरोववाइए अ, अविसेसिए गेवेज्जए विसेसिए
 हेट्ठिमहेट्ठिमगेवेज्जए हेट्ठिममज्झिमगेवेज्जए हिट्ठिमउवरिमगेवेज्जए । अविसेसिए मज्झिमगेविज्जए विसेसिए मज्झिमहिट्ठिमगेविज्जए
 मज्झिममज्झिमगेवेज्जए मज्झिमउवरिमगेवेज्जए, अविसेसिए उवरिमगेवेज्जए विसेसिए उवरिमहेट्ठिमगेवेज्जए उवरिममज्झिमगे-

वेज्जए उवरिमउवरिमगेवेज्जए अ, एतेसिंपि सवेसिं अविसेसिअविसेसिअपज्जत्तगापज्जत्तगमेदा भाणिअद्वा । अविसेसिए अणुत्तरो-
ववाइए विसेसिए विजयए वेजयंतए जयंतए अपराजिअए सव्वट्टुसिद्धए अ, एतेसिंपि सवेसिं अविसेसिअविसेसिअपज्जत्तगमेदा
भाणिअद्वा । अविसेसिए अजीवद्वे विसेसिए धम्मत्थिकाए अधम्मत्थिकाए आगासत्थिकाए पोग्गलत्थिकाए अद्वासमए अ,
अविसेसिए पोग्गलत्थिकाए विसेसिए परमाणुपोग्गले दुपएसिए तिपएसिए जाव अणंतपएसिए अ, से तं दुनामे (सू० १२३)
से किं तं तिनामे ?, २ तिविहे पण्णत्ते, तंजहा-द्वणामे गुणणामे पज्जवणामे अ । से किं तं द्वणामे ?, २ छव्विहे पण्णत्ते,
तंजहा-धम्मत्थिकाए अधम्मत्थिकाए आगासत्थिकाए जीवत्थिकाए पुग्गलत्थिकाए अद्वासमए अ, से तं द्वणामे । से किं
तं गुणणामे ?, २ पंचविहे पण्णत्ते, तंजहा-वण्णणामे गंधणामे रसणामे फासणामे संठाणणामे । से किं तं वण्णणामे ?, २
पंचविहे पण्णत्ते, तंजहा-कालवण्णणामे नीलवण्णणामे लोहिअवण्णणामे हालिद्वण्णणामे सुक्खिअवण्णणामे, से तं वण्णणामे ।
से किं तं गंधणामे ?, २ दुविहे पण्णत्ते, तंजहा-सुरभिगंधणामे अ, दुरभिगंधणामे अ, से तं गंधणामे । से किं तं रसणामे ?,
२ पंचविहे पण्णत्ते, तंजहा-तित्तरसणामे कडुअरसणामे कसायरसणामे अंबिलरसणामे महुररसणामे अ, से तं रसणामे । से
किं तं फासणामे ?, २ अट्ठविहे पण्णत्ते, तंजहा-कक्खड्ढफासणामे मउअफा० गुरुअफा० लहुअफा० सीतफासणामे उसिण-
फासणामे णिद्धफा० लुक्खफासणामे, से तं फासणामे । से किं तं संठाणणामे ?, २ पंचविहे पण्णत्ते, तंजहा-परिमंडलसंठा-
णणामे वडुसं० तंससं० चउरंससं० आयतसंठाणणामे, से तं संठाणणामे, से तं गुणणामे । से किं तं पज्जवणामे ?, २ अणेग-
विहे पण्णत्ते, तंजहा-एगगुणकालए दुगुणकालए तिगुणकालए जज्झ दसगुणकालए संखिअगुणकालए असंखिअगुणकालए

अनंतगुणकालए, एवं नीललोहिअहालिहसुकिछावि भाणिअव्वा । एगगुणसुरभिगंधे दुगुणसुरभिगंधे तिगुणसु० जाव अणंतगुण-
सुरभिगंधे, एवं दुरभिगंधोऽवि भाणिअव्वा । एगगुणतित्ते जाव अणंतगुणतित्ते, एवं कडुअकसायअंबिलमहुरावि भाणिअव्वा ।
एगगुणकक्खडे जाव अणंतगुणकक्खडे, एवं मउअगुरुअलहुअसीतउसिणणिद्वलुक्खावि भा०, से तं पज्जवणामे । तं पुण णामं
तिविहं इत्थी पुरिसं णपुंसगं चेव । एएसिं तिण्हंपि अ अंतंमि अ परूवणं वोच्छं ॥१॥ तत्थ पुरिसस्स अंता आई ऊ ओ हवन्ति
चत्तारि । ते चेव इत्थिआओ हवन्ति ओकारपरिहीणा ॥२॥ अंतिअ इंतिअ उंतिअ अंताउ णपुंसगस्स बोद्धवा । एतेसिं तिण्हंपि
अ वोच्छामि निदंसणे एत्तो ॥३॥ आगारंतो राया ईगारंतो गिरि अ सिहरी अ । ऊगारंतो विण्हू दुमो अ अंता उ पुरिसाणं
॥४॥ आगारंता माला ईगारंता सिरी अ लच्छी अ । ऊगारंता जंबू वहु अ अंताउ इत्थीणं ॥५॥ अंकारंतं धन्नं इंकारंतं नपुंसगं
अत्थि । उंकारंतो पीलुं महुं च अंता णपुंसाणं ॥६॥ से तं तिणामे (१२४) से किं तं चउणामे ? २ चउविहे पण्णत्ते तंजहा-
आगमेणं लोवेणं पयईए विगारेणं । से किं तं आगमेणं ?, २ पन्नानि पयांसि कुण्डानि, से तं आगमेणं । से किं तं लोवेणं ?,
२ ते अत्र तेऽत्र पटो अत्र पटोऽत्र घटो अत्र घटोऽत्र, से तं लोवेणं । से किं तं पगईए ?, २ अग्गी एतौ पटू इमौ शाले एते
माले इमे, से तं पगईए । से किं तं विगारेणं ?, २ दण्डस्य अग्रं दण्डाग्रं सा आगता साऽऽगता दधि इदं दधीदं नदी इह नदीह
मधु उदकं मधूदकं वधू ऊहः वधूहः, से तं विगारेणं, से तं चउनामे (सू० १२५) से किं तं पंचनामे ? २ पंचविहे पण्णत्ते,
तंजहा-नामिकं नैपातिकं आख्यातिकम् औपसर्गिकं मिश्रं, अश्व इति नामिकं, खल्विति नैपातिकं, धावतीत्याख्यातिकं, परी-
त्यौपसर्गिकं, संयत इति मिश्रं, से तं पंचनामे (सू० १२६) से किं तं छण्णामे ?, २ छविहे पण्णत्ते, तंजहा-उदइए उवसमिए

खइए खओवसमिए पारिणामिए संनिवाइए से किं तं उदइए ?, २ दुविहे पण्णत्ते, तंजहा-उदइए अ उदयनिप्फण्णे अ । से किं तं उदइए ?, २ अट्ठण्हं कम्मपयडीणं उदएणं, से तं उदइए । से किं तं उदयनिप्फण्णे ?, २ दुविहे पण्णत्ते, तंजहा-जीवोदयनिप्फण्णे अ अजीवोदयनिप्फण्णे अ । से किं तं जीवोदयनिप्फण्णे ?, २ अणेगविहे पण्णत्ते, तंजहा-णेरइए तिरिक्खजोणिए मणुस्से देवे पुढविकाइए जाव तसकाइए कोहकसाई जाव लोहकसाई इत्थीवेदए पुरिसवेयए णपुंसगवेदए कण्हलेसे जाव सुकलेसे मिच्छादिट्ठी ३ अविरए असंणी अण्णाणी आहारए छउमत्थे सजोगी संसारत्थे असिद्धे, से तं जीवोदयनिप्फण्णे । से किं तं अजीवोदयनिप्फण्णे ?, २ अणेगविहे पण्णत्ते, तंजहा-उरालिअं वा सरीरं उरालिअसरीरपओगपरिणामिअं वा दव्वं, वेउव्विअं वा सरीरं वेउव्वियसरीरपओगपरिणामिअं वा दव्वं, एवं आहारगं सरीरं तेअगं सरीरं कम्मगसरीरं च भाणिअव्वं, पओगपरिणामिए वण्णे गंधे रसे फासे, से तं अजीवोदयनिप्फण्णे । से तं उदयनिप्फण्णे, से तं उदइए । से किं तं उवसमिए ?, २ दुविहे पण्णत्ते, तंजहा-उवसमे अ उवसमनिप्फण्णे अ । से किं तं उवसमे ?, २ मोहणिज्जस्स कम्मस्स उवसमेणं, से तं उवसमे । से किं तं उवसमनिप्फण्णे ?, २ अणेगविहे पण्णत्ते तंजहा-उवसंतकोहे जाव उवसंतलोमे उवसंतपेजे उवसंतदोसे उवसंतदंसणमोहणिजे उवसंतमोहणिजे उवसमिआ सम्मत्तलद्धी उवसमिआ चरित्तलद्धी उवसंतकसायछउमत्थवीयरगे, से तं उवसमनिप्फण्णे । से तं उवसमिए । से किं तं खइए ?, २ दुविहे पण्णत्ते, तंजहा-खइए अ खयनिप्फण्णे अ । से किं तं खइए ?, २ अट्ठण्हं कम्मपयडीणं खए णं, से तं खइए । से किं तं खयनिप्फण्णे ?, २ अणेगविहे पण्णत्ते, तंजहा-उप्पण्णणाणदंसणधरे अरहा जिणे केवली खीणआमिणिबोहिअणाणावरणे खीणसुअणाणावरणे खीणओहिणाणावरणे

अनुयोग

द्वार-

॥ १७ ॥

स्त्रीणमणपञ्जवणाणावरणे स्त्रीणकेवलणाणावरणे अणावरणे निरावरणे स्त्रीणावरणे णाणावरणिज्जकम्मविप्पमुके केवलदंसी सव-
दंसी स्त्रीणनिदे स्त्रीणनिदानिदे स्त्रीणपयले स्त्रीणपयलापयले स्त्रीणथीणगिद्धीस्त्रीणचक्खुदंसणावरणे स्त्रीणअचक्खुदंसणावरणे
स्त्रीणओहिदंसणावरणे स्त्रीणकेवलदंसणावरणे अणावरणे निरावरणे स्त्रीणावरणे दरिसणावरणिज्जकम्मविप्पमुके स्त्रीणसायावेअ-
णिजे स्त्रीणअसायावेअणिजे अवेअणे निवेअणे स्त्रीणवेअणे सुभासुभवेअणिज्जकम्मविप्पमुके स्त्रीणकोहे जाव स्त्रीणलोहे स्त्रीणपेजे
स्त्रीणदोसे स्त्रीणदंसणमोहणिजे स्त्रीणचरित्तमोहणिजे अमोहे निम्मोहे स्त्रीणमोहे मोहणिज्जकम्मविप्पमुके स्त्रीणणेरइआउए स्त्रीण-
तिरिक्खजोणिआउए स्त्रीणमणुस्साउए स्त्रीणदेवाउए अणाउए निराउए स्त्रीणाउए आउकम्मविप्पमुके गइजाइसरीरंगोवंगबंध-
णसंघायणसंघयणसंठाणअणेगबोदिर्विदंसंघायविप्पमुके स्त्रीणसुभनामे स्त्रीणअसुभणामे अणामे निण्णामे स्त्रीणनामे सुभासुभ-
णामकम्मविप्पमुके स्त्रीणउच्चागोए स्त्रीणणीआगोए अगोए निग्गोए स्त्रीणगोए उच्चणीयगोत्तकम्मविप्पमुके स्त्रीणदाणंतराए
स्त्रीणलाभंतराए स्त्रीणभोगंतराए स्त्रीणउवभोगंतराए स्त्रीणविरियंतराए अणंतराए णिरंतराए स्त्रीणंतराए अंतरायकम्मविप्पमुके
सिद्धे बुद्धे मृत्ते परिणिव्वुए अंतगडे सवदुखप्पहीणे, से तं खयनिप्फण्णे । से तं खइए । से किं तं खओवसमिहं ?, २ दुविहे
पण्णत्ते, तंजहा-खओवसमिहं य खओवसमनिप्फण्णे य । से किं तं खओवसमे ?, २ चउण्हं घाइकम्माणं खओवसमेणं,
तंजहा-णाणावरणिज्जस्स दंसणावरणिज्जस्स मोहणिज्जस्स अंतरायस्स खओवसमेणं, से तं खओवसमे । से किं तं खओवसम-
निप्फण्णे ?, २ अणेगविहे पण्णत्ते, तंजहा-खओवसमिआ आभिणिबोहिअणाणलद्धी जाव खओवसमिआ मणपञ्जवणाणलद्धी
खओवसमिआ मइअण्णाणलद्धी खओवसमिआ सुअअण्णाणलद्धी खओवसमिआ विभंगणाणलद्धी खओवसमिआ चक्खुदंसण-

सूत्रम् .

॥ १७ ॥

लद्धी अचक्खुदंसणलद्धी ओहिदंसणलद्धी एवं सम्मदंसणलद्धी मिच्छादंसणलद्धी सम्ममिच्छादंसणलद्धी खओवसमिआ सामा-
इअचरित्तलद्धी एवं छेदोवट्ठावणलद्धी परिहारविसुद्धिअलद्धी सुहुमसंपरायचरित्तलद्धी एवं चरित्ताचरित्तलद्धी खओवसमिआ
दाणलद्धी एवं लाभ० भोग० उवभोगलद्धी खओवसमिया वीरिअलद्धी एवं पंडिअवीरिअलद्धी बालवीरिअलद्धी बालपंडिअवी-
रिअलद्धी खओवसमिआ सोइंदिअलद्धी जाव खओवसमिआ फासिंदिअलद्धी खओवसमिए आयारंगधरे एवं सुअगडंगधरे
ठाणंगधरे समवायंगधरे विवाहपण्णत्तिधरे नायाधम्मकहा० उवासगदसा० अंतगडदसा० अणुत्तरोववाइअदसा० पण्हावागर-
णधरे विवागसुअधरे खओवसमिए दिट्ठिवायधरे खओवसमिए णवपुव्वी खओवसमिए जाव चउइसपुव्वी खओवसमिए गणी
खओवसमिए वायए, से तं खओवसमनिप्फण्णे, से तं खओवसमिए। से किं तं पारिणामिए?, २ दुविहे पण्णत्ते, तंजहा-साइ-
पारिणामिए अ अणाइपारिणामिए अ। से किं तं साइपारिणामिए?, २ अणेगविहे पण्णत्ते, तंजहा-जुण्णसुरा जुण्णगुलो जुण्ण-
घयं जुण्णतंदुला चेव। अब्भा य अब्भरुक्खा संज्ञा मंधव्वणगरा य ॥१॥ उक्कावाया दिसादाहा गज्जियं विज्जू णिग्घाया जूवया
जक्ख्वादित्ता धूमिआ महिआ रयुग्घाया चंदोवरागा सूरुवरागा चंदपरिवेसा सूरपरिवेसा पडिचंदा पडिसूरा इंदधणू उदगमच्छा
कविहसिया अमोहा वासा वासधरा गामा णगरा घरा पव्वता पत्थाला भवणा निरया रयणप्पहा सक्कप्पहा बालुअप्पहा पंकप्पहा
धूमप्पहा तमप्पहा तमतमप्पहा सोहम्मे जाव अच्चुए गेवेजे अणुत्तरे ईसिप्पभारा परमाणुपोग्गले दुपएसिए जाव अणंतपएसिए,
से तं साइपारिणामिए। से किं तं अणाइपारिणामिए?, २ धम्मत्थिकाए अधम्मत्थिकाए आगासत्थिकाए जीवत्थिकाए पुग्ग-
लत्थिकाए अद्दासमए लोए अलोए भवसिद्धिआ अभवसिद्धिआ, से तं अणाइपारिणामिए। से तं पारिणामिए। से किं तं स-

णिवाइए १, २ एएसिं चेव उदइअउवसमिअखइअखओवसमिअपारिणामिआणं भावाणं दुगसंजोएणं तियसंजोएणं चउकसंजो-
एणं पंचगसंजोएणं जे निप्फजइ सवे से सन्निवाइए नामे, तत्थ णं दस दुअसंजोगा दस तिअसंजोगा पंच चउकसंजोगा एगे
पंचकसंजोगे। एत्थ णं जे ते दस दुगसंजोगा ते णं इमे-अत्थि णामे उदइएउवसमनिप्फण्णे ? अत्थि णामे उदइएखाइगनिप्फ-
ण्णे २ अत्थि णामे उदइएखओवसमनिप्फण्णे ३ अत्थि णामे उदइएपारिणामिअनिप्फण्णे ४ अत्थि णामे उवसमिएखयनिप्फ-
ण्णे ५ अत्थि णामे उवसमिएखओवसमनिप्फण्णे ६ अत्थि णामे उवसमिएपारिणामिअनिप्फण्णे ७ अत्थि णामे खइएखओवसम-
निप्फण्णे ८ अत्थि णामे खइएपारिणामिअनिप्फण्णे ९ अत्थि णामे खओवसमिएपारिणामिअनिप्फण्णे १० । कयरे से नामे
उदइएउवसमनिप्फण्णे ? उदइएत्ति मणुस्से उवसंता कसाया, एस णं से णामे उदइएउवसमनिप्फण्णे १, कयरे से णामे उदइए-
खयनिप्फण्णे ? उदइएत्ति मणुस्से खइअं सम्मत्तं, एस णं से णामे उदइएखयनिप्फण्णे २, कयरे से णामे उदइएखओवसमनि-
प्फण्णे ? उदइएत्ति मणुस्से खओवसमिआइं इंदिआइं, एस णं से णामे उदइएखओवसमनिप्फण्णे ३, कयरे से णामे उदइएपरि-
णामिअनिप्फण्णे ? उदइएत्ति मणुस्से पारिणामिए जीवे, एस णं से णामे उदइएपारिणामिअनिप्फण्णे ४, कयरे से णामे उवस-
मिएखयनिप्फण्णे ? उवसंता कसाया खइअं सम्मत्तं, एस णं से णामे उवसमिएखयनिप्फण्णे ५, कयरे से णामे उवसमिएख-
ओवसमनिप्फण्णे ? उवसंता कसाया खओवसमिआइं इंदिआइं, एस णं से णामे उवसमिएखओवसमनिप्फण्णे ६, कयरे से
णामे उवसमिएपारिणामिअनिप्फण्णे ? उवसंता कसाया पारिणामिए जीवे, एस णं से णामे उवसमिएपारिणामिअनिप्फण्णे ७,
कयरे से णामे खइएखओवसमनिप्फण्णे ? खइयं सम्मत्तं खओवसमिआइं, इंदिआइं, एस णं से णामे खइएखओवसमनिप्फण्णे

८, कयरे से णामे खइएपारिणामिअनिष्फण्णे १, खइअं सम्मत्तं पारिणामिए जीवे, एस णं से णामे खइएपारिणामिअनिष्फण्णे
 ९, कयरे से णामे खओवसमिएपारिणामिअनिष्फण्णे १, खओवसमिआइं इंदिआइं पारिणामिए जीवे, एस णं से णामे खओवस-
 मिएपारिणामिअनिष्फण्णे १० । तत्थ णं जे ते दस तिगसंजोगा ते णं इमे-अत्थि णामे उदइएउवसमिएखयनिष्फण्णे १
 अत्थि णामे उदइएउवसमिएखओवसमनिष्फण्णे २ अत्थि णामे उदइएउवसमिएपारिणामिअनिष्फण्णे ३ अत्थि णामे उदइए-
 खइएखओवसमनिष्फण्णे ४ अत्थि णामे उदइएखइएपारिणामिअनिष्फण्णे ५ अत्थि णामे उदइएखओवसमिपारिणामिअनि-
 ष्फण्णे ६ अत्थि णामे उवसमिएखइएखओवसमनिष्फण्णे ७ अत्थि णामे उवसमिएखइएपारिणामिअनिष्फण्णे ८ अत्थि णामे
 उवसमिएखओवसमिएपारिणामिअनिष्फण्णे ९ अत्थि णामे खइएखओवसमिएपारिणामिअनिष्फण्णे १० । कयरे से णामे
 उदइएउवसमिएखयनिष्फण्णे १, उदइएत्ति मणुस्से उवसंता कसाया खइअं सम्मत्तं, एस णं से णामे उदइएउवसमिएखयनि-
 ष्फण्णे १, कयरे से णामे उदइएउवसमिएखओवसमियनिष्फण्णे १, उदइएत्ति मणुस्से उवसंता कसाया खओवसमिआइं इंदि-
 आइं, एस णं से णामे उदइएउवसमिएखओवसमनिष्फण्णे २, कयरे से णामे उदइएउवसमिएपारिणामिअनिष्फण्णे १, उदइएत्ति
 मणुस्से उवसंता कसाया पारिणामिए जीवे, एस णं से णामे उदइएउवसमिएपारिणामिअनिष्फण्णे ३, कयरे से णामे उदइ-
 एखइएखओवसमनिष्फण्णे १, उदइएत्ति मणुस्से खइअं सम्मत्तं खओवसमिआइं इंदिआइं, एस णं से णामे उदइएखइएखओ-
 वसमनिष्फण्णे ४, कयरे से णामे उदइएखइएपारिणामिअनिष्फण्णे १, उदइएत्ति मणुस्से खइअं सम्मत्तं पारिणामिए जीवे,
 एस णं से णामे उदइएखइएपारिणामिअनिष्फण्णे ५, कयरे से णामे उदइएखओवसमिएपारिणामिअनिष्फण्णे १, उदइएत्ति

अनुयोग

द्वार-

॥ १९ ॥

मणुस्से खओवसमिआइं इंदिआइं पारिणामिए जीवे, एस णं से णामे उदइएखओवसमिएपारिणामिअनिप्फण्णे ६, कयरे से णामे उवसमिएखइएखओवसमनिप्फण्णे १, उवसंता कसाया खइअं सम्मत्तं खओवसमिआइं इंदिआइं, एस णं से णामे उवसमिएखइएखओवसमनिप्फण्णे ७, कयरे से णामे उवसमिएखइएपारिणामिअनिप्फण्णे १, उवसंता कसाया खइअं सम्मत्तं पारिणामिए जीवे, एस णं से णामे उवसमिएखइएपारिणामिअनिप्फण्णे ८, कयरे से णामे उवसमिएखओवसमीएपारिणामिअनिप्फण्णे १, उवसंता कसाया खओवसमिआइं इंदिआइं पारिणामिए जीवे, एस णं से णामे उवसमिएखओवसमिएपारिणामिअनिप्फण्णे ९, कयरे से णामे खइएखओवसमिएपारिणामिअनिप्फण्णे १, खइअं सम्मत्तं खओवसमिआइं इंदिआइं पारिणामिए जीवे, एस णं से णामे खइएखओवसमिएपारिणामिअनिप्फण्णे १० । तत्थ णं जे ते पंच चउकसंजोगा ते णं इमे-अत्थि णामे उदइएउवसमिएखइएखओवसमनिप्फण्णे १ अत्थि णामे उदइएउवसमिएखइएपारिणामिअनिप्फण्णे २ अत्थि णामे उदइएउवसमिएखओवसमिएपारिणामिअनिप्फण्णे ३ अत्थि णामे उदइएखइएखओवसमिएपारिणामिअनिप्फण्णे ४ अत्थि णामे उवसमिएखइएखओवसमिएपारिणामिअनिप्फण्णे ५, कयरे से णामे उदइएउवसमिएखइएखओवसमनिप्फण्णे १, उदइएत्ति मणुस्से उवसंता कसाया खइअं सम्मत्तं खओवसमिआइं इंदिआइं, एस णं से णामे उदइएउवसमिएखइएखओवसमनिप्फण्णे १, कयरे से नामे उदइएउवसमिएखइएपारिणामिअनिप्फण्णे १, उदइएत्ति मणुस्से उवसंता कसाया खइअं सम्मत्तं पारिणामिए जीवे, एस णं से णामे उदइएउवसमिएखइएपारिणामिअनिप्फण्णे २, कयरे से णामे उदइएउवसमिएखओवसमिएपारिणामिअनिप्फण्णे १, उदइएत्ति मणुस्से उवसंता कसाया खओवसमिआइं इंदिआइं पारिणामिए जीवे, एस णं से णामे

सुत्रम्.

॥ १९ ॥

उदइएउवसमिएखओव० पारिणा० ३, कयरे से णामं उदइएखइएखओवसमिएपारिणामिअनिप्फण्णे १, उदइएत्ति मणुस्से
 खइअं सम्मत्तं खओवसमिआइं इंदिआइं पारिणामिए जीवे, एस णं से नामे उदइएखइएखओवसमिएपारिणामिअनिप्फण्णे ४,
 कयरे से नामे उवसमिएखइएखओवसमिएपारिणामिअनिप्फण्णे १, उवसंता कसाया खइअं सम्मत्तं खओवसमिआइं इंदिआइं
 पारिणामिए जीवे, एस णं से नामे उवसमिएखइएखओवसमिएपारिणामिअनिप्फण्णे ५ । तत्थ णं जे ते एके पंचगसंजोए से
 णं इमे-अत्थि नामे उदइएउवसमिएखइएखओवसमिएपारिणामिअनिप्फण्णे १, कयरे से नामे उदइएउवसमिएखइएखओवस-
 मिएपारिणामिअनिप्फण्णे १, उदइएत्ति मणुस्से उवसंता कसाया खइअं सम्मत्तं खओवसमिआइं इंदिआइं पारिणामिए जीवे,
 एस णं से णामे जाव पारिणामिअनिप्फण्णे, से तं सन्निवाइए, से तं छण्णामे (सू० १२७) से किं तं सत्तनामे १, २ सत्तसरा
 पण्णत्ता, तंजहा-सज्जे रिसहे गंधारे, मज्झिमे पंचमे सरं । रेवए चेव नेसाए, सरा सत्त विआहिआ ॥ १ ॥ एएसि णं सत्तण्हं
 सराणं सत्त सरट्ठाणा पण्णत्ता, तंजहा-सज्जं च अग्गजीहाए, उरेण स्सिहं सरं । कंदुग्गएण गंधारं, मज्झजीहाए मज्झिमं ॥ २ ॥
 नासाए पंचमं बूआ, दंतोद्वेण अ रेवतं । भमुहक्खेवेण णेसाहं, सरट्ठाणा विआहिआ ॥ ३ ॥ सत्तसरा जीवणिसिआ पण्णत्ता,
 तंजहा-सज्जं रवइ मऊरो, कुकडो रिसमं सरं । हंसो रवइ गंधारं, मज्झिमं च गवेलगा ॥ ४ ॥ अह कुसुमसंभवे काले, कोइला
 पंचमं सरं । छट्ठं च सारसा कुंचा, नेसायं सत्तमं गओ ॥ ५ ॥ सत्तसरा अजीवणिसिआ पण्णत्ता, तंजहा-सज्जं रवइ मुअंगो,
 गोमुही रिसहं सरं । संखो रवइ गंधारं, मज्झिमं पुण जल्लरी ॥ ६ ॥ चउसरणपइट्ठाणा, गोहिआ पंचमं सरं । आडंबरो रेवइयं,
 महामेरी अ सत्तमं ॥ ७ ॥ एएसि णं सत्तण्हं सराणं सत्तसरलक्खणा पण्णत्ता, तंजहा-सज्जेण लहई वित्तिं, कयं च न विणस्सइ ।

गावो पुत्ता य मित्ता य, नारीणं होइ वल्लहो ॥ ८ ॥ रिसहेण उ एसजं (पसेजं), सेणावच्चं धणाणि अ । वत्थगंधमलंकारं, इत्थिओ सयणाणि य ॥ ९ ॥ गंधारे गीतजुत्तिण्णा, वज्रवित्ती कलाहिआ । हवन्ति कइणो धण्णा, जे अण्णा (जे अण्णे) सत्थपा-
रगा ॥ १० ॥ मज्झिमसरमंता उ, हवन्ति सुहजीविणो । खायई पियई देई, मज्झिमसरमस्सिओ ॥ ११ ॥ पंचमसरमंता उ, हवन्ति पुहवीपई । स्ररा संगहकचारो, अणेगगणनायगा ॥ १२ ॥ रेवयसरमंता उ, हवन्ति दुहजीविणो । कुचेला य कुवित्ती य, चोरा चंडालमुट्टिया ॥ १३ ॥ णिसायसरमंता उ, हवन्ति कलहकारगा । जंघाचरा लेहवाहा, हिंडगा भारवाहगा ॥ १४ ॥ एएसि णं सत्तण्हं सराणं तओ गामा पण्णत्ता, तंजहा-सज्जगामे मज्झिमगामे गंधारगामे, सज्जगामस्स णं सत्त मुच्छणाओ पण्णत्ताओ, तंजहा-मग्गी कोरविआ हरिया, रयणी अ सारकंता य । छट्ठी अ सारसी नाम, सुद्धसज्जा य सत्तमा ॥ १५ ॥ मज्झिमगामस्स णं सत्त मुच्छणाओ पण्णत्ताओ, तंजहा-उत्तर मंदारयणी, उत्तरा उत्तरासमा । समोक्कंता य सोवीरा, अभि-
रूवा होइ सत्तमा ॥ १६ ॥ गंधारगामस्स णं सत्त मुच्छणाओ पण्णत्ताओ, तंजहा-नंदी अ खड्ढिआ पूरिमा य चउत्थी अ सुद्धगंधारा । उत्तरगंधारावि अ सा पंचमिआ हवइ मुच्छा ॥ १७ ॥ सुद्धुत्तरमायामा सा छट्ठी सव्वओ य णायवा । अह उत्तरायया कोडिमा य सा सत्तमी मुच्छा ॥ १८ ॥ सत्तसरा कओ हवन्ति ? गीयस्स का हवइ जोणी । कइसमया ओसासा, कइ वा गीयस्स आगारा ॥ १९ ॥ सत्तसरा नाभीओ हवन्ति गीयं च रुइयजोणी । पायसमा ऊसासा तिण्णि य गीयस्स आगारा ॥ २० ॥ आइमउ आरमंता समुबहन्ता ण मज्झयारंमि । अवसाणे उज्झंता, तिन्निवि गीयस्स आगारा ॥ २१ ॥ छट्ठोसे अट्ठगुणे तिण्णि अ विचाइं दो य भणिईओ । जो नाही सो गाहिइ, सुसिक्खिओ रंगमज्झंमि

॥ २२ ॥ भीअं दुअं उप्पिच्छं उत्तालं च कमसो म्पुणेअव्वं । कामस्सस्मण्णासं छद्दोसा होति गेअस्स ॥ २३ ॥ पुण्णं रत्तं
 च अलंकिअं च वत्तं च तहेवमविघुट्ठं । महुरं समं सुललिअं अट्ठ गुणा होति गेअस्स ॥ २४ ॥ उरकंठसिरविसुट्ठं च गिज्जंते
 मउअरिभिअपदबद्धं । समतालपडुक्खेवं सत्तस्सरसीभरं गीयं ॥ २५ ॥ अक्खरसमं पदसमं, तालसमं लयसमं च गेहसमं । नीस-
 सिओससिअसमं, संचारसमं सरा सत्त ॥ २६ ॥ निहोसं सारमंतं च, हेउजुत्तमलंकियं । उवणीअं सोवयारं च, मिअं महुर-
 मेव य ॥ २७ ॥ समं अट्ठसमं चेव, सवत्थ विसमं च जं । तिण्णि वित्तपयाराइं, चउत्थं नोवलब्भइ ॥ २८ ॥ सक्कया पायया
 चेव, भणिईओ होति दोण्णि वा । सरमंडलंमि गिज्जंते, पसत्था इसिभासिआ ॥ २९ ॥ केसी गायइ महुरं केसी गायइ स्वरं च
 रुक्खं च । केसी गायइ चउरं केसी अ विलंबिअं दुतं केसी ? ॥ ३० ॥ विस्सरं पुण केरिसी गाथाऽधिकमिदं । गोरी गायति
 महुरं सामा गायइ स्वरं च रुक्खं च । काली गायइ चउरं काणा य विलंबिअं दुतं अंधा ॥ ३१ ॥ विस्सरं पुण पिंगला,
 गाथाऽधिकमिदमपि । सत्तसरा तओ गामा मुच्छणा इक्कीसई, ताणा एगूणपण्णासं, सम्मत्तं सरमंडलं ॥ ३२ ॥ से तं
 सत्तनामे (सू० १२८) से किं तं अट्ठनामे ? १ अट्ठविहा वयणविभत्ती पण्णत्ता, तंजहा-निदेसे पढमा होइ, बितिआ उव-
 एसणे । तईया करणंमि कया, चउत्थी संपयागणे ॥ १ ॥ पंचमी अ अवायाणे, छट्ठी सस्सामिवायणे । सत्तमी सण्णिहा-
 णत्थे, अट्ठमाऽऽमंतणी भवे ॥ २ ॥ तत्थ पढमा विभत्ती निदेसे सो इमो अहं वत्ति । बिइआ पुण उवएसे भण कुणसु इमं
 व तं वत्ति ॥ ३ ॥ तईआ करणंमि कया भणिअं च कयं च तेण व मए वा । हंदि णमो साहाए, हवइ चउत्थी पयाणंमि
 ॥ ४ ॥ अवणय मिण्ह य एत्तो इउत्ति वा पंचमी अवायाणे । छट्ठी तस्स इमस्स व गयस्स वा सामिसंबंधे ॥ ५ ॥ हवइ

पुण सत्तमी तं इमंमि आहारकालभावे अ । आमंतणी भवे अट्टमी उ जहा हे जुवाणत्ति ॥ ६ ॥ से तं अट्टणामे (सू० १२९)
से किं तं नवनामे ?, २ णव कवरसा पणत्ता, तंजहा-वीरो सिंगारो अब्भुओ अ रोदो अ होइ बोद्धवो । वेलणओ बीभच्छो
हासो कलुणो पसंतो अ ॥ १ ॥ तत्थ परिच्चायंमि अ दाणतवचरणसत्तुजणविणासे अ । अणणुसयधितिपरक्कमलिंगो वीरो रसो
होइ ॥ २ ॥ वीरो रसो जहा-सो नाम महावीरो जो रज्जं पयहिऊण पवइओ । कामकोहमहासत्तु पक्खनिग्घायणं कुणइ ॥ ३ ॥
सिंगारो नाम रसो रतिसंजोगाभिलाससंजणणो । मंडणविलासविबोअहासलीलारमणलिंगो ॥ ४ ॥ सिंगारो रसो जहा-
महुरविलाससललिअं हियउम्मादणकरं जुवाणाणं । सामा सहुदामं दाएती मेहलादामं ॥ ५ ॥ विम्हयकरो अपुवो अनुभू-
अपुवो य जो रसो होइ । हरिसविसाउप्पत्तिलक्खणो अब्भुओ नाम ॥ ६ ॥ अब्भुओ रसो जहा-अब्भुअतरमिह एत्तो अन्नं
किं अत्थि जीवलोगंमि । जं जिणवयणे अत्था तिकालजुत्ता मुणिजंति ? ॥ ७ ॥ भयजणणरूवसदंधयारचिताकहासमुप्पण्णो ।
संमोहसंभमविसायसरणलिंगो रसो रोदो ॥ ८ ॥ रोदो रसो जहा-भिउडीविडंबिअमुहो संदट्ठोडु इअ रुहिरमाक्किणो । हणसि
पसुं असुरणिभो मीमरसिअ अइरोइ ! रोदोऽसि ॥ ९ ॥ विणओवयारगुज्झगुरुदारमेरावइक्कमुप्पण्णो । वेलणओ नाम रसो
लज्जासंकाकरणलिंगो ॥ १० ॥ वेलणओ रसो जहा-किं लोइअकरणीओ लज्जणीअतरंति लज्जयामुत्ति । वारिजंमी गुरुयणो
परिवंदइ जं बहुप्पोत्तं ॥ ११ ॥ असुइकुणिमदुइंसणसंजोगब्भासगंधनिप्फण्णो । निव्वेअविहिंमालक्खणो रसो होइ बीभत्सो ॥ १२ ॥
बीभत्सो रसो जहा-असुइमलभरियनिज्झरसभावदुग्गंधिसवकालंपि । धण्णा उ सरीरकलिं बहुमलकलुसं विमुंचंति ॥ १३ ॥ रूवव-
यवेसभासाविवरीअविलंबणासमुप्पण्णो । हासो मणप्पहासो पमासलिंगो रसो होइ ॥ १४ ॥ हासो रसो जहा-पासुत्तमसीमंडि-

अपडिबुद्धं देवरं पलोअंति । ही जह थणभरकंपणपणमिअमज्झा हसइ सामा ॥ १५ ॥ पिअविप्पओगबंधवहवाहिविणिवाय-
 संममुप्पण्णो । सोइअविलविअपम्हाणरुण्णलिङ्गो रसो करुणो ॥ १६ ॥ करुणो रसो जहा-पज्झायकिलामिअयं बाहागयपप्पु-
 अच्छिअं बहुसो । तस्स त्रिओगे पुत्तिय ! दुब्बलयं ते मुहं जायं ॥ १७ ॥ निदोसमणसमाहाणसंभवो जो पसंतभावेणं ।
 अविकारलक्खणो सो रसो पसंतोत्ति णायवो ॥ १८ ॥ पसंतो रसो जहा-सम्भावनिविगारं उवसंतपसंतसोमदिट्ठीअं । ही
 जह मुणिणो सोइइ मुहुकमलं पीवरसिरीअं ॥ १९ ॥ एए नव कवरसा बत्तीसादोसविहिसमुप्पण्णा । गाहाहिं मुणियवा हवंति
 सुद्धा व मीसा वा ॥ २० ॥ से तं नवनामे (सू० १३०) से किं तं दसनामे ?, २ दसविहे पण्णत्ते, तंजहा-गोण्णे नोगोण्णे
 आयाणपण्णं पडिवक्खपण्णं पहाणयाए अणाइअसिद्धंतेणं नामेणं अवयवेणं संजोगेणं पमाणेणं । से किं तं गोण्णे ?, २ स्वम-
 ईत्ति स्वमगो तवइत्ति तवणो जलइत्ति जलणो पवइत्ति पवणो, से तं गोण्णे । किं तं नोगोण्णे ?, अकुंतो सकुंतो अमुग्गो समुग्गो
 अमुद्दो समुद्दो अलालं पलालं अकुलिआ सकुलिआ नो पलं असइत्ति पलासो अमाइवाहए माइवाहए अबीअवावए बीअवावए
 नो इंदगोवए इंदगोवे से तं नोगोण्णे । से किं तं आयाणपण्णं ?, २ (धम्मोमंगलं चूलिआ) आवंती चाउरंगिज्जं असंखयं अहा-
 तत्थिज्जं अइइज्जं जण्णइज्जं पुरिसइज्जं (उमुकारिज्जं) एलइज्जं वीरियं धम्मो मग्गो समोसरणं जंमइअं, से तं आयाणपण्णं ।
 से किं तं पडिवक्खपण्णं ?, २ नवेसु गामागरणगरखेडकवडमडंबदोणमुहपट्टणासमसंवाहसन्निवेसेसु संनिविस्समाणेसु
 असिवा सिवा अग्गी सीअलो विसं महुरं कल्लालघरेसु अंबिलं साउअं जे रत्तए से अलत्तए जे लाउए से अलाउए जे सुंमए
 से कुसुंमए अलत्तंते विवलीअमासए, से तं पडिवक्खपण्णं । से किं तं पाहणयाए ?, असोमवणे सत्तवण्णवणे चंपगवणे

चूअवणे नागवणे पुन्नागवणे उच्छुवणे दक्खवणे सालिवणे, से तं पाहणयाए । से किं तं अणाइयसिद्धंतेणं ? , धम्मत्थिकाए अधम्मत्थिकाए आगासत्थिकाए जीवत्थिकाए पुग्गलत्थिकाए अद्वासमए, से तं अणाइयसिद्धंतेणं । से किं तं नामेणं ? , २ पिउपिआमहस्स नामेणं उन्नामिअइ (ए), से तं णामेणं । से किं तं अवयवेणं ? , २-सिंगी सिही विसाणी दाडी पक्खी खुरी नही वाली । दुपए चउप्पय बहुपया नंगुली केसरी कउही ॥ १ ॥ परिअरबंधेण भडं जाणिजा महिलिअं निवसणेणं । सित्थेण दोणवायं कविं चइकाए गाहाए ॥ २ ॥ से तं अवयवेणं । से किं तं संजोएणं ? , संजोगे चउविहे पण्णत्ते, तंजहा-दवसंजोगे खेत्तसंजोगे कालसंजोगे भावसंजोगे । से किं तं दवसंजोगे ? , २ तिविहे पण्णत्ते, तंजहा-सचित्ते अचित्ते मीसए । से किं तं सचित्ते ? , २ गोहिं गोमिए महिसीहिं महिसए ऊरणीहिं ऊरणीए उट्ठीहिं उट्ठीवाले, से तं सचित्ते । से किं तं अचित्ते ? , २ छत्तेण छत्ती दंडेण दंडी पडेण पडी घडेण घडी कडेण कडी, से तं अचित्ते । से किं तं मीसए ? २ हलेणं हालिए सगडेणं सागडिए रहेणं रहिए नावाए नाविए, से तं दवसंजोगे । से किं तं खित्तसंजोगे ? , २ भारहे एरवए हेमवए एरण्णवए हरिवासए रम्म-यवासए देवकुरुए उत्तरकुरुए पुवविदेहए, अवरविदेहए, अहवा मागहे मालवए सोरट्टए मरहट्टए कुंकणए, से तं खेत्तसंजोगे से किं तं कालसंजोगे ? , २ सुसमसुसमाए सुसमाए सुसमदुसमाए दुसमसुसमाए दुसमाए दुसमदुसमाए, अहवा पावसए वासार-त्तए सरदए हेमंतए वसंतए गिम्हए, से तं कालसंजोगे ? , से किं तं भावसंजोगे ? , २ दुविहे पण्णत्ते, तंजहा-पसत्थे अ अपसत्थे अ । से किं तं पसत्थे ? , २ नाणेणं नाणी दंसणेणं दंसणी चरित्तेणं चरिती, से तं पसत्थे । से किं तं अपसत्थे ? , २ कोहेणं कोही माणेणं माणी मायाए मायी लोहेणं लोही, से तं अपसत्थे, से तं भावसंजोगे, से तं संजोएणं । से किं तं

पमाणेणं ? २ चउव्विहे पण्णत्ते, तंजहा-नामप्पमाणे ठवणप्पमाणे दव्वप्पमाणे भावप्पमाणे । से किं तं नामप्पमाणे ? २
 जस्स णं जीवस्स वा अजीवस्स वा जीवाण वा अजीवाण वा तदुभयस्स वा तदुभयाण वा पमाणेत्ति नामं कज्जइ से तं णामप्प-
 भाणे । से किं तं ठवणप्पमाणे ? २ सत्तविहे पण्णत्ते, तंजहा-णक्खत्तदेवयकुले पासंडगणे अ जीविआहेउं । आभिप्पाइअणामे
 ठवणानामं तु सत्तविहं ॥ १ ॥ से किं तं णक्खत्तणामे ? २ कित्तिआहिं जाए कित्तिए कित्तिआदिण्णे कित्तिआधम्ममे कित्तिआसम्ममे
 कित्तिआदेवे कित्तिआदासे कित्तिआसेणे कित्तिआरक्खिए रोहणीहिं जाए रोहिणिए रोहिणिदिन्ने रोहिणिधम्ममे रोहिणिसम्ममे
 रोहिणिदेवे रोहिणिदासे रोहिणिसेणे रोहिणिरक्खिए य, एवं सव्वनक्खत्तेसु नामा भाणिअव्वा । एत्थं संगहणिगाहाओ-कित्ति-
 अरोहिणिभिगसिरअद्दा य पुणव्वसू अ पुस्से अ । तत्तो अ अस्सिलेसा महा उ दो फग्गुणीओ अ ॥ १ ॥ हत्थो चित्ता साती
 विसाहा तह य ग होइ अणुराहा । जेट्ठा मूला पुद्वासाढा तह उत्तरा चेव ॥ २ ॥ अभिई सवण धणिट्ठा सतभिसदा दो अ
 होंति भद्दवया । रेवई अस्सिणि भरणी एसा नक्खत्तपरिवाडी ॥ ३ ॥ से तं नक्खत्तनामे । से किं तं देवयाणामे ? २
 अग्गिदेवयाहिं जाए अग्गिए अग्गिदिण्णे अग्गिसम्ममे अग्गिधम्ममे अग्गिदेवे अग्गिदासे अग्गिसेणे अग्गिरक्खिए एवं सव्वन-
 क्खत्तदेवयानामा भाणिअव्वा । एत्थं पि संगहणिगाहाओ-अग्गिपयावइ सोमे रुद्धो अदिती विहस्सई सप्पे । पित्ति भग अज्जम
 सविआ तट्ठा वाऊ अ इंदग्गी ॥ १ ॥ मित्तो इंदो निरई आऊ विस्सो अ वंभ विण्हूआ । वसु वरुण अयविबद्धि पूसे आसे
 जमे चेव ॥ २ ॥ से तं देवयाणामे । से किं तं कुलनामे ? २ उग्गे भोगे रायण्णे खत्तिए इक्खाने णाते कोरवे, से तं कुल-
 नामे । से किं तं पासंडनामे ? २-समणे य पंडुरंगे भिक्खू कावालिये अ तावसए परिवायगे, से तं पासंडनामे । से किं तं

गणनामे ? २ मल्ले मल्लदिन्ने मल्लधम्ममे मल्लसम्ममे मल्लदेवे मल्लसेणे मल्लरक्खिण्ण, से तं गणनामे । से किं तं जीवियनामे ?, २ अवकरण उक्कुरुडए उज्झिअए कज्जवए सुप्पए, से तं जीवयनामे । से किं तं आभिप्पाइअनामे ?, २ अंबए निंबए बकुलए पलासए सिणए पिल्लए करीरए, से तं आभिप्पाइअनामे । से तं ठवणप्पमाणे । से किं तं दवप्पमाणे ?, २ छविहे पण्णत्ते, तंजहा-धम्मत्थिकाए जाव अद्दासमए, से तं दवप्पमाणे । से किं तं भावप्पमाणे ?, २ चउविहे पण्णत्ते, तंजहा-सामासिए तद्वियए धाउए निरुत्तिए । से किं तं सामासिए ?, २ सत्त समासा भवंति, तंजहा-दंदे अ बहुवीही, कम्मधारय दिग्गु अ । तप्पुरिस अब्बईभावे, एकसेसे अ सत्तमे ॥ १ ॥ से किं तं दंदे ?, २ दन्ताश्च ओष्ठौ च दन्तोष्ठं, स्तनौ च उदरं च स्तनोदरं, वस्त्रं च पात्रं च वस्त्रपात्रम्, अश्वाश्च महिषाश्च अश्वमहिषम्, अहिश्च नकुलश्च अहिनकुलं, से तं दंदे समासे । से किं तं बहुवीही-समासे ?, २ फुल्ला इमंमि गिरिंमि कुडयकयंबा सो इमो गिरी फुल्लियकुडयकयंबो, से तं बहुवीहीसमासे । से किं तं कम्म-धारए ?, २ धवलो वसहो धवलवसहो, किण्हो मियो किण्हमियो, सेतो पडो सेतपडो, रत्तो पडो रत्तपडो, से किं तं कम्म-धारए । से किं तं दिगुसमासे ?, २ तिण्णि कडुगाणि तिकडुगं, तिण्णि महुराणि तिमहुरं, तिण्णि गुणाणि तिगुणं, तिण्णि पुराणि तिपुरं, तिण्णि सराणि तिसरं, तिण्णि पुक्खराणि तिपुक्खरं, तिण्णि बिंदुआणि तिबिंदुअं, तिण्णि पहाणि तिपहं, पंच नईओ पंचणयं, सत्त गया सत्तगयं, नव तुरंगा नवतुरंगं, दस गामा दसगामं, दस पुराणि दसपुरं, से तं दिगुसमासे । से किं तं तप्पुरिसे ?, २ तित्थे कागो तित्थकागो, वणे हत्थी वणहत्थी, वणे वराहो वणवराहो, वणे महिसो वणमहिसो, वणे मयूरो वणम-यूरो, से तं तप्पुरिसे । से किं तं अब्बईभावे ?, २ अणुगामं अणुणइयं अणुफरिहं अणुचरिअं, से तं अब्बईभावे समासे । से किं तं

एगसेसे ?, २ जहा एगो पुरिसो तहा बहवे पुरिसा जहा बहवे पुरिसा तहा एगो पुरिसो, जहा एगो करिसावणो तहा बहवे
 करिसावणा जहा बहवे करिसावणा तहा एगो करिसावणो, जहा एगो साली तहा बहवे साली जहा बहवे साली तहा एगो
 साली, से तं एगसेसे समासे । से तं समासिए । से किं तं तद्धितए ?, २ अट्टविहे पण्णत्ते, तंजहा-कम्मे सिप्पसिलोए
 संजोगसमीवओ अ संजूहो । इस्सरिअ अवच्चेण य तद्धितणामं तु अट्टविहं ॥ १ ॥ से किं तं कम्मणामे ? २ तणहारए कट्ट-
 हारए पत्तहारए दोसिए सोत्तिए कप्पासिए भंडवेआलिए कोलालिए, से तं कम्मणामे । से किं तं सिप्पणामे ?, २ तुण्णए
 तंतुवाए पट्टुकारे उण्डे बरुडे गुंजकारे कट्टुकारे छत्तकारे वज्झकारे पोत्थकारे चित्तकारे दंतकारे लेप्पकारे सेलकारे कोट्टि-
 मकारे, से तं सिप्पणामे । से किं तं सिलोअणामे ?, समणे माहणे सत्तातिही, से तं सिलोअणामे । से किं तं संजोगणामे ?,
 २ रण्णो ससुरए रण्णो जामाउए रण्णो साले रण्णो भाउए रण्णो भगिणीवई, से तं संजोगणामे । से किं तं समीवणामे ?,
 २ गिरिसमीवे णयरं गिरिणयरं विदिसासमीवे णयरं वेदिसणयरं बेन्नाए समीवे णयरं बेन्नायडं तगराए समीवे णयरं तग-
 रायडं, से तं समीवणामे । से किं तं संजूहणामे ?, २ तरङ्गवइकारे मलयवइकारे अत्ताणुसट्टिकारे बिंदुकारे, से तं संजूह-
 णामे । से किं तं ईसरिअणामे ?, राईसरे तलवरे माडंबिए कौडुंबिए इब्भे सेट्टी सत्थवाहे सेणावई, से तं ईसरिअणामे ।
 से किं तं अवचणामे?, अरिहंतमाया चक्रवट्टिमाया बलदेवमाया वासुदेवमाया रायमाया मुणिमाया वायगमाया, से तं
 तद्धितए । से तं धाउए ?, २ भू सत्तायां परस्मैभाषा एध वृद्धौ स्पर्द्धे संहर्षे गाष्ट्र प्रतिष्ठालीप्सयोर्ग्रन्थे च वाष्ट्र लोडने, से
 तं धाउए । से किं तं निरुत्तिए ?, २ मक्षां शेते महिषः, भ्रमति च रौति च भ्रमरः मुहुर्मुहुर्लसतीति मुसलं कपेरिव लम्बते

त्येति च करोति कपित्थं चिदितिकरोति स्वहं च भवति चिक्खहं ऊर्ध्वकर्णः उल्लङ्घः मेखस्य माला मेखला, से तं निरुत्तिए । से तं भावपमाणे । से तं पमाणनामे । से तं दसनामे । से तं नामे । नामेति पयं सम्मत्तं । (सू० १३१) से किं तं पमाणे ?, २ चउव्विहे पण्णत्ते, तंजहा-दव्वपमाणे खेत्तपमाणे कालप्पमाणे भावप्पमाणे (सू० १३२) । से किं तं दव्वप्पमाणे ?, २ दुव्विहे पण्णत्ते, तंजहा-पएसनिप्फण्णे, अ विभागनिप्फण्णे अ । से किं तं पएसनिप्फण्णे ?, २ परमाणुपोग्गले दुपएसिए जाव दसपएसिए संखिज्जपएसिए असंखिज्जपएसिए अणंतपएसिए, से तं पएसनिप्फण्णे । से किं तं विभागनिप्फण्णे ?, २ पंचविहे पण्णत्ते, तंजहा-माणे उम्माणे अवमाणे गणिमे पडिमाणे । से किं तं माणे ?, २ दुव्विहे पण्णत्ते, तंजहा-धन्ममाणप्पमाणे अ रसमाणप्पमाणे अ । से किं तं धन्ममाणपमाणे ?, २ दो असईओ पसई दो पसई ओ सेतिया चत्तारि सेइआओ कुलओ चत्तारिकुलया पत्थो चत्तारि पत्थया आढगं चत्तारि आढगाइ दोणो सट्ठि आढयाइं जहन्नए कुंभे असीइ आढयाइं मज्झिमए कुंभे आढयसयं उक्कोसए कुंभे अट्ठ य आढयसइए वाहे, एएणं धण्णमाणपमाणेणं किं पओअणं ?, एएणं धण्णमाणपमाणेणं मुत्तोलीमुखइदुरअलिंदओचारसंसियाणं धण्णाणं धण्णमाणप्पमाणनिव्वित्तिलक्खणं भवइ, से तं धण्णमाणपमाणे । से किं तं रसमाणप्पमाणे ?, २ धण्णमाणप्पमाणाओ चउभागविवड्डिए अर्ब्भितरसिहाजुत्ते रसमाणप्पमाणे विहिज्जइ, तंजहा-चउ-सट्ठिआ ४ [चउपलपमाणा] बत्तीसिआ ८ सोलसिआ १६ अट्ठभाइआ ३२ चउभाइआ ६४ अट्ठमाणी १२८ माणी २५६ दो चउसट्ठिआओ बत्तीसिआ दो बत्तीसिआओ सोलसिआ दो सोलसिआओ अट्ठभाइआ दो अट्ठभाइआओ चउभाइया दो चउभाइयाओ अट्ठमाणी दो अट्ठमाणीओ माणी, एएणं रसमाणपमाणेणं किं पओअणं ?, २ एएणं

रसमाणेणं वारकघडककरककलसिअगागरिदइअकरोडिअकुंडिअसंसियाणं रसाणं रसमाणप्पमाणनिवित्तिलक्खणं भवइ, से तं
 रसमाणपमाणे, से तं माणे । से किं तं उम्माणे ?, २ जणं उम्मणिज्झइ, तंजहा-अद्धकरिसो करिसो पलं अद्धपलं अद्धतुला
 तुला अद्धभारो भारो, दो अद्धकरिसा करिसो दो करिसा अद्धपलं दो अद्धपलाइं पलं पंच पलसइआ तुला दस तुलाओ
 अद्धभारो वीसं तुलाओ भारो, एएणं उम्माणपमाणेणं किं पओअणं ? एएणं उम्माणपमाणेणं पत्ताअंगरतगरचोअअकुं-
 कुमखंडगुलमच्छंडिआईणं दद्याणं उम्माणपमाणनिवित्तिलक्खणं भवइ, से तं उम्माणपमाणे । से किं तं ओमाणे ?,
 २ जणं ओमिणिज्झइ, तंजहा-हत्थेण वा दंडेण वा धणुकेण वा जुगेण वा नालिआए वा अक्खेण वा मुसलेण वा-दंडधणू-
 जुगनालिआ य अक्खमुसलं च चउहत्थं । दसनालिअं च रज्जुं विआण ओमाणसण्णाए ॥१॥ वत्थुंमि हत्थमेज्जं खित्ते दंडं
 धणुं च पत्थंमि । खायं च नालिआए विआण ओमाणसण्णाए ॥१॥ एएणं अवमाणपमाणेणं किं पओअणं ?, एएणं अवमा-
 णपमाणेणं खायचिअकरकचियकडपडमित्तिपरिक्खेवसंसियाणं दद्याणं अवमाणपमाणनिवित्तिलक्खणं भवइ, से तं अवमाणे ।
 से किं तं गणिमे ?, २ जणं गणिज्झइ, तंजहा-एगो दस सयं सहस्सं दससहस्साइं सयसहस्सं दससयसहस्साइं कोडी, एएणं
 गणिमप्पमाणेणं किं पओअणं ?, एएणं गणिमपमाणेणं भित्तगभित्तिभत्तवेअणआयव्वयसंसिआणं दद्याणं गणियप्पमाणनिवित्ति-
 लक्खणं भवइ, से तं गणिमे । से किं तं पडिमाणे ?, २ जणं पडिमिणिज्झइ, तंजहा-गुंजा कागणी निप्फावो कम्ममासओ
 मंडलओ सुवण्णो, पंच गुंजाओ कम्ममासओ कागण्यपेक्षया, चत्तारि कागणीओ कम्ममासओ तिण्णि निप्फावा कम्ममासओ
 एवं चउको कम्ममासओ कागण्यपेक्षयेत्यर्थः, वारस कम्ममासया मंडलओ एवं अडयालिसं कागणीओ मंडलओ सोलस

अनुयोग

द्वार-

॥ २५ ॥

कम्ममासया सुवण्णो एवं चउसट्ठि कागणीओ सुवण्णो, एएणं पडिमाणपमाणेणं किं पओअणं ?, एएणं पडिमाणपमाणेणं सुवण्णरजतमणिमोत्तिअसंखसिलप्पवालाईणं दव्वाणं पडिमाणपमाणनिव्वित्तिलक्खणं भवइ, से तं पडिमाणे । से तं विभाग-
निप्फण्णे । से तं दव्वपमाणे (सू० १३३) से किं तं खेत्तपमाणे ?, २ दुविहे पण्णत्ते, तंजहा-पएसणिप्फण्णे अ विभागणि-
प्फण्णे अ । से किं तं पएसणिप्फण्णे ?, २ एगपएसोगाढे दुपएसोगाढे तिपएसोगाढे संखिज्जप० असंखिज्जप०, से तं पएस-
णिप्फण्णे । से किं तं विभागणिप्फण्णे ?, २-अंगुलविहत्थिरयणी कुच्छी धणु गाउअं च बोद्धवं । जोयण सेढी पयरं लोगम-
लोगेऽवि अ तहेव ॥१॥ से किं तं अंगुले ?, २ तिविहे पण्णत्ते, तंजहा-आयंगुले उस्सेहंगुले पमाणंगुले । से किं तं आयंगुले ?,
२ जे णं जया मणुस्सा भवंति तेसि णं तया अप्पणो अंगुलेणं दुवालसअंगुलाईं मुहं नवमुहाइं पुरिसे पमाणजुत्ते भवइ, दो-
णिणए पुरिसे माणजुत्ते भवइ, अद्धभारं तुल्लमाणे पुरिसे उम्माणजुत्ते भवइ, -माणुम्माणपमाणजुत्ता(णय) लक्खणवंजणगुणेहिं
उववेआ । उत्तमकुलप्पसूआ उत्तमपुरिसा मुणेअवा ॥१॥ होंति पुण अहियपुरिसा अट्ठसयं अंगुलाणं उव्विद्धा । छण्णउइ अहम्मपुरिसा
चउत्तरं मज्झिमिल्ला उ ॥२॥ हीणा वा अहिया वा जे खलु सरसत्तसारपरिहीणा । ते उत्तमपुरिसाणं अवस्स पेसत्तणमुव्वेति ॥३॥
एएणं अंगुलपमाणेणं छ अंगुलाईं पाओ दो पाया विहत्थी दो विहत्थीओ रयणी दो रयणीओ कुच्छी दो कुच्छीओ दंडं धणू
जुगे नालिआ अक्ख मुसले दो धणुसहस्साइ गाइअं चत्तारि गाउआई जोअणं । एएणं आयंगुलपमाणेणं किं पओअणं ?,
२ एएणं आयंगुलेणं जे णं जया मणुस्सा हवंति तेसि णं तया णं आयंगुलेणं अगडतलागदहनदीवाविपुक्खरिणीदीहियगुंजा-
लिआओ सरा सरपंतिआओ सरसरपंतिआओ बिलपंतिआओ आरामुज्जाणकाणवणवणसंडवणराईओ देउलसभापवाधूभस्वाइ-

सूत्रम्.

॥ २५ ॥

अपरिहाओ पागारअड्डालयचरिअदारगोपुरपासायघरसरणलयणआवणसिंघाडगतिगचउकचचरचउम्मुहमहापहपहसगडरहजाण-
 जुग्गगिल्लिथिल्लिसिविअसंदमाणिआओ लोहीलोहकडाहकडिल्लयमंडमत्तोवगरणमाईणि अज्जकालिआइं च जोअणाइं मविजंति,
 से समासओ तिविहे पण्णत्ते, तंजहा-सुईअंगुले पयरंगुले घणंगुले, अंगुलायया एगपएसिया सेठी सुईअंगुले, सुई सुईगुणिया
 पयरंगुले, पयरं सुईए गुणितं घणंगुले । एसि णं भंते ? सुईअंगुलपयरंगुलघणंगुलाणं कयरे कयरेहितो अप्पा वा बहुया वा
 तुल्ला वा विसेसाहिया वा ?, सवथोवे सुईअंगुले, पयरंगुले असंखेज्जगुणे, घणंगुले असंखिज्जगुणे, से तं आयंगुले । से किं तं
 उस्सेहंगुले ?, २ अणेगविहे पण्णत्ते, तंजहा-परमाणू तसरेणू रहरेणू अग्गयं च वालस्स । लिक्खा जूआ य जवो अट्ठगुण-
 विवड्ढिआ कमसो ॥ १ ॥ से किं तं परमाणू ?, २ दुविहे पण्णत्ते, तंजहा-सुहुमे अ ववहारिए अ, तत्थ णं जे से सुहुमे से
 ठप्पे, तत्थ णं जे से ववहारिए से णं अणंताणंताणं सुहुमपोग्गलाणं समुदयसमितिसमागमेणं ववहारिए परमाणुपोग्गले नि-
 प्फज्जइ, से णं भंते ! असिधारं वा खुरधारं वा ओगाहेज्जा ?, हन्ता ओगाहेज्जा, से णं तत्थ छिजेज्ज वा भिजेज्ज वा ?, नो
 इण्ढे समट्ठे, नो खलु तत्थ सत्थं कमइ, से णं भंते ! अगणिकायस्स मज्झंमज्जेणं वीइवएज्जा ? हंता विइवएज्जा, से णं भंते !
 तत्थ डहेज्जा ?, नो इण्ढे समट्ठे, नो खलु तत्थ सत्थं कमइ, से णं भंते ! पुक्खरसंवट्ठगस्स महामेहस्स मज्झंमज्जेणं वीइव-
 एज्जा ?, हंता वीइवएज्जा, से णं तत्थ उदउल्ले सिआ ?, नो इण्ढे समट्ठे, णो खलु तत्थ सत्थं कमइ, से णं भंते ! गंगाए
 महाणईए पडिसोयं हवमागच्छेज्जा ?, से णं तत्थ विणिघायमावजेज्जा ?, नो इण्ढे समट्ठे, णो खलु तत्थ सत्थं कमइ, से णं
 भंते ! उदगावत्तं वा उदगबिंदुं वा ओगाहेज्जा ?, हंता ओगाहेज्जा, से णं तत्थ कुच्छेज्जा वा ? परियावजेज्ज वा ?, णो इण्ढे

समष्टे, नो खलु तत्थ सत्थं कमइ, -सत्थेण सुतिकखेणवि छित्तुं भेतुं च जं किर न सक्का । तं परमाणुं सिद्धा वयंति आइं पमाणानं ॥ १ ॥ अणंतणं ववहारिअपरमाणुपोग्गलणं समुदयसमितिसमागमेणं सा एगा उसण्हसण्हिआ इ वा सण्हसण्हिआ इ वा उड्डरेणू इ वा तसरेणू इ वा रहरेणू इ वा, अट्ठ उसण्हसण्हिआओ सा एगा सण्हसण्हिआ, अट्ठ सण्हसण्हिआओ सा एगा उड्डरेणू, अट्ठ उड्डरेणूओ सा एगा तसरेणू, अट्ठ तसरेणूओ सा एगा रहरेणू, अट्ठ रहरेणूओ देवकुरुउत्तरकुरूणं मणुआणं से एगे वालग्गे, अट्ठ देवकुरुउत्तरकुरूणं मणुआण वालग्गा हरिवासरम्मगवासाणं मणुआणं से एगे वालग्गे, अट्ठ हरिवस्सरम्मगवासाणं मणुस्साणं वालग्गा हेमवयहेरणवयाणं मणुस्साणं से एगे वालग्गे, अट्ठ हेमवयहेरणवयाणं मणुस्साणं वालग्गा पुवविदेहअवरविदेहाणं मणुस्साणं से एगे वालग्गे, अट्ठ पुवविदेहअवरविदेहाणं मणुस्साणं वालग्गा भरहएरवयाणं मणुस्साणं से एगे वालग्गे, अट्ठ भरहेरवयाणं मणुस्साणं वालग्गा सा एगा लिक्खा, अट्ठ लिक्खाओ सा एगा जूआ, अट्ठ जूआओ एगे जवमज्जे, अट्ठ जवमज्जे से एगे अंगुले । एएणं अंगुलाणपमाणेणं छ अंगुलाइं पादो बारस अंगुलाइं विहत्थी चउवीसं अंगुलाइं रयणी अडयालीसं अंगुलाइं कुच्छी छन्नवइ अंगुलाइं से एगे दंडे इ वा धणू इ वा जुगे इ वा नालिआ इ वा अक्खे इ वा मुसले इ वा, एएणं धणुप्पमाणेणं दो धणुसहस्साइं गाउअं चत्तारि गाउआई जोअणं । एएणं उस्सेहंगुलेणं किं पओअणं ?, एएणं उस्सेहंगुलेणं णेरइअतिरिक्खजोणिअमणुस्सदेवाणं सरीरोगाहणा मविजंति । णेरइआणं भंते ! के महालिआ सरीरोगाहणा पणत्ता ?, गोयमा ! दुविहा पणत्ता, तंजहा-भवधारणिज्जा य उत्तरवेउविआ य, तत्थ णं जा सा भवधारणिज्जा सा णं जहण्णेणं अंगुलस्स असंखेअइभागं उक्कोसेणं पंच धणुसयाइं, तत्थ णं जा सा उत्तरवेउविआ सा णं जहण्णेणं

अंगुलस्स संखेज्जइभागं उक्कोसेणं धणुसहस्सं, रयणप्पहाए पुढवीए नेरइआणं भंते ! के महालिआ सरीरोगाहणा पण्णत्ता !, गो० ! दुविहा पण्णत्ता, तंजहा-भवधारणिज्जा य उत्तरवेउविआ य, तत्थ णं जा सा भवधारणिज्जा सा जहन्नेणं अंगुलस्स असंखिज्जइभागं उक्कोसेणं सत्त धणूइं तिण्णि रयणीओ छच्च अंगुलाइं, तत्थ णं जा सा उत्तरवेउविआ सा जहन्नेणं अंगुलस्स संखेज्जइभागं उक्कोसेणं पण्णरस धणु दोन्नि रयणीओ बारस अंगुलाइं, सक्करप्पहापुढवीए णेरइआणं भंते ! के महालिआ सरीरोगाहणा पण्णत्ता !, गो० ! दुविहा पण्णत्ता, तंजहा-भवधा० उत्तरवे०, तत्थ णं जा सा भ० सा ज० अंगुलस्स अ० उक्कोसेणं पण्णरस धणूइं दुण्णि रयणीओ बारस अंगुलाइं, तत्थ णं जा सा उत्तरवेउविआ सा जहन्नेणं अंगुलस्स संखेज्जइभागं उक्कोसेणं एकतीसं धणूइं इक्करयणी अ, वालुअप्पहापुढवीए णेरइयाणं भंते ! के महालिआ सरीरोगाहणा प०, गो० ! दुविहा पण्णत्ता, तंजहा-भवधा० उत्तरवे०, तत्थ णं जा सा भव० सा० ज० अंगुलस्स अ० उक्कोसेणं एकतीसं धणूइं इक्करयणी अ, तत्थ णं जा उत्तर० अंगुलस्स संखेज्जइभागं उक्कोसेणं बासट्ठि धणूइं दो रयणीओ अ, एवं सव्वासिं पुढवीणं पुच्छा भाणियद्वा, पंकप्पहाए पुढवीए भवधारणिज्जा जहन्नेणं अंगुलस्स असं० उक्कोसेणं बासट्ठिधणूइं दो रयणीओ अ, उत्तरवे० जहन्नेणं अं० सं० उक्कोसेणं पणवीसंधणूसयं, धूमप्पहाए भवधा० अंगुल० अ० उक्कोसेणं पणवीसंधणुसयं, उत्तरवे० अंगुलस्स संखे० उक्कोसेणं अट्ठाइज्जाइं धणूसयाइं, तमाए भवधारणिज्जा० अंगुलस्स असं० उक्कोसेणं अट्ठाइज्जाइं धणूसयाइं उत्तरवे० अंगुलस्स सं० उक्कोसेणं पंच धणूसयाइं, तमतमाए पुढवीए नेरइयाणं भंते ! के महालिआ सरीरोगाहणा पं० ?, गो० ! दुविहा पण्णत्ता, तंजहा-भवधारणिज्जा य उत्तरवे०, तत्थ णं जा सा भवधारणिज्जा सा जहन्नेणं अंगुलस्स असं० उक्कोसेणं पंच-

अनुयोग

द्वार-

॥ २७ ॥

घणुसयाइं, तत्थ णं जा सा उत्तरवेउविआ सा जहन्नेणं अंगुलस्स सं० उक्कोसेणं घणुसहस्साइं । असुरकुमाराणं भंते ! के महालिआ सरीरोगाहाणं पं० ? गो० ! दुविहा पं० तं०-भवधारणिज्जा उत्तरवेउविआ य, तत्थ णं जा सा भवधारणिज्जा सा जहन्नेणं अं० अ० उक्कोसेणं सत्त रयणीओ, उत्तरवेउविआ सा जहन्नेणं अंगुलस्स सं० उक्कोसेणं जोयणसयसहस्सं, एवं असुरकुमारगमेणं जाव थणियकुमाराणं भाणिअवं । पुढाविकाइआणं भंते ! के महालिआ सरीरोहोगाहणा पं० ? गो० ! जहन्नेणं अंगुलस्स असंखेज्जइभागं उक्कोसेणवि अं०, एवं सुहुमाणं ओहिआणं अपज्जत्तगाणं च भाणिअवं, एवं जाव बादरवाउकाइयाणं पज्जत्तगाणं भाणिअवं, वणस्सइकाइयाणं भंते ! के महा० पं० ? गो० ! जहन्नेणं अंगुलस्स असं० उक्कोसेणं सातिरेगं जोयणसहस्सं, सुहुमवणस्सइकाइयाणं ओहिआणं अपज्जत्तगाणं पज्जत्तगाणं तिण्हिंपि जहन्नेणं अंगुलस्स असंखेज्जइभागं उक्कोसेणवि अंगुलस्स अ०, बादरवणस्सइकाइयाणं जहन्नेणं अंगुलस्स अ० उक्कोसेणं सातिरेगं जोयणसहस्सं, अपज्जत्तगाणं ज० अंगुलस्स असं० उक्कोसेणवि अंगुलस्स अ०, पज्जत्तगाणं जहन्नेणं अंगुलस्स अ० उक्कोसेणं सातिरेगं जोयणसहस्सं । बेइंदिआणं पुच्छा, गो० ! जहन्नेणं अंगुलस्स असं० उक्कोसेणं बारस जोअणाइं, अपज्जत्तगाणं जहन्नेणं अंगुलस्स अ० उक्कोसेणवि अंगुलस्स अ०, पज्जत्तगाणं ज० अंगुलस्स सं० उक्कोसेणं बारस जोअणाइं । तेइंदिआणं पुच्छा, गो० ! जहन्नेणं अंगुलस्स अ० उक्कोसेणं तिण्णि गाउआइं, अपज्जत्तगाणं जहन्नेणं अंगुलस्स अ० उक्कोसेणवि अंगु० पज्जत्तगाणं जहन्नेणं अंगुलस्स सं० उक्कोसेणं तिन्नि गाउआइं । चउरिंदिआणं पुच्छा, गो० ! जहन्नेणं अंगुलस्स अ०, उक्कोसेणं चत्तारि गाउआइं, अपज्जत्तगाणं जहन्नेणं उक्कोसेणवि अंगुलस्स अ०, पज्जत्तगाणं ज० अंगुल० सं० उक्कोसेणं चत्तारि गाउयाइं । पंचेदियतिरि० महालिआ० पं० ? गो० !

सूत्रम्

॥ २७ ॥

जहन्नेणं अ० उकोसेणं जोयणसहस्सं, जलयरपंचिदियति० पुच्छा गो० ! एवं चेव, संमुच्छिमजलयरपंचिदियति० पुच्छा, गो० !
जहन्नेणं अंगु० अ० उकोसेणं जोयणसहस्सं, अपजत्तगसंमुच्छिमजलअरपंचिदियपुच्छा, जहन्नेणं अंगुलस्स असंखिज्झभागं उकोसेणवि
अंगुलस्स अ० पजत्तगसंमुच्छिमजलयर० पुच्छा, गो० जहन्नेणं अ० सं० उकोसेणं जोयणसहस्सं, गम्भवकंतियजलयरपंचिदिय-
पुच्छा, गो० ! जहन्नेणं अंगुलस्स असंखिज्झभागं उकोसेणं जोयणसहस्सं, अपजत्तगगम्भ० ज० गो० ! जह० अंगु० अ० उको-
सेणवि अंगु० अ०, पजत्तगगम्भवकंतियजलयरपुच्छा, गो० ! जहन्नेणं अंगुलस्स सं० उकोसेणं जोअणसहस्सं, चउप्पयथलयर-
पंचिदियपुच्छा, गो० ! जहन्नेणं अंगुलस्स अ० उकोसेणं छ गाउआइं, संमुच्छिमचउप्पयथलयरपुच्छा, गो० जहन्नेणं अंगु-
लस्स असं० उकोसेणं गाउअपुहुत्तं, अपजत्तगसंमुच्छिमचउप्पयथलयरपुच्छा, गो० ! जहन्नेणं अंगुलस्स अ० उकोसेणवि अंगु०
अ०, पजत्तगसंमुच्छिमचउप्पयथलयरपुच्छा, गो० ! जहन्नेणं अंगुलस्स सं० उको० गाउअपुहुत्तं, गम्भवकतिअचउप्पयथल-
यरपुच्छा, गो० ! जहन्नेणं अंगुलस्स अ० उको० छ गाउआइं, अपजत्तगगम्भवकतिअचउप्पयथलयरपुच्छा, गो० ! जहन्नेणं
अंगुलस्स अ० उकोसेणवि अंगुलस्स असं०, पजत्तगगम्भवकतिअचउप्पयथलयरपुच्छा, गो० ! जहन्नेणं अंगुलस्स सं० उको०
छ गाउआइं, उरपरिसप्पथलयरपंचिदियपुच्छा, गो० ! जह० अंगु० असं० उकोसे० जोअणसहस्सं, संमुच्छिमउरपरिसप्पथल-
यरपुच्छा, गो० ! जह० अंगु० असंखे० उको० जोअणपुहुत्तं, अपजत्तगसंमुच्छिमउरपरिसप्पथलयरपुच्छा, गो० ! जह० अंगु-
लस्स असं० उकोसेणवि अंगुल० असं० पजत्तगसंमुच्छिमउरपरिसप्पथलयरपुच्छा, गो० ! जह० अंगु० संखे० उकोसेणं जोअण-
पुहुत्तं, गम्भवकंतियउरपरिसप्पथलयरपुच्छा, गो० ! जहन्नेणं अंगु० असं० उको० जोअणसहस्सं, अपजत्तगगम्भवकंतियउरप-

अनुयोग

द्वार-

॥ २८ ॥

रिसप्पथलयरपुच्छा, गो० ! जहन्नेणं अंगुलस्स अ० उक्कोसेणवि अं० असं०, पज्जत्तगम्भवकंतियउरप० पुच्छा, गो० ! जहन्नेणं अंगु० संखेज्जभागं उक्कोसेणं जोअणसहस्सं, भुअपरिसप्पथलयरपंचिंदियाणं पुच्छा, गो० ! जह० अंगु० अ० उक्कोसेणं गाउअपुहुत्तं, संमुच्छिमभुअ० पुच्छा, गो० ! जह० अंगु० असं० उक्को० धणुपुहुत्तं, अपज्जत्तगसंमुच्छि०, गो० जहन्नेणं अंगु० अ० उक्को० अंगु० असं०, पज्जत्तगसंमुच्छिमभु०, गो० ! ज० अं० सं० उक्को० धणु०, गम्भ० भुअ० थल०, गो० ! जह० अं० असं० उक्को० गाउ०, अपज्ज० भुअप०, गो० ! जहन्नेणं अं० असं० उक्कोसेणवि अं०, पज्जत्त० भुअप० पुच्छा, गो० ! जह० अंगु० संखे० उक्को० गाउअपुहुत्तं, खहयरपंचिंदियपुच्छा, गो० ! जह० अंगु० असं० उक्को० धणुपुहुत्तं, संमुच्छिमखहयराणं जहा भुअगपरिसप्पसंमुच्छिमाणं तिसुवि गमेसु तहा भाणिअद्वं, गम्भवकंतिअखहयरपुच्छा, गो० ! जह० अंगु० असं० उक्को० धणुपुहुत्तं, अपज्जत्तगग० खहयरपुच्छा, गो० ! जह० अं० असं० उक्कोसेणवि अं०, पज्जत्तगग० ख०, गो० ! जह० अं० संखे० उक्को० धणु०, एत्थ संगहणिगाहाओ भवन्ति, तंजहा-जोअणसहस्सगाउयपुहुत्तं तत्तो अ जोअणपुहुत्तं । दोण्हं तु धणुपुहुत्तं संमुच्छिमे होइ उच्चत्तं ॥ १ ॥ जोयणसहस्सं लग्गाउआइं तत्तो अ जोयणसहस्सं । गाउअपुहुत्तं भुअगे पक्खीसु भवे धणुपुहुत्तं ॥ २ ॥ मणुस्साणं भंते ! के महालिआ सरीरोगाहणा पं० ? गो० ! जह० अंगुलअ० उक्को० तिण्णि गाउआइं, संमुच्छिममणुस्साणं पुच्छा, गो० ! जह० अंगु० असंखे० उक्को० अंगु० असं० गम्भवकंति य मणुस्साणं पुच्छा, गो० ! जहा० अं० अ० उक्को०-तिण्णि गाउआइं-अपज्जत्तगगम्भवकंतियमणुस्साणं पुच्छा, गो० ! जह० अंगु० असं० उक्कोसेणवि अंगु० असं०, पज्जत्तगग० पुच्छा, गो० ! जह० अंगुल० सं० उक्कोसेणं तिण्णि गाउआइं । वाणमंतराणं भवधारणिज्जा य उत्तरवेउविआ य जहा असुर-

सूत्रम्.

॥ २८ ॥

कुमाराणं तहा भाणियवा, जहा वाणमंतराणं तहा जोइसियाणवि । सोहम्मे कप्पे देवाणं मंते ! के महालिआ० पं० १, गो० !
 दुविहा पण्णात्ता, तंजहा-भवधारणिजा य उत्तरवेउविआ य, तत्थ णं जा सा भव० सा जह० अंगुलस्स अ० उक्को० सत्त
 रयणीओ, तत्थ णं जा सा उत्तर० सा जह० अं० संखे० उक्कोसेणं जोयणसयसहस्सं, एवं ईसाणकप्पेऽवि भाणिअव्वं, जहा
 सोहम्मकप्पाणं देवाणं पुच्छा तहा सेसकप्पदेवाणं पुच्छा भाणिअव्वा जाव अच्चुअकप्पो । सणंकुमारे० भव० जह० अंगु०
 असं० उक्कोसेणं छ रयणीओ, उत्तर० जहा सोहम्मे, भ० जहा सणंकुमारे तहा माहिंदेवि भाणियवा, बंभलंतगेसुभव-
 धारणिजा जहण्णेणं अं० असं० उक्को० पंच रयणीओ, उत्तरवेउविआ जहा सोहम्मे, महासुक्कासहस्सारेसु भवधारणिजा
 जह० अंगुलस्स असं० उक्को० चत्तारि रयणीओ, उत्तर० जहा सोहम्मे, आणतपाणतआरणअच्चुएसु चउसुवि भवधारणिजा
 जहन्नेणं अंगु० असंखे० उक्कोसेणं तिण्णि रयणीओ, उत्तरवेउविआ जहा सोहम्मे, गेवेअगदेवाणं मंते ! के महालिआ सरीरो-
 माहणा पं० १, गो० ! एगे भवधारणिजे सरीरगे पं०, से जह० अंगुलस्स असं० उक्कोसेणं दुब्बि रयणीओ, अणुत्तरोववाइ-
 अदेवाणं मंते ! के म० पं० १, गो० ! एगे भव० से जह० अंगु० असं० उक्को० एगा रयणी उ । से समासओ तिविहे
 पण्णात्ते, तंजहा-सुईअंगुले पयरंगुले घणंगुले, एगंगुलायया एगपएसिया सेढी सुईअंगुले, सुई सुईए गुणिआ पयरंगुले, पयरं
 सुईए गुणियं घणंगुले, एएसि णं सुईअंगुलपयरंगुलघणंगुलाणं कयरे कयरेहिंतो अप्पे वा बहुए वा तुल्ले वा विसेसाहिए
 वा १, सव्वथोवे सुईअंगुले, पयरंगुले असंखेअगुणे, घणंगुले असंखेअगुणे, से तं उस्सेहंगुले । से किं तं पमाणंगुले १, पमाणं-
 गुले षगमेगस्स रण्णो चाउरंतचक्कवडिस्स अट्ठसोवण्णिए कायणीरयणे छत्तले दुवालसंसिए अट्ठकण्णिए अहिगरणसंठाणसंठिए

अनुयोग

द्वार-

॥ २९ ॥

पं०, तस्स णं एगमेगा कोडी उस्सेहंगुलविक्रवंभा तं समणस्स भगवओ महावीरस्स अद्वंगुलं तं सहस्सगुणं पमाणंगुलं भवइ, एएणं अंगुलपमाणेणं छ अंगुलाइं पादो दुवालसंगुलाइं विहत्थी दो विहत्थीओ रयणी दो रयणीओ कुच्छी दो कुच्छीओ धणू दो धणुसहस्साइं गाउअं चत्तारि गाउआइं जोयणं । एएणं पमाणंगुलेणं किं पओअणं ?, एएणं पमाणंगुलेणं पुढवीणं कंडाणं पातालाणं अवणाणं भवणपत्थडाणं निरयाणं निरयावलीणं निरयपत्थडाणं कप्पाणं विमाणाणं विमाणपत्थडाणं टंकाणं कूडाणं सेलाणं सिहरीणं पम्भाराणं विजयाणं वक्खाराणं वासाणं वासहराणं वासहरपवयाणं वेलाणं (वलयाणं) वेइयाणं दाराणं तोरणाणं दीवाणं समुद्दाणं आयामविक्रवंभोच्चत्तोवेहपरिक्खेवा मविजंति । से समासओ तिविहे पण्णत्ते, तंजहा-सेढी-अंगुले पयरंगुले घणंगुले, असंखेज्जाओ जोयणकोडाकोडीओ सेढी, सेढी सेढीए गुणिया पयरं, पयरं सेढीए गुणियं लोगो, संखेज्जएणं लोगो गुणिओ संखेज्जा लोगा असंखेज्जएणं लोगो गुणिओ असंखेज्जा लोगा अणंतेणं लोगो गुणिओ अणंता लोगा । एएसि णं सेढिअंगुलपयरंगुलघणंगुलाणं कयरे कयरेहिंतो अप्पे वा बहुए वा तुल्ले वा विसेसाहिए वा ?, सवथोवे सेढिअंगुले, पयरंगुले असंखेज्जगुणे, घणंगुले असंखिज्जगुणे, से तं पमाणंगुले । से तं विभागनिप्फण्णे । से तं खेत्तप्पमाणे (सू० १३४) से किं तं कालप्पमाणे ?, २ दुविहे पण्णत्ते, तंजहा-पएसनिप्फण्णे अ विभागनिप्फण्णे अ (सू० १३५) ॥ से किं तं पएसनिप्फण्णे ?, २ एगसमयट्ठिईए दुसमयट्ठिईए तिसमयट्ठिईए जाव दससमयट्ठिईए असंखिज्जसमयट्ठिईए, से तं पएसनिप्फण्णे (सू० १३६) ॥ से किं तं विभागनिप्फण्णे ?, -समयावलिअमुहुत्ता दिवसअहोरत्तपक्खमासा य । संवच्छरजुग-पलिआ सागरओसप्पिपरिअट्ठा ॥ १ ॥ (सू० १३७) से किं तं समए ?, समयस्स णं परूवणं करिस्सामि, से जहानामए

सूत्रम्.

॥ २९ ॥

तुण्णागदारए सिआ तरुणे बलवं जुगवं जुवाणे अप्पातंके थिरग्गहत्थे दढपाणिपायपासपिटुंतरोरुपरिणते तलजमलजुयलपरि-
घणिमबाहू चम्मेट्टुगदुहणमुट्टिअसमाहृतनिचितगतत्ताए उरस्सबलसमण्णागए लंघणपवणजइणवायामसमत्थे छेए दक्खे
पत्तट्टे कुसले मेहावी निउणे निउणसिप्पोवगए एगं महतीं पडसाडियं (वा) पट्टसाडियं वा गहाय सयराहं हत्थमेत्तं ओसा-
रेआ, तत्थ चोअए पण्णवयं एवं वयासी-जे णं कालेणं तेणं तुण्णागदारएणं तीसे पडसाडिआए वा पट्टसाडिआए वा सय-
राहं हत्थमेत्ते ओसारिए से समए भवइ ?, नो इणट्टे समट्टे, कम्हा ?, जम्हा संखेज्जाणं तंतूणं समुदयसमितिसमागमेणं एगा
पडसाडिआ निप्फज्जइ, उवरिल्लंनि तंतुनि अच्छिण्णे हिट्ठिल्ले तंतू न छिज्जइ, अण्णंमि काले उवरिल्ले तंतू छिज्जइ अण्णंमि
काले हिट्ठिल्ले तंतू छिज्जइ, तम्हा से समए न भवइ । एवं वयंतं पण्णवयं चोयए एवं वयासी-जेणं कालेणं तेणं तुण्णागदा-
रणं तीसे पडसाडिआए वा पट्टसाडिए वा उवरिल्ले तंतू छिण्णे से समए भवइ ?, न भवइ कम्हा ?, जम्हा संखेज्जाणं
पम्हाणं समुदयसमितिसमागमेणं एगे तंतू निप्फज्जइ, उवरिल्ले पम्हे अच्छिण्णे हेट्ठिल्ले पम्हे न छिज्जइ, अण्णंमि काले उवरिल्ले
पम्हे छिज्जइ अण्णंमि काले हेट्ठिल्ले पम्हे छिज्जइ, तम्हा से समए न भवइ । एवं वयंतं पण्णवयं चोअए एवं वयासी-जेणं
कालेणं तेणं तुण्णागदारएणं तस्स तंतुस्स उपरिल्ले पम्हे छिण्णे से समए भवइ ?, न भवइ, कम्हा ?, जम्हा अणंतानं
संघायाणं समुदयसमितिसमागमेणं एगे पम्हे निप्फज्जइ, उवरिल्ले संघाए अविसंघाइए हेट्ठिल्ले संघाए न विसंघाइज्जइ, अण्णंमि
काले उवरिल्ले संघाए विसंघाइज्जइ अण्णंमि काले हिट्ठिल्ले संघाए विसंघाइज्जइ, तम्हा से समए न भवइ । एत्तोऽवि अ णं
सुहुमतराए समए पण्णत्ते समणाउसो ! । असंखिज्जाणं समयाणं समुदयसमितिसमागमणं सा एगा आवलिअत्ति वुच्चइ,

अनुयोग

द्वार-

॥ ३० ॥

संखेआओ आवलियाओ ऊसासो, संखिआओ आवलिआओ नीसासो, हट्टस्स अणवगल्लस्स विरुक्किट्टस्स जंतुणो । एगे ऊसासनीसासे, एस पाणुत्ति वुच्चइ ॥ १ ॥ सत्तपाणूणि से थोवे, सत्त थोवाणि से लवे । लवाणं सत्तहत्तरीए, एस मुहुत्ते विआहिए ॥ २ ॥ तिण्णि सहस्सा सत्त य सयाइं तेहुत्तरिं च ऊसासा । एस मुहुत्तो भणिओ सबेहिं अणंतनाणीहिं ॥ ३ ॥ एएणं मुहुत्तपमाणेणं तीसं मुहुत्ता अहोरत्तं, पण्णरस अहोरत्ता पक्खो, दो पक्खा मासो, दो मासा उउ, तिण्णि उउ अयणं दो अयणाइं संवच्छरे, पंच संवच्छराइं जुगे, वीसं जुगाइं वाससयं, दस वाससयाइं वाससहस्सं, सयं वाससहस्साणं वाससय-सहस्सं, चोरासीइं वाससयसहस्साइं से एगे पुवंगे, चउरासीइ पुवंगसयसहस्साइं से एगे पुवे, चउरासीइं पुवसयसहस्साइं से एगे तुडिअंगे, चउरासीइं तुडिअंगसयसहस्साइं से एगे तुडिए, चउरासीइं तुडिअसयसहस्साइं से एगे अडडंगे, चोरासीइं अडडंगसयसहस्साइं से एगे अडडे, एवं अवंगे अववे हुहुअंगे हुहुए उप्पलंगे उप्पले पउमंगे पउमे नलिणंगे नलिणे अच्छ-निउरंगे अच्छनिउरे अउअंगे अउए पउअंगे पउए णउअंगे णउए चूलिअंगे चूलिया सीसपहेलियंगे चउरासीइं सीसपहेलियंग-सयसहस्साइं सा एगा सीसपहेलिआ । एयावया चेव गणिए, एयावया चेव गणिअस्स विसए, एत्तोवरं ओवमिए पवत्तइ (सू० १३८) से किं तं ओवमिए?, २ दुविहे पण्णत्ते, तंजहा-पलिओवमे य सागरोवमे य, से किं तं पलिओवमे?, २ तिविहे पण्णत्ते, तंजहा-उद्धारपलिओवमे अद्धारपलिओवमे खेत्तपलिओवमे अ, से किं तं उद्धारपलिओवमे? २ दुविहे पण्णत्ते, तंजहा-सुहुमे अ वावहारिए अ, तत्थ णं जे से सुहुमे से ठप्पे, तत्थ णं जे से वावहारिए से जहानामए पळे सिआ जोयणं आयाम-विक्खंमेणं जोअणं उहुं उच्चत्तेणं तं तिगुणं सविसेसं परिक्खेवेणं, से णं पळे एगमहिअवेआहिअतेआहिअ जाव उक्कोसेणं सत्त-

सूत्र.

॥ ३० ॥

रत्तरूढाणं संसट्टे संनिचिते भरिए वालग्गकोडीणं ते णं वालग्गा नो अग्गी डहेजा नो वाऊ हरेजा नो कुहेजा नो पलिविद्धं-
 सिजा णो पूइत्ताए हवमागच्छेजा, तओ णं समए २ एगमेगं वालग्गं अवहाय जावइएणं कालेणं से पल्ले खीणे नीरए निल्लेवे
 णिट्ठिए भवइ, से तं वावहारिए उद्धारपलिओवमे । एएसिं पल्लणं कोडाकोडी हवेअ दसगुणिया । तं वावहारिअस्स उद्धार-
 सागरोवमस्स एगस्स भवे परिमाणं ॥ १ ॥ एएहिं वावहारिअउद्धारपलिओवमसागरोवमेहिं किं पओअणं ?, एएहिं वावहारिअउ-
 द्धारपलिओवमसागरोवमेहिं णत्थि किंचिप्पओअणं, केवलं पण्णवणा पण्णविज्जइ, से तं वावहारिए उद्धारपलिओवमे । से किं
 तं सुहुमे उद्धारपलिओवमे ?, २ से जहानामए पल्ले सिआ जोअणं आयामविक्खंमेणं जोअणं उवेहेणं तं तिगुणं सविसेसं
 परिक्खेवेणं, से णं पल्ले एगाहिअवेआहिअतेआहिअ उक्कोसेणं सत्तरत्तरूढाणं संसट्टे संनिचिते भरिए वालग्गकोडीणं तत्थ
 णं एगमेगे वालग्गे असंखिजाइं खंडाइं कज्जइ, ते णं वालग्गा दिट्ठीओगाहणाओ असंखेज्जभागमेत्ता सुहुमस्स पणगजीवस्स
 सरीसेगाहणाउ असंखेज्जगुणा, ते णं वालग्गा णो अग्गी डहेजा णो वाऊ हरेजा णो कुहेजा णो पलिविद्धंसिजा णो पूइत्ताए
 हवमागच्छेजा, तओ णं समए २ एगमेगं वालग्गं अवहाय जावइएण कालेणं से पल्ले खीणे नीरये निल्लेवे णिट्ठिए भवइ,
 से तं सुहुमे उद्धारपलिओवमे । एएसिं पल्लणं कोडकोडी हवेअ दसगुणिया । तं सुहुमस्स उद्धारसागरोवमस्स एगस्स भवे
 परिमाणं ॥ १ ॥ एएहिं सुहुमउद्धारपलिओवमसागरोवमेहिं किं पओअणं ?, एएहिं सुहुमउद्धारपलिओवमसागरोवमेहिं दीव-
 समुदाणं उद्धारो वेप्पइ । केवइआणं मंते ! दीवसमुदा उद्दारेणं पं० ?, गो० ! जावइआणं अट्ठाइआणं उद्धारसा० उद्धारसमया
 एवइआ णं दीवसमुदा उद्दारेणं पण्णया, से तं सुहुमे उद्धारपलिओवमे । से तं उद्दा० । से किं तं अद्दा० ?, २ दुविहे पण्णत्ते,

तंजहा-सुहुमे अ वावहारिए अ, तत्थ णं जे से सुहुमे से ठप्पे, तत्थ णं जे से वाव० से जहा० पल्ले० जोअणं आया० जोअणं उ० तं तिगुणं सवि० परि०, से णं पल्ले एगाहिअवेआहिअतेआहिअ जाव भरिए वालग्गकोडीणं, ते णं वालग्गानो अग्गी डहेआ जाव णो पलिविद्वंसिआ नो पूइत्ताए हवमागच्छेआ, तओ णं वाससए २ एगमेगं वालग्गं अवहाय जावइएणं कालेणं से पल्ले खीणे नीरए निल्लेवे निट्टिए भवइ, से तं वावहारिए अद्वापलिओवमे । एएसिं पल्लणं कोडाकोडी भविज्ज दसगुणिया । तं ववहारिअस्स अद्वासा० एगस्स भवे परिमाणं ॥ १ ॥ एएहिं ववहारिएहिं अद्वा० प० सागरो० किं प० ?, एएहिं व० अद्वाप० साग० नत्थि किंचिप्पओअणं, केवलं पण्णव०, से तं वावहारिए अद्वाप० । से किं तं सुहुमे अद्वाप० ?, २ पल्ले सिआ जोअणं आया० जोअणं उडुं० तं तिगुणं सविसे० परि०, से णं पल्ले एगाहिअवेआ० तेआ० जाव भरिए वालग्गकोडीणं, तत्थ णं एगमेगे वालग्गे असंखेज्जाइं खंडाइं कज्जइ, ते णं वालग्गा दिट्ठीओगाहणाओ असंखेज्जभागमेत्ता सुहुमस्स पणग० सरीरोगाहणाओ असंखेज्जगुणा, ते णं वालग्गानो अग्गी० जाव नो पलिविद्वंसिआ नो पूइत्ताए हवमा०, तओ णं वाससए २ एगमेगं वालग्गं अवहाय जावइएणं कालेणं से प० खी० नी० निल्लेवे निट्टिए भवइ, से तं सुहुमे अद्वा० । एएसिं पल्लणं कोडाकोडि भवेज्ज दसगुणिया । तं सुहुमस्स अद्वासा० एगस्स भवे परिमाणं ॥ १ ॥ एएहिं सुहुमेहिं अद्वाप० सागरोवमेहिं किं पओअणं ?, एएहिं सुहुमेहिं अद्वाप० साग० नेरइअतिरिक्खजोणिअमणुस्सदेवाणं आउअं मविज्जइ (सू० १३८) णेरइयाणं भंते ! केवइयं कालं ठिई पं० ?, गो० ! जहन्नेणं दसवाससहस्साइं उक्कोसेणं तेत्तीसं सागरोवमाइं, रयणप्पहापुढविणे-रइयाणं भंते ! केवइयं कालं ठिई पं० ?, गो० ! जहन्नेणं दस वा० उक्कोसेणं एगं सागरोवमं, अपज्जत्तगरयणप्पहापुढविणे-

रइयाणं भंते ? केवइअं० पं० !, गो० ! जहन्नेणवि अंतोमुहुत्तं उक्कोसेणवि अंतोमुहुत्तं, पञ्जत्तगरयणप्प० नेरइयाणं भंते !
केवइ० पं० ! गो० ! जहन्नेणं दसवा० अंतोमुहुत्तूणाइं उक्कोसेणं एगं सागरोवमं अंतोमुहुत्तोणं, सक्करप्पहापुढविनेरइआणं भंते !
केवइ० पं० !, गो० ! जहन्नेणं एगं सागरोवमं उक्कोसेणं तिण्णि सागरोवमाइं, एवं सेसपुढवीसु पुच्छा भाणियवा, वालुअप्प-
हापुढविनेरइयाणं जह० तिण्णि सागरोवमाइं उक्को० सत्त सागरोवमाइं, पंक्कप्पहापु० जह० सत्त० उक्को० दस सा०, धूमप्प-
हापु० जह० दस सा० उक्को० सत्तरस सागरोवमाइं, तमप्पहापु० जह० सत्तरस० उक्कोसेणं बावीस०, तमतमापुढविनेरइयाणं
भंते ! के० !, गो० ! जह० बावीसं सा० उक्कोसेणं तेत्तीसं सागरोवमाइं । असुरकुमाराणं भंते ! केवइअं कालं ठिई पं० !,
गो० ! जहन्नेणं दस वाससहस्साइं उक्को० सातिरेगं सागरोवमं, असुरकुमारदेवीणं भंते ! केवइ० पं० !, गो० ! जहन्नेणं दस०
वा० उक्को० अद्धपंचमाइं पलिओवमाइं, नागकुमाराणं भंते ! केव० पं० !, गो० ! जह० दस वास० उक्कोसेणं देसूणाइं दुण्णि
पलिओवमाइं, नागकुमारीणं भंते ! केव० पं० !, गो० ! ज० दस वास० उक्को० देसूणं पलिओवमं, एवं जहा णाग० देवाणं
देवीण य तहा जाव थणियकुमाराणं देवाणं देवीण य भाणियवं । पुढवीकाइयाणं भंते ! के० !, गो० ! जह० अंतोमु०
उक्को० बावीसं वाससहस्साइं, सुहुमपुढवीकाइयाणं ओहियाणं अपञ्जत्तयाणं पञ्जत्तयाण य तिण्णिवि पुच्छा, गो० ! जह०
अंतोमुहुत्तं उक्कोसेणवि अंतोमुहुत्तं, बादरपुढविकाइयाणं पुच्छा, गो० ! जह० अंतोमुहुत्तं उक्कोसेणं बावीसं वाससहस्साइं०
अपञ्जत्तगबादरपु० पुच्छा, गो० ! जहण्णेणवि अं० उक्कोसेणवि अं०, पञ्जत्तगबादरपु० पुच्छा, गो० ! जह० अंतोमुहुत्तं
उक्को० बावीसं वा० अंतोमुहुत्तूणाइं, एवं सेसकाइयाणंपि पुच्छावयणं भाणियवं, आउकाइयाणं जह० अंतो० उक्कोसे० सत्त

का०, सुहुमआउकाइ० ओहिआणं, पञ्जत्तगाणं अपञ्जत्तगाणं तिण्हवि जहण्णेणवि अंतो० उक्कोसेणवि अं०, बादरआउका०
जहा ओहिआणं, अपञ्जत्तगबादरआ० जहणेणवि अंतो० उक्कोसेणवि अं०, पञ्जत्तगबादरआ० जह० अंतोमुहुत्तं उक्को० सत्त-
वासस० अंतोमुहुत्तूणाइं । तेउकाइआणं जह० अं० उक्को० तिण्णि राइंदिआइं, सुहुमते० ओहिआणं, अपञ्जत्तगाणं पञ्जत्त-
गाणं तिण्हवि जहण्णेणवि अंतो० उक्कोसेणवि अं०, बादरतेउकाइयाणं ज० अन्तो० उक्कोसेणं तिण्णि रा०, अपञ्जत्तगबा० ते०
जहणेणवि अन्तो० उक्को० अन्तो० पञ्जत्तगबाद० जह० अंतोमु० उक्को० तिण्णि रा० अंतोमु० । वाउका० जहणेणं अंतो-
मुहुत्तं उक्को० तिण्णि वाससहस्साइं, सुहुमवाउ० ओहिआणं अपञ्जत्तगाणं पञ्जत्तगाण य तिण्हवि जहण्णेणवि अंतो०
उक्कोसे० अं०, बादरवा० ज० अन्तो० उक्को० तिण्णि वा०, अपञ्जत्तगबादरवाउकाइ० जह० अं० उक्कोसेणवि अं०, पञ्जत्तगबा-
दरवाउ० जह० अंतोमुहुत्तं उक्को० तिण्णि वा० अंतोमु० । वणस्सइकाइआणं जहणेणं अं० उक्को० दस वाससहस्साइं, सुहुमवणस्स-
इका० ओहिआणं अपञ्जत्तगाणं पञ्जत्तगाण य तिण्हवि जहण्णेणवि अंतोमु० उक्कोसे० अं०, बादरवणस्सइकाइआणं जह०
अंतो० उक्को० दस वा०, अपञ्जत्तगबा० जह० अं० उक्कोसे० अंतो०, पञ्जत्तगबादरवण० जहणेणं अं० उक्कोसेणं दस वास०
अंतोमुहुत्तूणाइं । वेइंदिआणं मते ! केव० पं० ? गो० ! जहणेणं अंतोमुहुत्तं उक्को० बारस संवच्छराणि, अपञ्जत्तगवेइंदि-
आणं पुच्छा, गो० ! जहणेणवि अंतोमुहुत्तं उक्कोसेणवि अं०, पञ्जत्तगवेइं० जह० अं० उक्को० बारससं० अंतोमुहुत्तूणाइं ।
तेइंदिआणं पुच्छा, गो० ! जह० अं० उक्को० एगुणपण्णासं राइंदिआणं, अपञ्जत्तगतेइंदिआणं पुच्छा, गो० ! जहण्णेणवि
अंतो० उक्कोसे अं०, पञ्जत्तगतेइं० पुच्छा, गो० ! जह० अंतोमुहुत्तं उक्को० एगुणपण्णासं राइंदिआइं अंतोमुहुत्तूणाइं । चउरिं

दिआणं भंते ! केवइ० पं० !, गो० जह० अंतो० उको० छम्मासा, अपज्जत्तगचउरिंदिआणं पुच्छा, गो० ! जहन्नेणवि अंतो०
उकोसेणवि अंतो०, पज्जत्तगचउरिंदिआणं पुच्छा, गो० ! जहन्नेणं अं० उको० छम्मासा अंतो० । पंचिंदियतिरिक्खजोणिआणं
भंते ! केवइ० पं० !, गो० ! जह० अंतोमुहुत्तं उको० तिण्णि पलिओवमाइं, जलयरपंचिंदियतिरिक्खजोणिआणं भंते !
केवइयं कालं ठिई पं० !, गो० ! जहन्नेणं अंतोमुहुत्तं उकोसेणं पुव्वकोडी, संमुच्छिमजलयरपंचिंदियपुच्छा, गो० !
जहन्नेणं अंतो० उको० पुव्वकोडी, अपज्जत्तयसंमुच्छिमजलयरपंचिंदियपुच्छा, गो० ! जहन्नेणवि० अंतो० उकोसेणवि अंतो०
पज्जत्तयसंमुच्छिमजलयरपंचिंदियपुच्छा, गो० ! जह० अंतो० उको० पुव्वकोडी अंतोमुहुत्तूणा, गम्भवकंतियजलयरपंचिंदिय-
पुच्छा, गो० ! जहन्नेणं अंतोमुहुत्तं उकोसेणं पुव्वकोडी, अपज्जत्तगगम्भवकंतियजलयरपंचिंदियपुच्छा, गो० ! जहन्नेणवि अंतो०
उकोसेणवि अंतो०, पज्जत्तगगम्भवकंतियजलयरपंचिंदियपुच्छा, गो० ! जहन्नेणं अंतोमुहुत्तं उकोसेणं पुव्वकोडी अंतोमुहुत्तूणा,
चउप्पयथलयरपंचिंदियपुच्छा, गो० ! जह० अंतो० उको० तिण्णि पलिओवमाइं, संमुच्छिमचउप्पयथलयरपंचिंदिय जाव गो० !
जह० अंतो० उको० चउरासीइं वात्तसहस्साइं, अपज्जत्तयसंमुच्छिमचउप्पयथलयरपंचिंदिय जाव गो० ! जहन्नेणवि अंतो०
उकोसेणवि अंतो०, पज्जत्तयसंमुच्छिमचउप्पयथलयरपंचिंदिय जाव गो० ! जह० अंतो० उको० चउरासीइं वात्तस-
हस्साइं अंतोमुहुत्तूणाइं, गम्भवकंतियचउप्पयथलयरपंचिंदिय जाव गो० ! जह० अंतो० उको० तिण्णि पलिओवमाइं,
अपज्जत्तगगम्भवकंतियचउप्पयथलयरपंचिंदिय जाव गो० ! जहन्नेणवि अंतो० उकोसेणवि अंतो०, पज्जत्तगगम्भवकंतिय-
चउप्पयथलयरपंचिंदिय जाव गो० ! जह० अंतो० उको० तिण्णि पलिओवमाइं अंतोमुहुत्तूणाइं, उरपरिसप्पयथलयरपंचिंदिय-

पुच्छा, गो० ! जह० अंतो० उको० पुवकोडी, संमुच्छिमउरपरिसप्पथलयरपंचिदियपुच्छा, गो० ! जह० अंतो० उको० तेवन्नं
वाससहस्साइं, अपज्जत्तयसंमुच्छिमउरपरिसप्पथलयरपंचिदिय जाव गो० ! जहण्णेणवि अं० उकोसेणवि अंतो०, पज्जत्तयसं-
मुच्छिमउरपरिसप्पथलयरपंचिदिय जाव गो० ! जह० अंतो० उको० तेवणं वाससहस्साइं अंतोमुहुत्तूणाइं, गम्भवकंतियउरपरि-
सप्पथलयरपंचिदिय जाव गो० जह० अंतो० उको० पुवकोडी, अपज्जत्तगगम्भवकंतियउरपरिसप्पथलयरपंचिदिय जाव गो० !
जहन्नेणवि अंतो० उकोसेणवि अंतो०, पज्जत्तयगम्भवकंतियउरपरिसप्पथलयरपंचिदिय जाव गो० ! जह० अंतो० उको० पुवकोडी
अंतोमुहुत्तूणा, भुअपरिसप्पथलयरपंचिदिय जाव गो० ! जहण्णेण अंतो० उकोसेणं पुवकोडी, संमुच्छिमभुयपरिसप्पथल० गो० !
जह० अं० उको० बायालीसं वाससहस्साइं, अपज्जत्तयसंमुच्छिमभुअपरिसप्पथलयरपंचिदिय जाव गो० ! जह० अंतो० उको०
अंतो०, पज्जत्तगसंमुच्छिमभुअपरिसप्पथलयरपंचिदिय जाव गो० ! जह० अंतो० उको० बायालीसं वाससहस्साइं अंतो०,
गम्भवकंतियभुअपरिसप्पथलयरपंचिदिय जाव गो० ! जह० अंतो० उको० पुवकोडी, अपज्जत्तयगम्भवकंतियभुअपरिसप्पथल-
यरपंचिदिय जाव गो० ! जहन्नेणवि अंतो० उकोसेणवि अंतो०, पज्जत्तयगम्भवकंतियभुअपरिसप्पथलयरपंचिदिय जाव गो० !
जह० अंतो० उको० पुवकोडी अंतोमुहुत्तूणा, खहयरपंचिदिय जाव गो० ! जह० अंतो० उको० पलिओवमस्स असंखेज्जइ-
भागो, संमुच्छिमखहयरपंचिदिय जाव गो० जह० अंतो० उको० बावत्तरिं वाससहस्साइं, अपज्जत्तगसंमुच्छिमखहयरपंचि-
दियपुच्छा, गो० ! जह० अंतो० उको० अंतो०, पज्जत्तगसंमुच्छिमखहयरपंचिदिय जाव गो० ! जहन्नेणं अंतो० उको० बाव-
त्तरिं वाससहस्साइं अंतोमुहुत्तूणाइं, गम्भवकंतियखहयर० जाव गो० ! जह० अंतो० उको० पलिओवमस्स असंखेज्जइभागो,

अपञ्चत्तगगम्भवकंतियस्वहयर० जाव गो० ! जहणेणवि अंतो० उक्को० अंतो०, पञ्चत्तगस्वहय० पंचिंदियतिरिक्स्वजोणिआणं
भंते ! केवइयं कालं ठिई पणत्ता ?, गो० ! जह० अंतो० उक्को० पलिओवमस्स असंखिज्झभागो अंतोमुहुत्तूणो । एत्थ एएसि
णं संगहणिगाहाओ भवंति, तंजहा-संमुच्छिमपुव्वकोडी चउरासीइं भवे सहस्साइं । तेवण्णा बायाला बावत्तरिमेव पक्खीणं
॥ १ ॥ गम्भंमि पुव्वकोडी तिण्णि य पलिओवमाइं परमाऊ । उरगभुअपुव्वकोडी पलिओवमासंखभागो अ ॥ २ ॥ मणुस्साणं
भंते ! केवइयं० पणत्ता ?, गो० ! जह० अंतो० उक्को० तिण्णि पलिओवमाइं, संमुच्छिममणुस्साणं जाव गो० ! जहणेणवि
अंतो० उक्कोसे० अंतो०, गम्भवकंतियमणुस्साणं जाव गो० ! जह० अंतो० उक्को० तिण्णि पलिओवमाइं, अपञ्चत्तगगम्भ०
मणुस्साणं भंते ! केवइ० पणत्ता ?, गो० ! जह० अंतो० उक्को० अंतो०, पञ्चत्तगगम्भ० मणुस्साणं भंते ! केवइ० ?, गो० !
जह० अंतो० उक्को० तिण्णि पलि० अंतोमुहुत्तूणाइं । वाणमंतराणं देवाणं केवइ० पणत्ता ?, गो० ! जह० दस वाससहस्साइं
उक्को० पलिओवमं, वाणमंतरीणं देवीणं भंते ! केव० पणत्ता ?, गो० ! जह० दस वाससहस्साइं उक्को० अद्धपलिओवमं ।
जोइसियाणं भंते ! देवाणं केवइ० ?, गो० ! जह० सातिरेगं अट्ठभागपलिओवमं उक्को० पलिओवमं वाससयसहस्समम्भहिंयं,
जोइसियदेवीणं भंते ! केवइ० ?, गो० ! जहणेणं अट्ठभागपलिओवमं उक्कोसेणं अद्धपलिओवमं पण्णासाए वाससहस्सेहिं
अम्भहिअं, चंदविमाण्णाणं भंते ! देवाणं केव० ?, गो० ! जह० चउभागपलिओवमं उक्को० पलिओवमं वाससहस्समम्भहिअं,
चंदविमाण्णाणं भंते ! देवीणं० ?, गो० ! जह० चउभागपलिओवमं उक्को० अद्धपलीओवमं पण्णासाए वाससहस्सेहिं अम्भहिअं,
सूरविमाण्णाणं भंते ! देवाणं० ?, गो० ! जह० चउभागपलिओवमं उक्को० पलिओवमं वाससहस्समम्भहिअं, सूरविमाण्णाणं

अनुयोग

द्वार-

॥ ३४ ॥

देवीणं, गो० ! जह० चउभागपलिओवमं उक्को० अद्वपलिओवमं पंचहिं वाससएहिं अब्भहिअं, गहविमाणानं देवाणं गो० ! जह० चउभागपलिओवमं उक्को० पलिओवमं, गहविमाणानं भंते ! देवीणं०?, गो० ! जह० चउभागपलिओवमं, उक्को० अद्वपलिओवमं, णक्खत्तविमाणानं भंते ! देवाणं०?, गो० ! जह० चउभागपलिओवमं, उक्को० अद्वपलिओवमं, णक्खत्तविमाणानं भंते ! देवीणं०?, गो० ! जह० चउभागपलिओवमं उक्को० सातिरेगं चउभागपलिओवमं, ताराविमाणानं देवाणं भंते ! गो० ! जह० साइरेगं अद्वभागपलिओवमं उक्को० चउभागपलिओवमं, ताराविमाणानं देवीणं भंते ! केवइअं० पणत्ता ?, गो० ! जह० अद्वभागपलिओवमं उक्को० साइरेगं अद्वभागपलिओवमं । वेमाणिआणं भंते ! देवाणं केव० पणत्ता ?, गो० ! जह० पलिओवमं उक्को० तेत्तीसं सागरोवमाइं, वेमाणिआणं भंते ! देवीणं केवइ० पणत्ता ?, गो० ! जह० पलिओवमं उक्को० पणपणं पलिओवमाइं, सोहम्मं णं भंते ! कप्पे देवाणं० ?, गो० ! जह० पलिओवमं उक्को० दो सागरोवमाइं, सोहम्मं णं भंते ! कप्पे परिग्गहिआदेवीणं भंते ! के० ?, गो० ! जह० पलिओवमं उक्को० सत्त पलिओवमाइं, सोहम्मं णं अपरिग्गहिआ देवीणं भंते ! के० ? गो० ! जह० पलिओवमं उक्को० पण्णासं पलिओवमं, ईसाणे णं भंते ! कप्पे देवाणं०?, गो० ! जह० साइरेगं पलिओवमं उक्को० साइरेगाइं दो सागरोवमाइं, ईसाणे णं भंते ! कप्पे परिग्गहिआदेवीणं०?, गो० ! जह० साइरेगं पलिओवमं उक्को० नव पलिओवमाइं, अपरिग्गहिआदेवीणं भंते ! के० ?, गो० ! जह० साइ० पलिओवमं उक्को० पणपणं पलिओवमाइं, सणं-कुमारे णं भंते ! कप्पे देवाणं०?, गो० ! जह० दो सागरोवमाइं उक्कोसेणं सत्त सागरोवमाइं, माहिंदे णं भंते ! कप्पे देवाणं०?, गो० ! जह० साइरेगाइं दो सागरोवमाइं, उक्को० साइरेगाइं सत्त सागरोवमाइं, बंभलोए णं भंते ! कप्पे देवाणं०?, गो० !

सूत्रम्.

॥ ३४ ॥

जह० सत्त सागरोवमाइं उको० दस सागरोवमाइं, एवं कप्पे कप्पे केवइ० पं० १, गो० ! एवं भाणियइं—लंतए जह० दस
सागरोवमाइं उको० चउदस सागरोवमाइं, महासुके जह० चउदस सागरोवमाइं उको० सत्तरस सागरोवमाइं, सहस्सारे जह०
सत्तरम सागरोवमाइं उको० अट्टारस सागरोवमाइं, आणए जह० अट्टारससागरोवमाइं उको० एगूणवीसं सागरोवमाइं, पाणए
जह० एगूणवीसं साग० उको० वीसं सागरोवमाइं, आरणे जह० वीसं सागरोवमाइं उको० एकवीसं सागरोवमाइं, अच्चुए
जह० एकवीसं सागरोवमाइं उको० बावीसं सागरोवमाइं, हेट्ठिमहेट्ठिमगेविअविमाणेसु णं भंते ! देवाणं केवइ० पं० १, गो० !
जह० बावीसं सागरोवमाइं उको० तेवीसं सागरोवमाइं, हेट्ठिममज्झिमगेवेअविमाणेसु णं भंते ! देवाणं, केव० १, गो० ! जह०
तेवीसं सागरोवमाइं उको० चउवीसं सागरोवमाइं, हेट्ठिमउवरिमगेवेअविमाणेसु णं भंते ! देवाणं० १, गो० ! जह० चउवीसं साग०
उको० पंचवीसं साग०, मज्झिमहेट्ठिमगेवेअविमाणेसु केव० १, गो० ! जह० पणवीसं सागरोवमाइं उको० छवीसं सागरोवमाइं,
मज्झिममज्झिमगेवेअविमाणेसु णं भंते ! के० १, गो० ! जह० छवीसं सागरोवमाइं उको० सत्तावीसं सागरोवमाइं, मज्झिमउवरिम-
गे०, गो० ! जह० सत्तावीसं सा० उको० अट्ठावीसं, उवरिमहेट्ठिमगेवि० देवाणं, गो० ! जह० अट्ठावीसं सा० उको० एगूणतीसं
सागरोवमाइं, उवरिममज्झिमगेविअविमाणेसु णं भंते ! देवाणं० १, गो० जह० एगूणतीसं सागरोवमाइं उको० तीसं सागरोवमाइं,
उवरिमउवरिमगेवेअविमाणेसु णं भंते ! देवाणं० १, गो० ! जह० तीसं सागरोवमाइं, उको० एकतीसं सागरोवमाइं, विजयवेजयंतज-
यंतअपराजितविमाणेसु णं भंते ! देवाणं केवइ० पण्णत्ता १, गो० ! जहण्णेणं एकतीसं सागरोवमाइं उको० तत्तीसं सागरोवमाइं
सबडुसिद्धे णं भंते ! महाविमाणे देवाणं केवइ० पण्णत्ता १, गो० ! अजहण्णमणुकोसेणं तेत्तीसं सागरोवमाइं । से तं सुडुमे

अद्धापलिओवमे । से तं अद्धापलिओवमे (घृ० १३९) से किं तं खेत्तपलिओवमे ? २ दुविहे पण्णत्ते, तंजहा-सुहुमे अ वावहारिए अ, तत्थ णं जे से सुहुमे से ठप्पे, तत्थ णं जे से वावहारिए से जहानामए पल्ले सिआ जोअणं आयामविक्खं-
मेणं जोअणं उव्वेहेणं तं तिगुणं सविसेसं परिक्खेवेणं, से णं पल्ले एगाहिअवेआहिअतेआहिअ जाव भरिए वालग्गकोडीणं, ते णं वालग्गा णो अग्गी डहेज्जा जाव णो पूइत्ताए हव्वमागच्छेज्जा, जे णं तस्स पल्लस्स आगासपएसा तेहिं वालग्गेहिं अप्फुन्ना तओ णं समए २ एगमेगं आगासपएसं अवहाय जावइएणं कालेणं से पल्ले खीणे जाव निट्ठिए भवइ से तं ववहारिए खेत्त-
पलिओवमे । एएसिं पल्लणं कोडकोडी भवेज्ज दसगुणिया । तं ववहारिअस्स खेत्तसागरोवमस्स एगस्स भवे परीमाणं ॥ १ ॥
एएहिं ववहारिएहिं खेत्तपलिओवमसागरोवमेहिं किं पओअणं ? एएहिं व० नत्थि किंचिप्पओअणं, केवलं पण्णवणा, पण्ण-
विज्जइ, से तं वव० । से किं तं सुहुमे खेत्तपलिओवमे ? २ से जहाणामए पल्ले सिआ जोअणं आयाम० जाव परिक्खेवेणं
से णं पल्ले एगाहिअवेआहिअतेआहिअ जाव भरिए वालग्गकोडीणं तत्थ णं एगमेगे वालग्गे असंखिज्जाइं खंडाइं कज्जइ, ते
णं वालग्गा दिट्ठीओगाहणाओ असंखेज्जभागमेत्ता सुहुमस्स पण्णजीवस्स सरीरोगाहणाओ असंखेज्जगुणा, ते णं वालग्गा
णो अग्गी डहेज्जा जाव णो पूइत्ताए हव्वमागच्छेज्जा, जे णं तस्स पल्लस्स आगासपएसा तेहिं वालग्गेहिं अप्फुन्ना वा अणा-
फुण्णा वा तओ णं समए २ एगमेगं आगासपएसं अवहाय जावइएणं कालेणं से पल्ले खीणे जाव निट्ठिए भवइ, से तं सुहुमे
खेत्तपलिओवमे । तत्थ णं चोअए पण्णवगं एवं वयासी-अत्थि णं तस्स पल्लस्स आगासपएसा जे णं तेहिं वालग्गेहिं अणा-
फुण्णा ? इंता अत्थि, जहा को दिट्ठंतो ? से जहाणामए कोट्टए सिआ कोहंडाणं भरिए तत्थ णं माउलिगा पक्खित्ता

तेवि माया तत्थ णं बिह्वा पक्खित्ता तेवि माया, तत्थ णं आमलगा पक्खित्ता तेवि माया, तत्थ णं बयरा प० तेऽवि माया, तत्थ णं चणगा पक्खित्ता तेऽवि माया, तत्थ णं मुग्गा पक्खि०, तत्थ णं सरिसवा प०, तत्थ णं गंगावालुआ पक्खित्ता सावि माया, एवमेव एएणं दिट्ठंतेणं अत्थि णं तस्स पल्लस्स आगासपएसा जे णं तेहिं वालग्गेहिं अणाफुण्णा । एएसिं पल्लणं कोडकोडी भवेज्ज दसगुणिया । तं सुहुमस्स खेत्तसागरोवमस्स एगस्स भवे परीमाणं ॥ १ ॥ एएहिं सुहुमेहिं खेत्तप० सागरोवमेहिं किं पओअणं ?, एएहिं सुहुमपलि० साग० दिट्ठिवाए दवा मविज्जंति (सू० १४०) कइविहा णं भंते ! दवा पण्णत्ता ?, गो० ! दुविहा पण्णत्ता, तजंहा-जीवदवा य अजीवदवा य । अजीवदवा णं भंते ! कइविहा पण्णत्ता ?, गो० ! दुविहा प०, तंजहा-रूवीअजीवदवा य अरूवीअजीवदवा य । अरूवीअजीवदवाणं भंते ! कइविहा पण्णत्ता ?, गो० ! दसविहा पण्णत्ता, तंजहा-धम्मत्थिकाए धम्मत्थिकायस्स देसा धम्मत्थिकायस्स पएसा अधम्मत्थिकाए अधम्मत्थिकायस्स देसा अधम्मत्थिकायस्स पएसा आगासत्थिकाए आगासत्थिकायस्स देसा आगास० पएसा, अद्वासमए । रूवीअजीवदवाणं भंते ! कइविहा प० ?, गो० ! चउद्विहा पण्णत्ता, तंजहा-खंधा खंधदेसा खंधप्पएसा परमाणुपोग्गला, ते णं भंते ! किं संखिज्जा असंखिज्जा अणंता ?, गो० ! नो संखेज्जा नो असंखेज्जा अणंता, से केणट्ठेणं भंते ! एवं बुच्चइ-नो संखेज्जा नो असंखेज्जा अणंता ?, गो० ! अणंता परमाणुपोग्गला अणंता दुपएसिआ खंधा जाव अणंता अणंतपएसिआ खंधा, से एएणऽट्ठेणं गो० ! एवं बुच्चइ-नो संखेज्जा नो अ० अणंता । जीवदवाणं भंते ! किं संखिज्जा असंखिज्जा अणंता ?, गो० ! नो संखिज्जा नो असंखिज्जा अणंता, से केणट्ठेणं भंते ! एवं बुच्चइ-नो संखिज्जा नो असंखिज्जा अणंता ?, गो० ! असंखेज्जा

गेरइया असंखेजा असुरकुमारा जाव असंखेजा थणियकुमारा असंखिजा पुढवीकाइया जाव असंखिजा वाउकाइआ अणंता वण्णस्सइकाइआ असंखेजा बेइंदिआ जाव असंखिजा चउरिंदिया असंखिजा पंचिदियतिरिक्खजोणिआ असंखिजा मणुस्सा असंखिजा वाणमंतरा असंखिजा जोइसिआ असंखिजा वेमाणिआ, अणंता सिद्धा, से एणण्ड्ढेणं गो० ! एवं बुच्चइ-नो संखिजा नो असंखिजा अणंता (सू० १४१) कइविहा णं भंते ! सरीरा पं० !, गो० ! पंच सरीरा पण्णत्ता तंजहा-ओरालिए वेउव्विए आहारए तेअए कम्मए गेरइआणं भंते ! कइ सरीरा पं० ! गो० ! तओ सरीरा पं० तं० वेउव्विए तेअए कम्मए, असुरकुमाराणं भंते ! कइ सरीरा पं० !, गो० ! तओ सरीरा पण्णत्ता, तंजहा-वेउ० तेअ० कम्मए, एवं तिण्णि २, एए चेव सरीरा जाव थणियकुमाराणं भाणिअवा । पुढवीकाइआणं भंते ! कइ सरीरा पण्णत्ता !, गो० ! तओ सरीरा पण्णत्ता, तंजहा-ओरालिए तेअए कम्मए, एवं आउतेउवणस्सइकाइयाणऽवि एए चेव तिण्णि सरीरा भाणियवा, वाउकाइयाणं जाव गो० ! चत्तारि सरीरा पं० तं० उरालिए वेउव्विए तेयए कम्मए । बेइंदियतेइंदियचउरिंदियाणं जहा पुढवीकाइयाणं, पंचिदिअतिरिक्खजोणिआणं जहा वाउकाइयाणं । मणुस्साणं जाव गो० ! पंच सरीरा पं०, तं०-ओरालिए वेउव्विए आहारए तेअए कम्मए । वाणमंतराणं जोइसिआणं वेमाणिआणं जहा नेरइयाणं । केवइया णं भंते ! उरालिअसरीरा पण्णत्ता !, गो० ! दुविहा पण्णत्ता, तंजहा-बद्धेल्लगा य मुक्केल्लगा य, तत्थ णं जे ते बद्धेल्लगा ते णं असंखिजा असंखिजाहिं उस्सप्पिणीओ-सप्पिणीहिं अवहीरंति कालओ, खेत्तओ असंखेजा लोगा, तत्थ णं जे ते मुक्केल्लगा ते णं अणंता अणंताहिं उस्सप्पिणीओ-सप्पिणीहिं अवहीरंति कालओ खेत्तओ अणंता लोगा दवओ अभवसिद्धिएहिं अणंतगुणा सिद्धाणं अणंतभागो । केवइ-

આણં મંતે ! વેડવિઆસરીરા પં० ? ગો० ! દુવિહા પં०, તં-બદ્દેલ્લયા ય મુકેલ્લયા ય, તત્થ પં જે તે બદ્દેલ્લયા તે પં અસં-
 સ્વિજ્ઞા અસંસ્વેજ્ઞાહિં ઉસ્સપ્પિણિઓસપ્પિણીહિં અવહીરંતિ કાલઓ, સ્વેત્તઓ અસંસ્વિજ્ઞાઓ સેદ્દીઓ પયરસ્સ અસંસ્વેજ્ઞાભાગો,
 તત્થ પં જે તે મુકેલ્લયા તે પં અણંતા અણંતાહિં ઉસ્સપ્પિણીઓસપ્પિણીહિં અવહીરંતિ કાલઓ, સેસં જહા ઓરાલિઅસ્સ મુકેલ્લયા
 તહા ઇણિ ભાણિઅદ્વા । કેવદ્દા આહારગસં ? ગો० ! દુવિહા બદ્દે મુકે, તત્થ પં જે તે બદ્દેલ્લયા તે પં સિઅ અત્થિ
 સિઅ નત્થિ, જદ્દા અત્થિ જહણ્ણેણં ઇગો વા દો વા તિણ્ણિ વા ઉક્કોસેણં સદ્દસ્સપુહત્તં, મુકેલ્લયા જહા ઓરા તહા ભાણિઅદ્વા ।
 કેવદ્દયા પં મંતે ! તેઅગસરીરા પં० ?, ગો० ! દુવિહા પં તં-બદ્દેલ્લયા ય, મુકેલ્લયા ય, તત્થ પં જે તે બદ્દેલ્લયા તે પં અણંતા
 અણંતાહિં ઉસ્સપ્પિણીઓસપ્પિણીહિં અવહીરંતિ કાલઓ, સ્વેત્તઓ અણંતા લોગા દવ્વઓ સિદ્ધેહિં અણંતગુણા સવ્વજીવાણં અણંત-
 માગૂણા, તત્થ પં જે તે મુકેલ્લયા તે પં અણંતા અણંતાહિં ઉસ્સપ્પિણીઓસપ્પિણીહિં અવહીરંતિ કાલઓ, સ્વેત્તઓ અણંતા લોગા
 દવ્વઓ સવ્વજીવેહિં અણંતગુણા સવ્વજીવવગ્ગસ્સ અણંતભાગો । કેવદ્દા કમ્મગસરીરા પં० ?, ગો० ! દુવિહા પણ્ણત્તા,
 તંજહા-બદ્દે મુકે જહા તેઅગસરીરા તહા કમ્મગસરીરાવિ ભાણિઅદ્વા । નેરદ્દયાણં મંતે ! કેવદ્દયા ઓરાલિઅસરીરા પં० ?,
 ગો० ! દુવિહા પણ્ણત્તા, તંજહા-બદ્દેલ્લયા મુકેલ્લયા ય, તત્થ પં જે તે બદ્દેલ્લયા તે પં નત્થિ, તત્થ પં જે તે મુકેલ્લયા તે જહા
 ઓહિઆ ઓરાલિઅસરીરા તહા ભાણિઅદ્વા, નેરદ્દયાણં મંતે ! કેવદ્દયા વેડવિઅસરીરા પં० ?, ગો० ! દુવિહા પણ્ણત્તા, તંજહા-
 બદ્દેલ્લયા ય મુકેલ્લયા ય, તત્થ પં જે તે બદ્દેલ્લયા તે પં અસંસ્વિજ્ઞા અસંસ્વિજ્ઞાહિં ઉસ્સપ્પિણીઓસપ્પિણીહિં અવહીરંતિ કાલઓ,
 સ્વેત્તઓ અસંસ્વેજ્ઞાઓ સેદ્દીઓ પયરસ્સ અસંસ્વિજ્ઞાભાગો તાસિ પં સેદ્દીણં વિક્કલંમદ્દુઈ અંગુલપદમવગ્ગમૂલં વિદ્ધિઅવગ્ગમૂલપદુ-

अनुयोग
द्वार-
॥ ३७ ॥

पण्णं, अहव णं अंगुलविइअवग्गमूलवणपमाणमेचाओ सेदीओ, तत्थ णं जे ते मुकेल्लया ते णं जहा ओहिआ ओरालिअसरीरा तहा भाणिअवा, णेरइयाणं भंते ! केवइआ आहारगसरीरा पण्णत्ता ?, गो० ! दुविहा पण्णत्ता, तंजहा-बद्धे० मुके०, तत्थ णं जे ते बद्धेल्लया ते णं नत्थि, तत्थ णं जे ते मुकेल्लया ते जहा ओहिआ ओरालिआ तहा भाणिअवा, तेयगकम्मसरीरा जहा एएसिं चेव वेउविअसरीरा तहा भाणिअवा । असुरकुमाराणं भंते ! केवइआ ओरालियसरीरा पं० ?, गो० ! जहा नेरइयाणं ओरालि० तहा भा०, असुरकुमाराणं भंते ! के० वेउविअसरीरा पं० ?, गो० ! दुविहा पण्णत्ता, तंजहा-बद्धेल्लया य मुकेल्लया य, तत्थ णं जे ते बद्धेल्लया ते णं असंखिज्जा असंखिज्जाहिं उस्सप्पिणीओसप्पिणीहिं अवहीरंति कालओ, खेत्तओ असंखेज्जाओ सेदीओ पयरस्स असंखिज्जइभागो तासि णं सेदीणं विक्खंभसूई अंगुलपढमवग्गमूलस्स असंखिज्जइभागो, मुकेल्लया जहा ओहिआ ओरालिअसरीरा, असुरकु० केवइआ आहारगसरीरा पं० ?, गो० ! दुविहा पण्णत्ता, तंजहा-बद्धे० मुके०, जहा एएसिं चेव ओरा० तहा भा०, तेअगकम्म० जहा एए० वेउ० तहा भाणिअवा, जहा असुरकुमाराणं तहा जाव थणिअ० ताव भाणिअव्वं । पुढविकाइयाणं भंते ! केवइया ओरालिअसरीरा पं० ?, गो० ! दुविहा पण्णत्ता, तंजहा-बद्धेल्लया य मुकेल्लया य, एवं जहा ओहिआ ओरालिअसरीरा तहा भा०, पुढविका० केवइआ वेउविअसरीरा पं० ?, गो० ! दुविहा पण्णत्ता, तंजहा-बद्धेल्लया य, मुकेल्लया य, तत्थ णं जे ते बद्धेल्लया ते णं नत्थि, मुकेल्लया जहा ओहिआणं ओरालिअसरीरा तहा भा०, आहारगसरीरावि एवं चेव भाणियवा, तेअगकम्मसरीरा जहा एएसिं चेव ओरालिअसरीरा तहा भाणिअवा, जहा पुढविकाइयाणं एवं आउकाइयाणं तेउकाइयाण य सबसरीरा भाणियवा । वाउकाइयाणं भंते ! केवइया ओरालिअसरीरा पं० ?, गो० !

सूत्रम्.

॥ ३७ ॥

दुविहा पण्णत्ता, तंजहा-बद्धेल्लया य मुक्केल्लया य, जहा पुढविकाइयाणं ओरालियसरीरा तहा भाणिअवा, वाउकाइयाणं भंते !
 केवइया वेउव्विअसरीरा पं० ?, गो० ! दुविहा पण्णत्ता, तंजहा-बद्धेल्लया य मुक्केल्लया य, तत्थ णं जे ते बद्धेल्लया ते णं असं-
 खिज्जा समए २ अवहीरमाणा २ खेत्तपलिओवमस्स असंखिज्जइभागमेत्तेणं कालेणं अवहीरंति नो चेव णं अवहिआ सिआ,
 मुक्केल्लया वेउव्वियसरीरा आहारगसरीरा य जहा पुढविकाइयाणं तहा भाणिअवा, तेअगकम्मसरीरा जहा पुढविकाइयाणं तहा
 भाणिअवा । वणस्सइकाइयाणं ओरालिअवेउव्विअआहारगसरीरा जहा पुढविकाइयाणं तहा भाणिअवा, वणस्सइकाइयाणं भंते !
 केवइया तेअगसरीरा पं० ?, गो० ! दुविहा पण्णत्ता, जहा ओहिआ तेअगकम्मसरीरा तहा वणस्सइकाइयाणवि तेअगकम्म-
 सरीरा भाणिअवा । बेइंदियाणं भंते ! केवइया ओरालियसरीरा पं० ? गो० ! दुविहा पण्णत्ता, तंजहा-बद्धेल्लया य मुक्केल्लया
 य, तत्थ णं जे ते बद्धेल्लया ते णं असंखिज्जा असंखिज्जाहिं उस्सप्पिणीओसप्पिणीहिं अवहीरंति कालओ, खेत्तओ असंखे-
 ज्जाओ सेढीओ पयरस्स असंखिज्जइभागो तासि णं सेढीणं विक्खंभसूई असंखेज्जाओ जोअणकोडाकोडीओ असंखिज्जाइं सेढिव-
 ग्गमूलाइं बेइंदियाणं ओरालियबद्धेल्लएहिं पयरं अवहीरइ असंखिज्जाहिं उस्सप्पिणीओसप्पिणीहिं कालओ, खेत्तओ अंगुलपय-
 रस्स आबलिआए असंखिज्जइभागपडिभागेणं, मुक्केल्लया जहा ओहिआ ओरालिअसरीरा तहा भाणिअवा, वेउव्विअआहारग-
 सरीरा बद्धेल्लया नत्थि मुक्केल्लया जहा ओहिआ ओरालिअसरीरा तहा भाणिअवा, तेअगकम्मगसरीरा जहा एसिं चेव
 ओरालिअसरीरा तहा भाणिअवा, जहा बेइंदियाणं तहा तेइंदियचउरिंदियाणवि भाणिअवा । पंचिंदियतिरिक्खजोणियाणवि
 ओरालिअसरीरा एवं चेव भाणिअवा, पंचिंदियतिरिक्खजोणियाणं भंते ! केवइया वेउव्विअसरीरा पण्णत्ता ?, गो० ! दुविहा

पण्णात्ता, तंजहा-बद्धेल्लया य मुक्केल्लया य, तत्थ णं जे ते बद्धेल्लया ते णं असंखिज्जा असंखिज्जाहिं उस्सप्पिणीओसप्पिणीहिं अवहीरंति कालओ, खेत्तओ असंखिज्जाओ सेदीओ पयस्स असंखिज्जइभागो तासि णं सेदीणं विक्खंभसूई अंगुलपढमवग्ग-मूलस्स असंखिज्जइभागो, मुक्केल्लया जहा ओहिआ ओरालिआ तहा भा०, आहारयसरीरा जहा बेइंदिआणं तेअगकम्मसरीरा जहा ओरालिया । मणुस्साणं भंते ! केवइया ओरालियसरीरा पं० ?, गो० ! दुविहा पण्णात्ता, तंजहा-बद्धेल्लया य मुक्केल्लया य, तत्थ णं जे ते बद्धेल्लया ते णं सिअ संखिज्जा सिअ असंखिज्जा जहण्णपए संखेज्जा, संखिज्जाओ कोडाकोडीओ एगुणतीसं ठाणाइं तिजमलपयस्स उवरिं चउजमलपयस्स हेट्ठा, अहव णं छट्ठो वग्गो पंचमवग्गपडुप्पण्णो, अहव णं छण्णउइल्लेअणगदा-यिरासी, उक्कोसपए असंखिज्जा, असंखिज्जाहिं उस्सप्पिणीओसप्पिणीहिं अवहीरंति कालओ, खेत्तओ उक्कोसपए रूपपक्खित्तेहिं मणूस्सेहिं सेदी अवहीरइ कालओ, असंखिज्जाहिं उस्सप्पिणीओसप्पिणीहिं खेत्तओ अंगुलपढमवग्गमूलं तइयवग्गमूलपडुप्पण्णं, मुक्केल्लया जहा ओहिआ ओरालिआ तहा भाणिअवा, मणुस्साणं भंते ! केवइआ वेउव्विअसरीरा पं० ?, गो० ! दुविहा पं० तं०-बद्धेल्लया य मुक्केल्लया य, तत्थ णं जे ते बद्धेल्लया ते णं संखिज्जा समए २ अवहीरमाणा २ संखेज्जेणं कालेणं अवहीरंति, नो चेव णं अवहिआ सिआ, मुक्केल्लया जहा ओहिआ ओरालिआणं मुक्केल्लया तहा भा०, मणुस्साणं भंते ! केवइआ आहार-गसरीरा पं० ?, गो० ! दुविहा पण्णात्ता, तंजहा-बद्धेल्लया य मुक्केल्लया य, तत्थ णं जे ते बद्धेल्लया ते णं सिअ अत्थि सिअ नत्थि, जइ अत्थि जहन्नेणं एको वा दो वा तिण्णि वा उक्कोसेणं सहस्सपुहत्तं, मुक्केल्लया जहा ओहिआ, तेअगकम्मसरीरा जहा एएसिं चेव ओरालिआ तहा भाणिअवा । वाणमंतराणं ओरालिअसरीरा जहा नेरइआणं, वाणमंतराणं भंते ! केवइआ

वेउद्विअसरीरा पं०?, गो० ! दुविहा पण्णत्ता, तंजहा-बद्धेल्लया य मुक्केल्लया य, तत्थ णं जे ते बद्धेल्लया ते णं असंखेज्जा, असंखिज्जाहिं उस्सप्पिणीओसप्पिणीहिं अवहीरंति कालओ, खेत्तओ असंखिज्जाओ सेदीओ पयरस्स असंखिज्जइभागो, तासि णं सेदीणं विक्खंभसूई संखेज्जओअणसयवग्गपलिभागो पयरस्स, मुक्के० जहा ओहिआ ओरालिआ तहा भा०, आहा० दुविहा-वि जहा असु० तहा भा०, वाण० भंते ! केवइया तेअगस० पं० ?, गो० ! जहा एएसिं चेव वेउद्वि० तहा तेअग० भाणिअवा । जोइसियाणं भंते ! केव० वे० पं० ?, गो० ! दुविहा पण्णत्ता, तंजहा-बद्धे० मुक्के०, तत्थ णं जे ते ब० जाव तासि णं सेदीणं विक्खंभसूई बेल्लप्पण्णांगुलसयवग्गपलिभागो पयरस्स, मुक्के० जहा ओ० ओरा० तहा भा०, आहारय० जहा नेर० तहा भा०, तेअ० जहा एएसिं चेव वेउ० तहा० । वेमाणियाणं भंते ! केव० ओरा० पं० ?, गो० ! जहा ने० तहा०, वेमाणि० केव० वेउ० पं० ?, गो० ! दुविहा पण्णत्ता, तंजहा-बद्धे० मुक्के०, तत्थ णं जे ते ब० ते णं असंखिज्जा असंखेज्जाहिं उस्स० अवहीरंति कालओ, खेत्तओ असं० सेदीओ पयरस्स असंखे० तासि णं सेदीणं विक्खंभसूई अंगुलबीयवग्गमूलं तइयवग्गमूलं पडुप्पण्णं अहव णं अंगुलतइयवग्गमूलंघणप्पमाणमेत्ताओ सेदीओ, मुक्केल्लया जहा ओहिआ ओरालियाणं तहा भा०, आहा० जहा नेरइयाणं, तेअग० जहा एएसिं चेव वेउद्विअसरीरा तहा भाणिअवा, से तं सुहुमे खेत्तपलिओवमे, से तं खेत्तपलिओवमे, से तं पलिओवमे, से तं विभागणिप्फण्णे, से तं कालप्पमाणे (सू० १४२) से किं तं भावप्पमाणे ?, २ तिविहे पण्णत्ते, तंजहा-गुणप्पमाणे नयप्पमाणे संखप्पमाणे (सू० १४३) । से किं तं गुणप्पमाणे ?, २ दुविहे पण्णत्ते, तंजहा-जीवगुणप्पमाणे अजीवगुणप्पमाणे अ । से किं तं अजीवगुणप्पमाणे ?, २ पंचविहे पण्णत्ते, तंजहा-वण्णगुणप्पमाणे गंधगुणप्पमाणे रसगुण-

अनुयोग

द्वार-

॥ ३९ ॥

प्यमाणे फासगुणप्यमाणे संठाणगुणप्यमाणे, से किं तं वण्णगुणप्यमाणे ?, २ पंचविहे पण्णत्ते, तंजहा-कालवण्णगुणप्यमाणे जाव सुक्खिलवण्णगुणप्यमाणे, से तं वण्णगुणप्यमाणे । से किं तं गंधगुणप्यमाणे ?, २ दुविहे पण्णत्ते, तंजहा-सुरभिगंधगुणप्यमाणे दुरभिगंधगुणप्यमाणे, से तं गंधगुणप्यमाणे । से किं तं रसगुणप्यमाणे ?, २ पंचविहे पण्णत्ते, तंजहा-तित्तरसगुणप्यमाणे जाव महुररसगुणप्यमाणे, से तं रसगुणप्यमाणे । से किं तं फासगुणप्यमाणे ?, २ अट्ठविहे पण्णत्ते, तंजहा-कक्खडफासगुणप्यमाणे जाव लुक्खफासगुणप्यमाणे, से तं फासगुणप्यमाणे । से किं तं संठाणगुणप्यमाणे ?, २ पंचविहे पण्णत्ते, तंजहा-परिमंडलसंठाणगुणप्यमाणे वट्ठसं० तंसं० चउरंसं० आययसंठाणगुणप्यमाणे, से तं संठाणगुणप्यमाणे, से तं अजीवगुणप्यमाणे । से किं तं जीवगुणप्यमाणे ?, २ तिविहे पण्णत्ते, तंजहा-णाणगुणप्यमाणे, दंसणगुणप्यमाणे, चरित्तगुणप्यमाणे । से किं तं णाणगुणप्यमाणे ?, २ चउविहे पण्णत्ते, तंजहा-पच्चक्खे अणुमाणे ओवम्मे आगमे । से किं तं पच्चक्खे ?, २ दुविहे पण्णत्ते, तंजहा-इंदिअपच्चक्खे अ णोइंदिअपच्चक्खे अ । से किं तं इंदिअपच्चक्खे ?, २ पंचविहे पण्णत्ते, तंजहा-सोइंदिअपच्चक्खे चक्खुरिंदिअपच्चक्खे घाणिंदिअपच्चक्खे जिब्भिंदिअपच्चक्खे फासिंदिअपच्चक्खे, से तं इंदियपच्चक्खे । से किं तं णोइंदियपच्चक्खे ?, २ तिविहे पण्णत्ते, तंजहा-ओहिणाणपच्चक्खे मणपज्जवनाणपच्चक्खे, केवलणाणपच्चक्खे, से तं णोइंदियपच्चक्खे, से तं पच्चक्खे । से किं तं अणुमाणे ? २ तिविहे पण्णत्ते, तंजहा-पुव्वं सेसवं दिट्ठसाहम्मवं । से किं तं पुव्वं ?, २-माया पुत्तं जहा नट्ठं, जुवाणं पुणरागयं । काई पच्चभिजाणेजा, पुव्वलिंणेण कंणई ॥ १ ॥ तंजहा-खत्तेण वा वण्णेण वा लंछणेण वा मसेण वा तिलएण वा, से तं पुव्वं । से किं तं सेसवं ?, २ पंचविहं पण्णत्तं, तंजहा-कज्जेणं कारणेणं गुणेणं अवयवेणं आसएणं । से किं तं कज्जेणं ?, २

सूत्रम् .

॥ ३९ ॥

संखं सदेणं मेरिं ताडिणं वसभं ढक्किणं मोरं किंकाइणं हयं हेसिणं गयं गुलगुलाइणं रहं घणघणाइणं, से तं कज्जेणं ।
 से किं तं कारणेणं ?, २ तंतवो पडस्स कारणं ण पडो तंतु कारणं वीरणा कडस्स कारणं ण कडो वीरणाकारणं मिप्पिडो
 घडस्स कारणं ण घडो मिप्पिडकारणं, से तं कारणेणं । से किं तं गुणेणं ?, २ सुवण्णं निकसेणं पुप्फं गंधेणं लवणं रसेणं
 मइरं आसायणं वत्थं फासेणं, से तं गुणेणं । से किं तं अवयवेणं ?, २ महिसं सिंगेणं कुकुडं सिहाएणं हत्थिं विसाणेणं
 वराहं दाढाए मोरं पिच्छेणं आसं खुरेणं वग्घं नहेणं चमरिं बालग्गेणं वाणरं लंगुलेण दुपयं मणुस्सादि चउपयं गवमादि
 बहुपयं गोमिआदि सीहं केसरेणं वसहं कुकुहेणं महिलं वलयबाहाए, गाहा-परिअरबंधेण भटं जाणिज्जा महिलिअं निवसणेणं ।
 सित्थेण दोणपागं कविं च एक्काए गाहाए ॥ १ ॥ से तं अवयवेणं । से किं तं आसएणं ?, २ अग्गिं धूमेणं सलिलं बला-
 गेणं बुद्धिं अब्भविकारेणं कुलपुत्तं सीलसमायारेणं-[इङ्गिताकारितैर्ज्ञेयैः, क्रियाभिर्भाषितेन च । नेत्रवक्त्रविकारैश्च, गृह्यतेऽन्तर्गतं
 भनः ॥१॥] से तं आसएणं । से तं सेसवं । से किं तं दिट्ठसाहम्मवं ?, २ दुविहं पण्णत्तं, तंजहा-सामन्नदिट्ठं च विसेसदिट्ठं च ।
 से किं तं सामण्णदिट्ठं ?, २ जहा एगो पुरिसो तहा बहवे पुरिसा जहा बहवे पुरिसा तहा एगो पुरिसो जहा एगो करिसावणो
 तहा बहवे करिसावणा जहा बहवे करिसावणा तहा एगो करिसावणो, से तं सामण्णदिट्ठं । से किं तं विसेसदिट्ठं ?, २ से
 जहाणामए केई पुरिसे कंचि पुरिसं बहूणं पुरिसाणं मज्झे पुव्वदिट्ठं पच्चभिजाणेज्जा-अयं से पुरिसे, बहूणं करिसावणाणं मज्झे पुव्व-
 दिट्ठं करिसावणं पच्चभिजाणिज्जा, अयं से करिसावणे । तस्स समासओ तिद्धिहं गहणं भवइ, तंजहा-अतीयकालगहणं पडुप्प-
 ण्णकालगहणं अणागयकालगहणं । से किं तं अतीयकालगहणं ?, २ उत्तणाणि वणाणि निप्फण्णसस्सं वा मेइणिं पुण्णाणि

अ कुंडसरणईदीहिआतडागाइं पासित्ता तेणं साहिअइ जहा—सुवुट्टी आसी, से तं अतीयकालगहणं । से किं तं पडुप्पण्णकाल-
गहणं ?, २ साहुं गोअरग्गगयं विच्छड्ढिअपउरभत्तपाणं पासित्ता तेणं साहिअइ जहा सुभिक्षे वड्डई, से तं पडुप्पण्णकाल-
गहणं । से किं तं अणागयकालगहणं २—अब्भस्स निम्मलत्तं कसिणा य गिरी सविज्जुआ मेहा । थणियं वाउब्भामो संझारत्ता
पणिट्ठा (द्धा) य ॥१॥ वारुणं वा महिंदं वा अण्णयरं वा पसत्थं उप्पायं पासित्ता तेणं साहिअइ जहा—सुवुट्टी भविस्सइ, से तं
अणागयकालगहणं । एएसिं चेव चिवज्जासे तिविहं गहणं भवइ, तंजहा—अतीयकालगहणं पडुप्पण्णकालगहणं अणागयकालगहणं ।
से किं तं अतीयकालगहणं ?, नित्तिणाइं वणाइं अनिप्फण्णसस्सं वा मेइणीं सुक्काणि अ कुंडसरणईदीहिआतडागाइं पासित्ता तेणं
साहिअइ जहा—कुवुट्टी आसी, से तं अतीयकालगहणं । से किं तं पडुप्पण्णकालगहणं ?, २ साहुं गोअरग्गगयं भिक्खं अलभमाणं
पासित्ता तेणं साहिअइ जहा—दुभिक्षे वड्डई, से तं पडुप्पण्णकालगहणं । से किं तं अणागयकालगहणं ?, २ धूमायंति दिसाओ संवि-
अमेइणी अपडिबद्धा । वाया नेरइआ खलु कुवुट्टीमेवं निवेयंति ॥१॥ अग्गेयं वा वायव्वं वा अण्णयरं वा अप्पसत्थं उप्पायं पासित्ता
ते णं साहिअइ जहा—कुवुट्टी भविस्सइ, से तं अणागयकालगहणं, से तं विसेसदिट्ठं, से तं दिट्ठसाहम्मवं, से तं अणुमाणे । से किं तं
ओवम्मे ?, २ दुविहे पण्णत्ते, तंजहा—साहम्मोवणीए अ वेहम्मोवणीए अ । से किं तं साहम्मोवणीए ?, २ तिविहे पण्णत्ते, तंजहा—
किंचिसाहम्मोवणीए पायसाहम्मोवणीए सव्वसाहम्मोवणीए । से किं तं किंचिसाहम्मोवणीए ?, २ जहा मंदरो तहा सरिसवो,
जहा सरिसवो तहा मंदरो, जहा समुदो तहा गोप्पयं, जहा गोप्पयं तहा समुदो, जहा आइच्चो तहा खज्जोतो, जहा खज्जोतो
तहा आइच्चो, जहा चंदो तहा कुमुदो, जहा कुमुदो तहा चंदो, से तं किंचिसाहम्मो० । से किं तं पायसाहम्मोवणीए ?, २

जहा गो तहा गवओ, जहा गवओ तहा गो, से तं पायसाहम्मो० । से किं तं सबसाहम्मोवणीए ?, २ सबसाहम्मो ओवम्मो नत्थि, तहावि तेणेव तस्स ओवम्मं कीरइ जहा—अरिहंतेहिं अरिहंतसरिसं कयं, चक्कवट्टिणा चक्कवट्टिसरिसं कयं, बलदेवेण बलदेवसरिसं कयं, वासुदेवेण वासुदेवसरिसं कयं, साहुणा साहुसरिसं कयं, से तं सबसाहम्मो, से तं साहम्मोवणीए । से किं तं वेहम्मोवणीए ?, २ तिविहे पण्णत्ते, तंजहा—किंचिवेहम्मो पायवेहम्मो सबवेहम्मो । से किं तं किंचिवेहम्मो ?, २ जहा सामलेरो न तहा बाहुलेरो, जहा बाहुलेरो न तहा सामलेरो, से तं किंचिवेहम्मो । से किं तं पायवेहम्मो ?, २ जहा वायसो न तहा पायसो, जहा पायसो न तहा वायसो, से तं पायवेहम्मो । से किं तं सबवेहम्मो ?, सबवेहम्मो ओवम्मो नत्थि, तहावि तेणेव तस्स ओवम्मं कीरइ, जहा णीएणं णीअसरिसं कयं, दासेण दाससरिसं कयं, काकेण काकसरिसं कयं, साणेण साणसरिसं कयं, पाणेणं पाणसरिसं कयं, से तं सबवेहम्मो । से तं वेहम्मोवणीए । से तं ओवम्मो । से किं तं आगमे ?, २ दुविहे पण्णत्ते, तंजहा—लोइए अ लोउत्तरिए अ । से किं तं लोइए ?, २ जण्णं इमं अण्णाणिएहिं मिच्छादिट्ठीएहिं सच्छंदबुद्धिमइ-विगप्पियं, तंजहा—भारहं रामायणं जाव चत्तारि वेआ संगोवंगा, से तं लोइए आगमे । से किं तं लोउत्तरिए ?, २ जण्णं इमं अरिहंतेहिं भगवंतेहिं उप्पण्णणाणदंसणधरेहिं तीयपच्चुप्पण्णमणागयजाणएहिं तिलुक्कवहिअमहिअपूइएहिं सबण्णूहिं सबदरसीहिं पणीअं दुवालसंगं गणिपिडगं, तंजहा—आयारो जाव दिट्ठिवाओ । अहवा आगमे तिविहे पण्णत्ते, तंजहा—सुत्तागमे अत्थागमे तदुमयागमे । अहवा—तिविहे पण्णत्ते, तंजहा आगमे अत्तागमे अणंतरागमे परंपरागमे, तित्थगराणं अत्थस्स अत्तागमे, गणहराणं सुत्तस्स अत्तागमे अत्थस्स अणंतरागमे, गणहरसीसाणं सुत्तस्स अणत्तरागमे अत्थस्स परंपरागमे, तेण परं सुत्तस्सवि अत्थस्सवि

णो अत्तागमे, णो अणंतरागमे, परंपरागमे, से तं लोगुत्तरिए, से तं आममे, से तं णाणगुणप्पमाणे । से किं तं दंसणगुणप्पमाणे ?
२ चउद्विहेपणत्ते, तंजहा-चक्खुदंसणगुणप्पमाणे अचक्खुदंसणगुणप्पमाणे ओहिदंसणगुणप्पमाणे केवलदंसणगुणप्पमाणे ।
चक्खुदंसणं चक्खुदंसणिस्स घडपडकडरहाइएसु दवेसु, अचक्खुदंसणं अचक्खुदंसणिस्स आयभावे, ओहिदेसणं ओहिदंसणिस्स
सव्वरूविदवेसु न पुण सव्वपज्जवेसु, केवलदंसणं केवलदंसणिस्स सव्वदवेसु अ सव्वपज्जवेसु अ, से तं दंसणगुणप्पमाणे । से किं तं चरित्तगु-
णप्पमाणे ? २ पंचविहे पणत्ते, तंजहा-सामाइअचरित्तगुणप्पमाणे छेओवट्ठावणचरित्तगुणप्पमाणे परिहारविसुद्धिअचरित्तगुणप्प-
माणे सुहुमसंपरायचरित्तगुणप्पमाणे अहक्खायचरित्तगुणप्पमाणे । सामाइअचरित्तगुणप्पमाणे दुविहे पणत्ते, तंजहा-इत्तरिए अ
आवकहिए अ । छेओवट्ठावणचरित्तगुणप्पमाणे दुविहे पणत्ते, तंजहा-साइआरे अ निरइआरे अ । परिहारविसुद्धिअचरित्तगुणप्प-
माणे दुविहे पणत्ते, तंजहा-णिविसमाणए अ णिविट्ठकाइए अ । सुहुमसंपरायचरित्तगुणप्पमाणे दुविहे पणत्ते, तंजहा-पडिवाई अ
अपडिवाई अ । अहक्खायचरित्तगुणप्पमाणे दुविहे पणत्ते, तंजहा-छउमत्थिए अ केवलिए य । से तं चरित्तगुणप्पमाणे, से तं
जीवगुणप्पमाणे, से तं गुणप्पमाणे (सू० १४४) से किं तं नयप्पमाणे ? २ तिविहे पणत्ते, तंजहा-पत्थगदिट्ठंतेणं वसहिदिट्ठं-
तेणं पएसदिट्ठंतेणं । से किं तं पत्थगदिट्ठंतेणं ? २ से जहानामए केई पुरिसे परसुं गहाय अडवीसमहुतो गच्छेज्जा तं पासित्ता
केई वएज्जा-कहिं भवं गच्छसि ? अविमुद्धो नेगमो भणइ-पत्थगस्स गच्छामि, तं च केई छिंदमाणं पासित्ता वएज्जा-किं
भवं छिंदसि ? विसुद्धो नेगमो भणइ-पत्थयं छिंदामि, तं च केई तच्छमाणं पासित्ता वएज्जा-किं भवं तच्छसि ? विसुद्धतराओ-
णेगमो भणइ-पत्थयं तच्छामि, तं च केई उक्कीरमाणं पासित्ता वएज्जा-किं भवं उक्कीरसि ? विसुद्धतराओ णेगमो भणइ-

पत्थयं उक्तीरामि, तं च केइ (वि) लिहमाणं पासित्ता वएज्जा-किं भवं (वि) लिहसि ?, विसुद्धतराओ णेगमो भणइ-पत्थयं
 (वि) लिहामि, एवं विसुद्धतरस्स णेगमस्स नामाउडिओ पत्थओ, एवमेव ववहारस्सवि, संगहस्स चियमियमेज्जसमारूढो
 पत्थओ, उज्जुसुयस्स पत्थओऽविपत्थओ मेज्जं पि पत्थओ, तिण्हं सदनयाणं पत्थयस्स अत्थाहिगारजाणओ जस्स वा वसेणं
 पत्थओ निप्फज्जइ, से तं पत्थयदिट्ठंतेणं । से किं तं वसहिदिट्ठंतेणं ?, २ से जहानामए केइ पुरिसे कंचि पुरिसं वएज्जा-कहिं भवं
 वससि ?, तं अविसुद्धो णेगमो भणइ लोगे वसामि, लोगे तिविहे पण्णत्ते, तंजहा-उड्डलोए अहोलोए तिरिअलोए, तेसु सवेसु
 भवं वससि ? विसुद्धो णेगमो भणइ-तिरिअलोए वसामि, तिरिअलोए जंबूदीवाइआ सयंभूरमणपज्जवसाणा असंखिज्जा
 दीवसमुदा पण्णत्ता, तेसु सवेसु भवं वससि ?, विसुद्धतराओ णेगमो भणइ-जंबूदीवे वसामि, जंबूदीवे दस खेत्ता पण्णत्ता,
 तंजहा-भरहे एरवए हेमवए एरण्णवए हरिवस्से रम्मगवस्से देवकुरू उत्तरकुरू पुव्वविदेहे अवरविदेहे, तेसु सवेसु भवं वससि ?,
 विसुद्धतराओ णेगमो भणइ-भरहे वासे वसामि, भरहे वासे दुविहे पण्णत्ते, तंजहा-दाहिणड्ढुभरहे उत्तरड्ढुभरहे अ, तेसु सवेसु
 (दोसु) भवं वससि ?, विसुद्धतराओ णेगमो भणइ-दाहिणड्ढुभरहे वसामि, दाहिणड्ढुभरहे अणेगाइं गामागरणगरखेडकब्बड-
 मडंबदोणमुहपट्टणासमसंवाहसण्णिवेसाइं, तेसु सवेसु भवं वससि ?, विसुद्धतराओ णेगमो भणइ-पाडलिपुत्ते वसामि, पाड-
 लिपुत्ते अणेगाइं गिहाइं, तेसु सवेसु भवं वससि ?, विसु० णेग० भणइ-देवदत्तस्स घरे वसामि, देवदत्तस्स घरे अणेगा
 कोट्टगा, तेसु सवेसु भवं वससि ?, विसु० णे० भणइ-गन्धर्वरे वसामि, एवं विसुद्धस्स णेगमस्स वसमाणो, एवमेव ववहार-
 स्सवि, संगहस्स संथास्समारूढो वसइ, उज्जुसुअस्स जेसु आगासप्पेसेसु ओमाढो तेसु वसइ, तिण्हं सदनयाणं आयभावे

वसइ । से तं वसहिदिट्ठंतेणं । से किं तं पएसदिट्ठंतेणं ? २ णेगमो भणइ-छण्हं पएसो, तंजहा-धम्मपयसो अधम्मपएसो आगासपएसो जीवपएसो खंधपएसो देसपएसो, एवं वयंतं णेगमं संगहो भणइ-जं भणसि-छण्हं पएसो तं न भवइ, कम्हा ?, जम्हा जो देसपएसो सो तस्सेव दवस्स, जहा को दिट्ठंतो ? दासेण मे खरो कीओ दासोऽवि मे खरोऽवि मे, तं मा भणाहि-छण्हं पएसो, भणाहि पंचण्हं पएसो, तंजहा-धम्मपएसो अधम्मपएसो आगासपएसो जीवपएसो खंधपएसो, एवं वयंतं संगहं ववहारो भणइ-जं भणसि-पंचण्हं पएसो, तं न भवइ, कम्हा ?, जइ जहा पंचण्हं गोट्ठिआणं पुरिसाणं केइ दवजाए सामण्णे भवइ, तंजहा-हिरण्णे वा सुवण्णे वा धणे वा धण्णे वा, ते जुत्तं वत्तुं तहा पंचण्हं पएसो, तं मा भणिहि पंचण्हं पएसो, भणाहि पंचविहो पएसो, तंजहा-धम्मपएसो अधम्मपएसो आगासपएसो जीवपएसो खंधपएसो, एवं वयंतं ववहारं उज्जुसुओ भणइ-जं भणसि-पंचविहो पएसो, तं न भवइ, कम्हा ? जइ ते पंचविहो पएसो एवं ते एकको पएसो पंचविहो एवं ते पणवीसति-विहो पएसो भवइ, तं मा भणाहि-पंचविहो पएसो, भणाहि-भइयव्वो पएसो-सिअ धम्मपएसो सिअ अधम्मपएसो सिअ आगासपएसो सिअ जीवपएसो सिअ खंधपएसो, एवं वयंतं उज्जुसुयं संपइ सदनओ भणइ-जं भणसि भइयव्वो पएसो, तं न भवइ, कम्हा ?, जइ भइअव्वो पएसो एवं ते धम्मपएसोऽवि सिअ धम्मपयसो सिअ अधम्मपएसो सिअ आगासपएसो सिअ जीवपएसो सिअ खंधपएसो, अधम्मपएसोऽवि सिअ धम्मपएसो जाव खंधपएसो, आगासपएसोवि सिअ धम्मपएसो जावखंध-पएसो, जीवपएसोऽवि सिअ धम्मपएसो जाव सिअ खंधपएसो, खंधपएसोऽवि सिअ धम्मपएसो जाव सिअ खंधपएसो, एवं ते अणवत्था भविस्सइ, तं मा भणाहि-भइयव्वो पएसो, भणाहि-धम्मे पएसो से पएसो धम्मे, अहम्मे पएसो से पएसो अहम्मे,

आगासे पएसे से पएसे आगासे, जीवे पएसे से पएसे नोजीवे, खंधे पएसे से पएसे नोखंधे, एवं वयंतं सदनयं समभिरूढो
 भणइ जं भणसि-धम्मे पएसे से पएसे धम्मे जाव जीवे पएसे से पएसे नोजीवे खंधे पएसे से पएसे नोखंधे, तं न भवइ,
 कम्हा !, इत्थं खलु दो समासा भवंति, तंजहा-तप्पुरिसे अ कम्मधारणं अ, तं ण णज्जइ कयरेणं समासेणं भणसि !, किं
 तप्पुरिसेणं किं कम्मधारणं !, जह तप्पुरिसेणं भणसि तो मा एवं भणाहि, अह कम्मधारणं भणसि तो विसेसओ भणाहि,
 धम्मे अ से पएसे अ से पएसे धम्मे, अहम्मे अ से पएसे अ से पएसे अहम्मे, आगासे अ से पएसे अ से पएसे आगासे,
 जीवे अ से पएसे अ से पएसे नोजीवे, खंधे अ से पएसे अ से पएसे नोखंधे, एवं वयंतं समभिरूढं संपइ एवंभूओ भणइ-
 जं जं भणसि तं तं सव्वं कसिणं पडिपुण्णं निरवसेसं एगगहणगहियं देसेऽवि मे अवत्थू पएसेऽवि मे अवत्थू । से तं पएसदि-
 ढुंतेणं । से तं नयप्पमाणे (सू० १४५) से किं तं संखप्पमाणे ?, २ अट्ठविहे पण्णात्ते, तंजहा--नामसंखा ठवणसंखा दव्वसंखा ओवम्म-
 संखा परिमाणसंखा जाणणासंखा गणणासंखा भावसंखा । से किं तं नामसंखा ?, २ जस्स णं जीवस्स वा जाव से तं नामसंखा ।
 से किं तं ठवणसंखा ?, २ जण्णं कट्ठकम्मे वा पोत्थकम्मे वा जाव से तं ठवणसंखा । नामठवणाणं को पइविसेसो ?, नाम
 [पाएणं] आवकहियं ठवणा इत्तरिया वा होज्जा आवकहिया वा होज्जा । से किं तं दव्वसंखा ?, २ दुविहा पण्णात्ता, तंजहा-
 आगमओ यं नोआगमओ यं, जाव से किं तं जाणयसरीरभविअसरीरवइरित्ता दव्वसंखा ?, २ तिविहा पण्णात्ता, तंजहा-एग-
 भविए बद्दाउए अभिमुहणामगोत्ते अ । एगभविए णं मंते ! एगभविएत्ति कालओ केवच्चिरं होइ ?, जहण्णेणं अंतोमुहुत्तं
 उक्कोसेणं पुव्वकोडी, बद्दाउए णं मंते ! बद्दाउएत्ति कालओ केवच्चिरं होइ ?, जहण्णेणं अंतोमुहुत्तं उक्कोसेणं पुव्वकोडीतिभागं,

अनुयोग
द्वार-
॥ ५३ ॥

अभिमुहनामगोए णं भंते ! अभिमुहनामगोएत्ति कालओ केवच्चिरं होइ ? जहन्नेणं एकं समयं उक्कोसेणं अंतोमुहुत्तं । इयाणीं को णओ कं संखं इच्छइ-तत्थ णेगमसंगहववहारा तिविहं संखं इच्छंति, तंजहा-एगभविअं बद्धाउअं अभिमुहनामगोत्तं च, उज्जुसुओ दुविहं संखं इच्छइ, तंजहा-बद्धाउअं च अभिमुहनामगोत्तं च, तिणिण सइनया अभिमुहनामगोत्तं संखं इच्छंति, से तं जाणयसरीरभविअसरीरवइरित्ता दवसंखा । से तं नोआगमओ दवसंखा । से तं दवसंखा । से किं तं ओवम्मसंखा ?, २ चउविहा पणत्ता, तंजहा-अत्थि संतयं संतएणं उवमिज्जइ, अत्थि संतयं असंतएणं उवमिज्जइ, अत्थि असंतएयं संतएणं उवमिज्जइ, अत्थि असंतयं असंतएणं उवमिज्जइ, तत्थ संतयं संतएणं उवमिज्जइ, जहा संता अरिहंता संतएहिं पुरवरेहिं संतएहिं कवाडेहिं संतएहिं वच्छेहिं उवमिज्जइ, तंजहा-पुरवरकवाडवच्छा फलिहभुआ दुंदुहित्थणिअघोसा । सिरिवच्छंकिअवच्छा सवेऽवि जिणा चउवीसं ॥ १ ॥ संतयं असंतएणं उवमिज्जइ, जहा संताइं नेरइअतिरिक्खजोणिअमणुस्स देवाणं आउआई असंतएहिं पलिओवमसागरोवमेहिं उवमिज्जंति, असंतयं संतएणं उ० तं०-परिजूरिअपेरंतं चलंतबिटं पडंतनिच्छीरं । पत्तं व वसणपत्तं कालप्पत्तं भणइ गाहं ॥ १ ॥ जह तुम्हे तह अम्हे तुम्हेऽवि अ होहिहा जहा अम्हे । अप्पाहेइ पडंतं पंडुअपत्तं किसलयाणं ॥ २ ॥ णवि अत्थि णवि अ होही उल्लावो किसलपंडुपत्ताणं । उवमा खलु एस कया भविअजणविबोहणट्ठाए ॥ ३ ॥ असंतयं असंतएहिं उवमिज्जइ, जहा खरविसाणं तहा ससविसाणं । से तं ओवम्मसंखा । से किं तं परिमाणसंखा ?, २ दुविहा पणत्ता, तं०-कालिअसुयपरिमाणसंखा दिट्ठिवायसुअपरिमाणसंखा य । से किं तं कालिअसुअपरिमाणसंखा ?, २ अणेगविहा पणत्ता, तंजहा-पज्जवसंखा अक्खरसंखा संघायसंखा पयसंखा पायसंखा गाहासंखा सिलोगसंखा वेढसंखा निज्जुत्तिसंखा अणु-

सूत्रम्.

॥ ४३ ॥

ओगदारसंखा उहेसगसंखा अज्झयणसंखा सुअखंधसंखा अंगसंखा, से तं कालिअसुअपरिमाणसंखा । से किं तं दिट्ठिवायसुअपरि-
 माणसंखा ?, २ अणेगविहा पण्णत्ता, तंजहा-पञ्चवसंखा जाव अणुओगदारसंखा पाहुडसंखा पाहुडिआसंखा पाहुडपाहुडि-
 आसंखा वत्थुसंखा, से तं दिट्ठिवायसुअपरिमाणसंखा । से तं परिमाणसंखा । से किं तं जाणणासंखा ?, २ जो जं जाणइ
 तंजहा-सइं सदिओ गणियं गणिओ निमित्तं नेमित्तिओ कालं कालणाणी वेज्जयं वेज्जो, से तं जाणणासंखा । से किं तं गण-
 णासंखा ?, २ एको गणणं न उवेइ, दुप्पभिइ संखा, तंजहा-संखेज्जए असंखेज्जए अणंतए । से किं तं संखेज्जए ?, २ तिविहे
 पण्णत्ते, तंजहा-जहण्णए उकोसए अजहण्णमणुकोसए । से किं तं असंखेज्जए ?, २ तिविहे पण्णत्ते, तंजहा-परित्तासंखेज्जए
 जुत्तासंखेज्जए असंखेज्जासंखेज्जए । से किं तं परित्तासंखेज्जए ?, २ तिविहे पण्णत्ते, तंजहा-जहण्णए उकोसए अजहण्णमणुकोसए ।
 से किं तं जुत्तासंखेज्जए ?, २ तिविहे पण्णत्ते, तंजहा-जहण्णए उकोसए अजहण्णमणुकोसए । से किं तं असंखेज्जासंखेज्जए ?, २
 तिविहे पण्णत्ते, तंजहा-जहण्णए उकोसए अजहण्णमणुकोसए । से किं तं अणंतए ?, २ तिविहे पण्णत्ते, तंजहा-परित्ताणंतए जुत्ता-
 णंतए अणंताणंतए ?, से किं तं परित्ताणंतए ?, २ ति० प०, तं०-जहण्णए उकोसए अजहण्णमणुकोसए । से किं तं जुत्ता-
 णंतए ?, २ तिविहे पण्णत्ते, तंजहा-जहण्णए उकोसए अजहण्णम० । से किं तं अणंताणंतए ?, २ दुविहे पण्णत्ते, तंजहा-
 जहण्णए अजहण्णमणुकोसए । जहण्णयं संखेज्जयं केवइअं होइ ?, दोरूवयं, तेणं परं अजहण्णमणुकोसयाइं ठाणाइं जाव
 उकोसयं संखेज्जयं न पावइ । उकोसयं संखेज्जयं केवइअं होइ ?, उकोसयस्स संखेज्जयस्स परूवणं करिस्सामि से जहानामए
 पळे सिआ एगं जोयसयसहस्सं आयामविकस्वमेणं तिण्णि जोयणसयसहस्सं सोलस सहस्साइं दोण्णि अ सत्तावीसे जोयण-

सए तिण्णि अ कोसे अट्ठावीसं च घणुसयं तेरस य अंगुलाइं अट्ठं अंगुलं च किंचि विसेसाहिअं परिक्खेवेणं पण्णत्ते, से णं पल्ले सिद्धत्थयाणं भरिए, तओ णं तेहिं सिद्धत्थएहिं दीवसमुदाणं उद्धारो घेप्पइ, एगो दीवे एगो समुदे एवं पक्खिप्पमाणेणं २ जावइआ दीवसमुदा तेहिं सिद्धत्थएहिं अप्फुण्णा एस णं एवइए खेत्त पल्ले [आइट्ठा] पढमा सलागा, एवइआणं सलागाणं असंलप्पा लोगा भरिआ तहावि उकोसयं संखेज्जयं न पावइ, जहा को दिट्ठंतो?, से जहानामए मंचे सिआ आमलगाणं भरिए तत्थ एगे आमलए पक्खिक्खत्ते सेऽवि माते अण्णेऽवि पक्खिक्खत्ते सेऽवि माते अन्नेऽवि पक्खिक्खत्ते सेऽवि माते एवं पक्खिप्पमाणेणं २ होहि सेऽवि आमलए जंसि पक्खिक्खत्ते से मंचए भरिज्जिहिए जे तत्थ आमलए न माहिइ, एवामेव उकोसए संखेज्जए रूवे पक्खिक्खत्ते जहण्णयं परित्तासंखेज्जयं भवइ, तेण परं अजहण्णमणुकोसयाइं ठाणाइं जाव उकोसयं परित्तासंखेज्जयं न पावइ । उकोसयं परित्तासंखेज्जयं केवइअं होइ?, जहण्णयं परित्तासंखेज्जयं जहण्णयं परित्तासंखेज्जमेत्ताणं रासीणं अण्णमण्णब्भासो रूवूणो उकोसं परित्तासंखेज्जयं होइ, अहवा जहन्नयं जुत्तासंखेज्जयं रूवूणं उकोसयं परित्तासंखेज्जयं होइ । जहन्नयं जुत्तासंखेज्जयं केवइअं होइ?, जहण्णयपरित्तासंखेज्जयमेत्ताणं रासीणं अण्णमण्णब्भासो पडिपुण्णो जहन्नयं जुत्तासंखेज्जयं होइ, अहवा उकोसए परित्तासंखेज्जए रूवं पक्खिक्खत्तं जहण्णयं जुत्तासंखेज्जयं होइ, आवलिआवि तत्तिआ चैव, तेण परं अजहण्णमणुकोसयाइं ठाणाइं जाव उकोसयं जुत्तासंखिज्जयं न पावइ । उकोसयं जुत्तासंखेज्जयं केवइअं होइ?, जहण्णएणं जुत्तासंखेज्जएणं आवलिआ गुणिआ अण्णमण्णब्भासो रूवूणो उकोसयं जुत्तासंखेज्जयं होइ, अहवा जहन्नयं असंखेज्जासंखेज्जयं रूवूणं उकोसयं जुत्तासंखेज्जयं होइ । जहण्णयं असंखेज्जासंखेज्जयं केवइअं होइ?, जहन्नएणं जुत्तासंखेज्जएणं आवलिआ गुणिआ अण्णमण्णब्भासो पडिपुण्णो जह-

ण्यं असंखेज्जासंखेज्जं होइ, अहवा उकोसए जुत्तासंखेज्जए रूवं पक्खित्तं जहण्णयं असंखेज्जासंखेज्जं होइ, तेण परं अजहण्ण-
मणुकोसयाइं ठाणाइं जाव उकोसयं असंखेज्जासंखेज्जं ण पावइ । उकोसयं असंखेज्जासंखेज्जं केवइअं होइ ?, जहण्णयं
असंखेज्जासंखेज्जमेत्ताणं रासीणं अण्णमण्णब्भासो रूवूणो उकोसयं असंखेज्जासंखेज्जं होइ, अहवा जहण्णयं परित्ताणंतयं
रूवूणं उकोसयं असंखेज्जासंखेज्जं होइ । जहण्णयं परित्ताणंतयं केवइअं होइ ?, जहण्णयं असंखेज्जासंखेज्जमेत्ताणं रासीणं
अण्णमण्णब्भासो पडिपुण्णो जहण्णयं परित्ताणंतयं होइ, अहवा उकोसए असंखेज्जासंखेज्जए रूवं पक्खित्तं जहण्णयं परित्ताणं-
तयं होइ, तेण परं अजहण्णमणुकोसयाइं ठाणाइं जाव उकोसयं परित्ताणंतयं ण पावइ, उकोसयं परित्ताणंतयं केवइअं होइ ?,
जहण्णयपरित्ताणंतयमेत्ताणं रासीणं अण्णमण्णब्भासो रूवूणो उकोसयं परित्ताणंतयं होइ, अहवा जहण्णयं जुत्ताणंतयं रूवूणं
उकोसयं परित्ताणंतयं होइ, जहण्णयं जुत्ताणंतयं केवइअं होइ ?, जहण्णयपरित्ताणंतयमेत्ताणं रासीणं अण्णमण्णब्भासो पडिपुण्णो
जहण्णयं जुत्ताणंतयं होइ, अहवा उकोसए परित्ताणंतए रूवं पक्खित्तं जहण्णयं जुत्ताणंतयं होइ, अभवसिद्धिआवि तत्तिआ होइ, तेण
परं अजहण्णमणुकोसयाइं ठाणाइं जाव उकोसयं जुत्ताणंतयं ण पावइ । उकोसयं जुत्ताणंतयं केवइअं होइ ?, जहण्णएणं जुत्ताणंतएणं
अभवसिद्धिआ गुणिया अण्णमण्णब्भासो रूवूणो उकोसयं जुत्ताणंतयं होइ अहवा जहण्णयं अणंताणंतयं रूवूणं उकोसयं जुत्ताणंतयं
होइ । जहण्णयं अणंताणंतयं केवइअं होइ ?, जहण्णएणं जुत्ताणंतएणं अभवसिद्धिआ गुणिया अण्णमण्णब्भासो पडिपुण्णो जहण्णयं
अणंताणंतयं होइ अहवा उकोसए जुत्ताणंतए रूवं पक्खित्तं जहण्णयं अणंताणंतयं होइ, तेण परं अजहण्णमणुकोसयाइं ठाणाइं ।
से तं गणणा संखा । से किं तं भावसंखा ?, २ जे इमे जीवा संखगइनामगोत्ताइं कम्माइं वेदेइ(न्ति) । से तं भावसंखा, से तं संख-

पमाणे, से तं भावपमाणे, से तं पमाणे । पमाणेति पयं समत्तं (सू० १४६) से किं तं वत्तवया ?, २ तिविहा पणत्ता, तंजहा-
ससमयवत्तवया परसमयवत्तवया ससमयपरसमयवत्तवया । से किं तं ससमयवत्तवया ?, २ जत्थ णं ससमए आघविज्जइ पणवि-
ज्जइ परुविज्जइ दंसिज्जइ निदंसिज्जइ उवदंसिज्जइ, से तं ससमयवत्तवया । से किं तं परसमयवत्तवया ?, २ जत्थ णं परसमए आघ-
विज्जइ जाव उवदंसिज्जइ, से तं परसमयवत्तवया । से किं तं ससमयपरसमयवत्तवया ?, २ जत्थ णं ससमए परसमए आघविज्जइ
जाव उवदंसिज्जइ, से तं ससमयपरसमयवत्तवया । इआणीं को णओ कं वत्तवयं इच्छइ ?, तत्थ णोगमसंगहववहारा तिविहं
वत्तवयं इच्छंति, तंजहा-ससमयवत्तवयं परसमयवत्तवयं ससमयपरसमयवत्तवयं, उज्जुसुओ दुविहं वत्तवयं इच्छइ, तंजहा-
ससमयवत्तवयं परसमयवत्तवयं, तत्थ णं जा सा ससमयवत्तवया सा ससमयं पविट्ठा, जा सा परसमयवत्तवया सा परसमयं
पविट्ठा, तम्हा दुविहा वत्तवया, नत्थि तिविहा वत्तवया, तिण्णि सद्दणया एगं ससमयवत्तवयं इच्छंति, नत्थि परसमयवत्तवया,
कम्हा ?, जम्हा परसमए अणट्ठे अहेऊ असब्भावे अकिरिए उम्मग्गे अणुवएसे मिच्छादंसणमितिकट्ठु, तम्हा सद्वा ससमय-
वत्तवया, णत्थि परसमयवत्तवया णत्थि ससमयपरसमयवत्तवया । से तं वत्तवया (सू० १४७) से किं तं अत्थाहिगारे ?, २
जो जस्स अज्झयणस्स अत्थाहिगारो, तंजहा-सावज्जजोगविरई उक्कित्तण गुणवओ य पडिवत्ती । खलियस्स निंदणा वणत्ति-
गिच्छ गुणधारणा चेव ॥ १ ॥ से तं अत्थाहिगारे (सू० १४८) से किं तं समोआरे ?, २ छविहे पणत्ते, तंजहा-णाम-
समोआरे ठवणासमोआरे दवसमोआरे खेत्तसमोआरे-कालसमोआरे भावसमोआरे । नामठवणाओ पुवं वण्णिआओ जाव
से तं भविअसरीरदवसमोआरे । से किं तं जाणयसरीरभविअसरीरवहरित्ते दवसमोआरे ?, २ तिविहे पणत्ते, तंजहा-

आयसमोआरे परसमोआरे तदुभयसमोआरे, सव्वदवावि णं आयसमोआरेणं आयभावे समोअरंति, परसमोआरेणं जहा कुंडे बदराणि, तदुभयसमोआरेणं, जहा घरे खंभो आयभावे अ, जहा घडे गीवा आयभावे अ, अहवा जाणयसरीरभवियसरीर-वइरित्ते दव्वसमोआरे दुविहे पण्णत्ते, तंजहा-आयसमोआरे अ तदुभयसमोआरे अ । चउसट्ठिआ आयसमोआरेणं आयभावे समोयरइ, तदुभयसमोआरेणं बत्तीसिआए समोअरइ आयभावे अ, बत्तीसिआ आयसमोआरेणं आयभावे समोयरइ तदुभयसमोआरेणं सोलसियाए समोयरइ आयभावे अ, सोलसिआ आयसमोआरेणं आयभावे समोअरइ, तदुभयसमोआरेणं अट्ठभाइआए समोअरइ आयभावे अ, अट्ठभाइआ आयसमोआरेणं आयभावे समोअरइ तदुभयसमोआरेणं चउभाइआए समोअरइ आयभावे अ, चउभाइया आयसमोआरेणं आयभावे समोअरइ, तदुभयसमोआरेणं अट्ठमाणीए समोअरइ आयभावे अ, अट्ठमाणी आयसमोआरेणं आयभावे समोअरइ, तदुभयसमोआरेणं माणीए समोअरइ आयभावे अ, से तं जाणयसरीरभवियसरीरवइरित्ते दव्वसमोआरे । से तं नोआगमओ दव्वसमोआरे । से तं दव्वसमोआरे । से किं तं खेत्तसमो-आरे ?, २ दुविहे पं०, तं०-आयसमोआरे अ तदुभयसमोआरे अ, भरहे वासे आयस० आयभावे स०, तदुभयसमो-आरेणं जंबूद्दीवे समो० आयभावे अ, जंबूद्दीवे आयसमो० आयभावे समोअरइ, तदुभयसमोआरेणं तिरियलोए समोयरइ आयभावे अ, तिरियलोए आयसमोआरेणं आयभावे समोअरइ, तदुभयसमोआरेणं लोए समोअरइ आयभावे अ, से तं खेत्तसमोआरे । से किं तं कालसमोआरे ?, २ दुविहे पण्णत्ते, तंजहा-आयसमोआरे अ तदुभयसमोआरे अ, समए आयसमोआरेणं आयभावे समोयरइ, तदुभयसमोआरेणं आवलिआए समोयरइ आयभावे अ, एवमाणापाणू थोवे लवे

मुहुत्ते अहोरत्ते पक्खे मासे ऊऊ अयणे संवच्छरे जुगे वाससए वाससहस्से वाससयसहस्से पुवंगे पुवे तुडिअंगे तुडिए अडडंगे
अडडे अववंगे अववे हूहूअंगे हूहूए उप्पलंगे उप्पले पउमंगे पउमे णल्लिणंगे णल्लिणे अच्छनिउरंगे अच्छनिउरे अउअंगे अउए
नउअंगे नउए पउअंगे पउए चूलिअंगे चूलिआ सीसपहेलिअंगे सीसपहेलिआ पलिओवमे सागरोवमे आयसमोआरेणं आय-
भावे स० तदुभयसमोआरेणं ओसप्पिणीउस्सप्पिणीसु समोयरइ आयभावे अ, ओसप्पिणीउस्सप्पिणीओ आयसमोआरेणं आय-
भावे०, तदुभयस० पोग्गलपरिअट्टे समो० आयभावे अ, पोग्गलपरिअट्टे आयसमोआरेणं आयभावे समोयरइ तदुभयस० तीत-
द्धाअणागतद्धासु समोयरइ आय०, तीतद्धाअणागतद्धासु समोयरइ आय० तीतद्धाअणागतद्धाउ आयस० आयभावे० तदुभयसमो-
आरेणं सबद्धाए समोयरइ आयभावे अ । से तं कालसमोआरे । से किं तं भावसमोआरे ? १, २ दुविहे पणत्ते, तं०-आय० तदुभयस०,
कोहे आय० आयभावे स०, तदु० माणे समो० आयभावे अ, एवं माणे माया लोभे रागे मोहणिज्जे अट्ठ कम्मपयडीओ आयसमोआ-
रेणं आयभावे समोअरइ तदुभयसमोआरेणं छविहे भावे समोयरइ आयभावे अ, एवं छविहे भावे, जीवे जीवत्थिकाए आयसमो-
आरेणं आयभावे समोयरइ तदुभयसमोआरेणं सबद्धेसु समोअरइ आयभावे अ । एत्थ संगहणीगाहा-कोहे माणे माया
लोभे रोगे य मोहणिज्जे अ । पगडी भावे जीवे जीवत्थिकाय दद्वा य ॥ १ ॥ से तं भावसमोआरे । से तं समोआरे । से तं
उवक्कमे । उवक्कम इति पढमं दारं (सू० १४९) से किं तं निक्खेवे ? १, २ तिविहे पणत्ते, तंजहा-ओहनिप्फण्णे नामनिप्फण्णे
सुत्तालावगनिप्फण्णे । से किं तं ओहनिप्फण्णे ? १, २ चउविहे पणत्ते, तंजहा-अज्झयणे अज्झीणे आए खवणा । से किं तं अज्झयणे ?
१ चउविहे पणत्ते, तंजहा-णामज्झयणे ठवणज्झयणे दव्वज्झयणे भावज्झयणे, णामट्ठवणाओ पुवं वणिआओ, से किं तं दव-

ज्झयणे ?, २ दुविहे पण्णत्ते, तंजहा-आगमओ अ णोआगमओ अ । से किं तं आगमओ दवज्झयणे ?, २ जस्स णं अज्झ-
यणत्ति पयं सिक्खियं ठियं जियं मियं परिजियं जाव एवं जावइआ अणुवउत्ता आगमओ तावइआइं दवज्झयणाइं, एवमेव
ववहारस्सवि, संगहस्स णं एगो वा अणेगो वा जाव, से तं आगमओ दवज्झयणे । से किं तं णोआगमओ दवज्झयणे ?,
२ तिविहे पण्णत्ते, तंजहा-जाणयसरीरदवज्झयणे भविअसरीरदवज्झयणे जाणयसरीरभविअसरीरवइरित्ते द० । से किं तं
जाणग० ?, २ अज्झयणपयत्थाहिगारजाणयस्स जं सरीरं ववगयचुअचाविअचत्तदेहं जीवविप्पजढं जाव अहो णं इमेणं सरीर-
समुस्सएणं जिणदिट्ठेणं भावेणं अज्झयणेत्तिपयं आघवियं जाह उवदंसियं, जहा को दिट्ठंतो ?-अयं घयकुंमे आसी अयं महु-
कुंमे आसी, से तं जाणयसरीरदवज्झयणे । से किं तं भविअसरीरदवज्झयणे ?, २ जे जीवे जोणिजम्मणनिक्खंतं इमेणं चेव
आदत्तएणं सरीरसमुस्सएणं जिणदिट्ठेणं भावेणं अज्झयणेत्तिपयं सेअकाले सिक्खिस्सइ न ताव सिक्खइ, जहा को दिट्ठंतो ?-
अयं महुकुंमे भविस्सइ अयं घयकुंमे भविस्सइ, से तं भविअसरीरदवज्झयणे । से किं तं जाणयसरीरभविअसरीरवइरित्ते दव-
ज्झयणे ?, २ पत्तयपोत्थयलिहियं, से तं जाणयसरीरभविअसरीरवइरित्ते दवज्झयणे । से तं णोआगमओ दवज्झयणे । से तं दव-
ज्झयणे । से किं तं भावज्झयणे ?, २ दुविहे पण्णत्ते, तंजहा-आगमओ, अ णोआगमओ अ । से किं तं आगमओ भाव-
ज्झयणे ?, २ जाणए उवउत्ते, से तं आगमओ भावज्झयणे । से किं तं नोआगमओ भावज्झयणे ?, २-अज्झप्पस्साणयणं
कम्माणं अवचओ उवचिआणं । अणुवचओ अ नवाणं तम्हा अज्झयणमिच्छंति ॥ १ ॥ से तं णोआगमओ भावज्झयणे ।
से तं भावज्झयणे, से तं अज्झयणे । से किं तं अज्झीणे ?, २ चउद्विहे पण्णत्ते, तंजहा-णामज्झीणे ठवणज्झीणे दवज्झीणे

भावज्झीणे । नामठवणाओ पुवं वणिआओ, से किं तं दवज्झीणे ? २ दुविहे पण्णत्ते, तंजहा-आगमओ अ नोआगमओ अ । से किं तं आगमओ दवज्झीणे ? जस्स णं अज्झीणेत्तिपयं सिक्खियं जियं मियं परिजियं जाव से तं आगमओ दवज्झीणे । से किं तं नोआगमओ दवज्झीणे ? २ तिविहे पण्णत्ते, तंजहा-जाणयसरीरदवज्झीणे भविअसरीरदवज्झीणे जाणयसरीरभविअसरीरवइरित्ते दवज्झीणे । से किं तं जाणयसरीरदवज्झीणे ? २ अज्झीणपयत्थाहिगारजाणयस्स जं सरीरयं ववगयचुयचाविअचत्तदेहं जहा दवज्झयणे तहा भाणिअवं, जाव से तं जाणयसरीरदवज्झीणे । से किं तं भविअसरीरदवज्झीणे ? २ जे जीवे जोणिजम्मणनिक्खंते जहा दवज्झयणे, जाव से तं भविअसरीरदवज्झीणे । से किं तं जाणयसरीरभविअसरीरवइरित्ते दवज्झीणे ? सवागाससेदी, से तं जाणयसरीरभविअसरीरवइरित्ते दवज्झीणे । से तं नोआगमओ दवज्झीणे, से तं दवज्झीणे । से किं तं भावज्झीणे ? २ दुविहे पण्णत्ते, तंजहा-आगमओ अ नोआगमओ अ । से किं तं आगमओ भावज्झीणे ? २ जाणए उवउत्ते, से तं आगमओ भावज्झीणे । से किं तं नोआगमओ भावज्झीणे ? २-जह दीवा दीवसयं पइप्पए दिप्पए अ सो दीवो । दीवसमा आयरिया दिप्पंति परं च दीवंति ॥ १ ॥ से तं नोआगमओ भावज्झीणे, से तं भावज्झीणे से तं अज्झीणे । से किं तं आए ? २ चउव्विहे पं०, तं-नामाए ठवणाए दवाए भावाए, नामठवणाओ पुवं भणिआओ, से किं तं दवाए ? २ दुविहे पं०, तं०-आगमओ अ नोआगमओ अ । से किं तं आगमओ दवाए ? २ जस्स णं आयत्तिपयं सिक्खियं ठियं जियं मियं परिजियं जाव, कम्हा ? अणुवओगो दवमितिकहु, नेगमस्स णं जावइआ अणुवउत्ता आगमओ तावइआ ते दवाया, जाव से तं आगमओ दवाए । से किं तं नोआगमओ दवाए ? २ तिविहे पं०, तं-जाणयसरीरदवाए भविअसरी-

रदवाए जाणयसरीरभविअसरीरवइरित्ते दवाए । से किं तं जाणयसरीरदवाए ?, २ आययपत्थाहिगारजाणयस्स जं सरीरयं वव-
 गयचुअचाविअचत्तेदेहं जहा दवज्झयणे, जाव से तं जाणयसरीरदवाए । से किं तं भविअसरीरदवाए ?, २ जे जीवे जोणि-
 जम्मणिविक्खंते जहा दवज्झयणे जाव से तं भविअसरीरदवाए । से किं तं जाणयसरीरभविअसरीरवइरित्ते दवाए ?, २ तिविहे
 पण्णत्ते, तंजहा-लोइए कुप्पावयणिए लोगुत्तरिए । से किं तं लोइए ?, २ तिविहे पण्णत्ते, तंजहा-सचित्ते अचित्ते मीसए अ ।
 से किं तं सचित्ते ?, २ तिविहे पण्णत्ते, तंजहा-दुपयाणं चउप्पयाणं अपयाणं, दुपयाणं दासाणं दासीणं चउप्पयाणं आसाणं
 हत्थीणं अपयाणं अंबाणं अंबाढगाणं आए, से तं सचित्ते । से किं तं अचित्ते ?, २ सुवण्णरययमणिमोत्तिअसंखसिलप्पवाल-
 रत्तरयणाणं (संतसावएअस्स) आए से तं अचित्ते । से किं तं मीसए ?, ३ दासाणं दासीणं आसाणं हत्थीणं समाभरिआउ-
 आलंकियाणं आए, से तं मीसए, से तं लोइए । से किं तं कुप्पावयणिए ?, २ तिविहे पण्णत्ते, तंजहा-सचित्ते अचित्ते मीसए
 अ, तिण्णिवि जहा लोइए, जाव से तं मीसए, से तं कुप्पावयणिए । से किं तं लोगुत्तरिए ?, २ तिविहे पं०, तं०-सचित्ते
 अचित्ते मीसए अ । से किं तं सचित्ते ?, २ सीसाणं सिस्सणिआणं, से तं सचित्ते । से किं तं अचित्ते ?, २ पडिग्गहाणं वत्थाणं कंबलाणं
 पायपुंछणाणं आए, से तं अचित्ते । से किं तं मीसए ?, २ सिस्साणं सिस्सणिआणं सभंडोवगरणाणं आए, से तं मीसए,
 से तं लोगुत्तरिए, से तं जाणयसरीरभविअसरीरवइरित्ते दवाए, से तं नोआगमओ दवाए, से तं दवाए । से किं तं भावाए ?,
 दुविहे पं०, तं०-आगमओ अ नोआगमओ अ । से किं तं आगमओ भावाए ?, २ जाणए उवउत्ते, से तं आगमओ भावाए ।
 से किं तं नोआगमओ भावाए ?, २ दुविहे पं०, तं-पसत्थे अ अपसत्थे अ । से किं तं पसत्थे ?, २ तिविहे पं०, तं०-

णाणाए दंसणाए चरित्ताए, से तं पसत्थे । से किं तं अपसत्थे ? १ चउव्विहे पं०, तं०—कोहाए माणाए मायाए लोहाए, से तं अपसत्थे । से तं णोआगमओ भावाए, से तं भावाए, से तं आए । से किं तं झवणा ? २ चउव्विहा पण्णत्ता, तंजहा—नामज्झवणा ठवणज्झवणा दव्वज्झवणा भावज्झवणा । नामठवणाओ पुवं मणिआओ । से किं तं दव्वज्झवणा ? २ दुविहा पण्णत्ता, तंजहा—आगमओ अ नोआगमओ अ । से किं तं आगमओ दव्वज्झवणा ? २ जस्स णं झवणेतिपयं सिक्खियं ठियं जियं मियं परिजियं जाव से तं आगमओ दव्वज्झवणा । से किं तं नोआगमओ दव्वज्झवणा ? २ तिविहा पण्णत्ता, तंजहा—जाणयसरीरदव्वज्झवणा भविअसरीरदव्वज्झवणा जाणयसरीरभविअसरीरवइरित्ता दव्वज्झवणा । से किं तं जाणय० ? २ झवणा—पयत्थाहिगारजाणयस्स जं सरीरयं ववगयचुअ० सेसं जहा दव्वज्झयणे, जाव से तं जाणय० । से किं तं भवि० दव्व० ? २ जे जीवे जोणिजम्मणिक्खंते सेसं जहा दव्वज्झयणे, जाव से तं भविअसरीरदव्वज्झवणा । से किं तं जाणयसरीरभविअसरीरवइरित्ता दव्वज्झवणा ? २ जहा जाणयसरीरभविअसरीरवइरित्ते दव्वाए तहा भाणिअव्वा, जाव से तं मीसिआ, से तं लोगुत्तरिआ, से तं जाणयसरीरभविअसरीरवइरित्ता दव्वज्झवणा, से तं नोआगमओ दव्वज्झवणा, से तं दव्वज्झवणा । से किं तं भावज्झवणा ? २ दुविहा पण्णत्ता, तंजहा—आगमओ अ णोआगमओ अ । से किं तं आगमओ भावज्झवणा ? २ जाणए उवउत्ते, से तं आगमओ भावज्झवणा । से किं तं णोआगमओ भावज्झवणा ? २ दुविहा पण्णत्ता, तंजहा—पसत्था य अपसत्था य । से किं तं पसत्था ? २ तिविहा पण्णत्ता, तंजहा—नाणज्झवणा दंसणज्झवणा चरित्तज्झवणा, से तं पसत्था । से किं तं अपसत्था ? २ चउव्विहा पण्णत्ता तंजहा—कोहज्झवणा माणज्झवणा मायज्झवणा लोहज्झवणा, से तं अपसत्था । से तं नोआगमओ भाव-

ज्ञवणा, से तं भावज्ज्ञवणा, से तं ज्ञवणा, से तं ओहनिप्फण्णे । से किं तं नामनिप्फण्णे १, २ सामाइए, से समासओ चउ-
 विहे पं०, तं-णामसामाइए ठवणासामाइए दवसामाइए भावसामाइए । णामठवणाओ पुवं भणिआओ । दवसामाइएवि तहेव,
 जाव से तं भविअसरीरदवसामाइए । से किं तं जाणयसरीरभविअसरीरवहरित्ते दवसामाइए १, २ पत्तयपोत्थलिहियं, से तं
 जाणयसरीरभविअसरीरवहरित्ते दवसामाइए, से तं णोआगमओ दवसामाइए, से तं दवसामाइए । से किं तं भावसामाइए १,
 २ दुविहे पं०, तं०-आगमओ अ नोआगमओ अ । से किं तं आगमओ भावसामाइए १, २ जाणए उवउत्ते, से तं आगमओ
 भावसामाइए । से किं तं नोआगमओ भावसामाइए १, २-जस्स सामाणिओ अप्पा, संजमे णिअमे तवे । तस्स सामाइअं
 होइ, इइ केवलिभासिअं ॥ १ ॥ जो समो सबभूएसु, तसेसु थावरेसु अ । तस्स सामाइयं होइ, इइ केवलिभासिअं ॥ २ ॥
 जह मम ण पिअं दुक्खं जाणिअ एमेव सबजीवाणं । न हणइ न हणावेइ अ सममणइ तेण सो समणो ॥ ३ ॥ णत्थि य से
 कोइ वेसो पिओ अ सब्बेसु चेव जीवेसु । एएण होइ समणो एसो अन्नोऽवि पज्जाओ ॥ ३ ॥ उरगगिरिजलणसागरनहतलतरु-
 गणसमो अ जो होइ । भमरमियघरणिजलरुहरविपवण समो अ सो समणो ॥ ५ ॥ तो समणो जइ सुमणो भावेण य जइ
 ण होइ पावमणो । सयणे अ जणे अ समो समो अ माणावमाणेसु ॥ ६ ॥ से तं नोआगमो भावसामाइए, से तं भावसामाइए,
 से तं सामाइए, से तं नामनिप्फण्णे । से किं तं सुत्तालावगनिप्फण्णे १, २ इआणि सुत्तालावयनिप्फण्णं निक्खेवं इच्छावेइ से अ
 पत्तलक्खणेऽवि ण निक्खिप्पइ, कम्हा ? लाघवत्थं, अत्थि इओ तइए अणुओगदारे अणुगमेत्ति, तत्थ निक्खित्ते इहं निक्खित्ते
 भवइ, इहं वा निक्खित्ते तत्थ निक्खित्ते भवइ, तम्हा इहं ण निक्खिप्पइ तर्हि चेव निक्खिप्पइ, से तं निक्खेवे (सू० १५०) से

अनुयोग-
द्वार-

॥ ४९ ॥

किं तं अणुगमे ?, २ दुविहे पण्णत्ते, तंजहा-सत्ताणुगमे अ निज्जुत्तिअणुगमे अ । से किं तं निज्जुत्तिअणुगमे ?, २ तिविहे पण्णत्ते, तंजहा-निक्खेवनिज्जुत्तिअणुगमे उवग्घायनिज्जुत्तिअणुगमे सुत्तप्फासिअनिज्जुत्तिअणुगमे । से किं तं निक्खेवनिज्जुत्तिअणुगमे ?, २ अणुगए, से तं निक्खेवनिज्जुत्तिअणुगमे । से किं तं उवग्घायनिज्जुत्तिअणुगमे ?, २ इमाहिं दोहिं मूलगाहाहिं अणुगंतवो, तंजहा-उद्देसे १ निद्देसे अ २ निग्गमे ३ खेत्त ४ काल ५ पुरिसे य ६ । कारण ७ पच्चय ८ लक्खण ९ नए १० समोआरणाणुमए ११ ॥ १॥ किं १२ कइविहं १३ कस्स १४ कहिं १५ केसु १६ कहं १७ कियच्चिरं हवइ कालं १८ ? । कइ १९ संतर २० मविरहियं २१ भवा २२ गरिस २३-फासण २४ निरुत्ती २५ ॥ २ ॥ से तं उवग्घायनिज्जुत्तिअणुगमे । से किं तं सुत्तप्फासिअनिज्जुत्तिअणुगमे ?, २ सुत्तं उच्चारैअवं अक्खलिअं अमिलिअं अवच्चामेलिअं पडिपुण्णं पडिपुण्णघोसं कंठोद्धविप्पमुक्कं गुरुवायणोवगयं, तओ तत्थ णज्झिहिति ससमयपयं वा परसमयपयं वा बंधपयं वा मोक्खपयं वा सामाइअपयं वा णोसामाइअपयं वा, तओ तम्मि उच्चारिए समाणे केसिं च णं भगवंताणं केइ अत्थाहिगारा अहिगया भवन्ति, केइ अत्थाहिगारा अणहिगया भवन्ति, ततो तेसिं अणहिगयाणं अहिगमणद्धाए पयं पएणं वन्नइस्सामि, -संहिया य पदं चेव, पयत्थो पयविग्गहो । चालणा य पसिद्धी अ, छविहं विद्धि लक्खणं ॥ १॥ से तं सुत्तप्फासिअनिज्जुत्तिअणुगमे, से तं निज्जुत्तिअणुगमे, से तं अणुगमे (सू० १५१) से किं तं णए ?, सत्त मूलणया पण्णत्ता, तंजहा-णेगमे संगहे ववहारे उज्जुसुए सद्दे समभिरूढे एवंभूए, तत्थ-णेगेहिं माणेहिं मिणइत्ति णेगमस्स य निरुत्ती । सेसाणंपि नयाणं लक्खणमिणमो सुणह वोच्छं ॥ १ ॥ संगहिअपिडिअत्थं संगहवयत्थं समासओ भित्ति । वच्चइ विणिच्छिअत्थं ववहारो सवदवेसुं ॥ २ ॥ पच्चुप्पन्नगाही

सूत्रम् .

॥ ४९ ॥

उज्जुसुओ णयविही णुणेअवो । इच्छइ विसेसियतरं फञ्चुप्पणं णओ सहो ॥ ३ ॥ वत्थूओ संकमणं होइ अवत्थू नए सम्-
मिरूढे । वंजणअत्थतदुमयं एवंभूओ विसेसेइ ॥ ४ ॥ णायंमि गिण्हिअवे अगिण्हिअवमि चेव अत्थंमि । जइअवमेव इइ जो
उवएसो सो नओ नाम ॥ ५ ॥ सवेसिंमि नयाणं बहुविहवत्तवयं निसामित्ता । तं सव्वनयविसुद्धं जं चरणगुणट्ठिओ साहू ॥ ६ ॥
से तं नए । अणुओगदारा सम्मत्ता (सू० १५२) सोलससयाणिचउरुत्तराणि होति उ इमंमि गाहाणं । दुसहस्समणुद्धुमळं
दवित्तप्पमाणओ मणिओ ॥ १ ॥ णयरमहादारा इव उवक्कमदाराणुओगवरदारा । अक्खरविंदुगमत्ता लिहिया दुक्खक्खय-
ठाए ॥ २ ॥ गाहा १६०४ अनुष्टुप् ग्रंथाग्रम् ॥ २०८५ ॥ अणुओगदारंसुत्तं समत्तं ॥

इति श्रीमदनुयोगद्वारसूत्रसमाप्तं ॥



॥५४॥

इति श्रीमदनुयोगद्वारसूत्रं समाप्तं ॥

अवलंबिउण कज्जं जं किंचि समायरंति गीयत्था ।
थोवावराह बहुगुणं सव्वेसिं तं पमाणं त्ति ॥

तेवा तेवा द्रव्य, क्षेत्र, કાળ, ભાવને આશ્રીને કોઈક વિશેષ કાર્યના નિમિત્તે ગીતાર્થ પુરુષો
થોડા નુકશાન અને બહુગુણયુક્ત જે કાંઈ આચરણ કરે છે, તે સર્વને પ્રમાણ છે.

